



Grawng: Cao: Tiem: Lai

Cao: tiem: lai in mawh kawn: (Tax Sara Sai Tao: Pleeik) mai: Yax Ok Saik pa ot dauh veng Tang Yan heue. Keh ka dauh num 1973, khix liah 28 singaix, dauh veng Lashio heue. Dauh puxaik puxaw: 6 kaux, nawh mawh loe: kaux tix kaux heue. Nawh mawh kawn: saux (Tax sara lhong: Sam Pleeik), pa ot yaong: Shiem:, Meung Mao nhaox, mai: pa yuh sara ceucao: veng Lashio, Byuhalang nhaox heue. Mai: mawh kawn: praix sara lhong: Ai Pao Pleeik Sgu, pa ploi lox ka dauh cag bhaung, pa ot dauh haktiex meung Thai mai: mawh kawn: praix Tax Sam Bra, Lashio heue.

Nawh awng cawng Camlik dauh veng Taung Ji, mai: pon bwiex L.Th mai: B.Th dauh cawng an heue. Nawh yuh sara ceucao: ra: kaux tix kaux dauh yaong: Pang Yax tix num, nawh hoik yuh sara ceucao: dauh veng Tang Yan ra: num heue. Yamin tokaux nawh haok cawng Camlik kadaux (Bethany Theological Seminary, Insein, Yangon) son bwiex pa mawh M.Div heue.

Simoeng nawh mawh saramax Susana mai: koe: kawn: simex tix kaux, pa kaux Ai Tao: Nap heue.

အသင်းတော်တွင်းကန်သတ်



Kawncau Kao: Kaux Ra:

Ai Nap Tao: (Sgu)

Kaing: Lai

		Paklai
Lox Tawm:		(i)
Lox Ting Bwanson:		(ii)
Lawg	Grawhgrawng:	
1	Kawncau Kao: Kaux Ra:	1
2.	Petrux (Pui pa lih tix mawh rang:)	6
3.	Yohan (Kawncau pa lih tix mawh pui pa koe: krax moh khaing: toh sah)	20
4.	Andare(Pa viex pui tang: kaux hoek ka Yesux)	32
5.	Thomax (Kheu ceu pa ang yumrhawm: pui pa lih tix tawng pa rah pa see)	38
6.	Mathiex (Pa yaox tix kham: ka ceu pa seeing pa brai: pui kukaux)	49
7.	Yudax Isakariut(Pa lih mawh kaw pa ang kaux sijax)	60
8.	Yakop (Pux Simiang Yesux), pui pa lih tix mawh paoxgrawm, khaing: pa mawh pui koeng ka:	74
9.	Philipux (Pui pa jah tix mhong: lox pa kok Simiang Yesux)	79
10.	Simon Zelot (Grawng: pui pa ang koe: krax moh yam jah, nawh dee ghoik mai: krax moh krax rhawm:)	86
11.	Yakop pa mawh Puxke: Yohan(Daux kawncau kao: kaux ra: pa yaox tix yum phaoxka: son Simiang Yesux)	94
12.	Bathawlamie:	100
13.	Nasanilax	106
14.	Yakop Kawn: Alaphie:	112
15.	Thatdie:	115

(i)

Lox Tawm:

Grawhgrawng: pa tiem: ka lai in kienie, mawh sonsang sawng mai: khrawm: tix plak jhi: ka ceu pa plak jhi: ka dauh Camlik khraox mai: ceu pa koe: pa laigrhawm: pa khaw: ex tix tawng mai: grawng: been pa ting ceu mai: grawhgrawng: kawncau kao: kaux ra: pa kraï kuad song: khankix heue.

Grawng: been in khankix, ang chix ah, koe: dauh lai grawng been haktiex tete telai heue. Viang mawh nan: grawng: in khankix kheu kieh grawng: kawncau kaux mawx kaux an sidawng:, chix tix ah mawh pa ting ceu heue.

Pui pa phat ka lai in kukaux sonsang lheu: meed, nabyam: ka kawncau kao: kaux ra: cie Simiang Siyiex, aux keud pot jun pot mai: rawg bwan: heue.

Wiliam Bakale, 1959

Lox tawm: plak piang in, mawh lox tawm: pa hoik tiem: tokaux Wiliam Bakele dauh lai cie nawh heue. Kheu deeh toe: aux tix tiem: ka lai nawh, aux tom: deeh sau lox tawm: nawh dauh lai in heue.

Ai Nap Tao: (Sgu)

12-5-2004

(ii)

Lox Ting Bwanson:

Simiang Siyiex eue, aux yaogyaw ka ceukaux Maix ting ting lhaong: lhaong: heue. Viang iak riang iak rao aux plak kuceu kawx, kheu jhi: Maix bwanson: Tix pa naog piang aux. Baox yip shiao aux son meung Maix liak. Khwan: ju aux, riangrao aux, pa chix aux khankix mawh son Maix heue.

Baox ah ting bwanson: ka miex moh aux, pa kaux Yax Ok Saik heue. Sonsang pon thud ka lai in, miex moh aux tawx riangrao, krax keud mai: sawg mau khri: son aux heue. Miex moh aux eue, baox ah ting bwanson: ka pax heue.

Baox ah ting bwanson: ka nyiexma: paox pa moh aux, pa kaux Tax Ciet Seng: mai: Yax Yex Sin pa ot daux veng Lashio heue. Sonsang pon thud ka lai in, nyiexma: nawh teem: coi ka mau khri: heue. Kieh Simiang Siyiex baox naog bwanson: piang kaing jhaw: pa yuh nawh mai: piang kawm: praix nawh liak.

Baox ah ting bwanson: ka nyiexma: aw: moh aux pa mawh Tax Yaw Tax Lux mai: Yax I Sin Tao: son mau khri: pa tan kix son phuk lai in heue. Mawh kheu nan, kieh Simiang Siyiex baox naog bwanson: ka piang kaing jhaw: pa yuh kiex mai: kawm: praix kiex laik.

Baox ah ting bwanson: ka puxaik pa moh aux, Tax Nyi Nyi Khun Tao: heue. Nawh kawx kied tawx riangrao: ka aux heue. Sonsang pon thud ka lai in nawh kawx tawx mau tan heue.

Sonsang pon thud ka lai in, pa sawg mau khri: plak nie, mawh Sara lhong: Sam Pao, pa mawh cao: bung: kaing: cawng Camlik Vax ex, pa koe: daux yaong: Man Pien heue. Aux kawx ah ting bwanson: ka nawh heue. Mawh kheu nan:, aux kawx lih tix koe: rhawm: tix tan lu ka phuk lai in khawm: uik, son cawng Camlik Vax ex heue. Mau khri: pa pon kheu coh tix lai in khawm: uik mawh son cawng Camlik Vax ex heue. Mawh kheu nan, liag pex phat, tawx riangrao ka cawng Camlik Vax ex mai: lai Vax ex awawx.

Baox ah ting bwanson: ka Sara Sai Rong Shwe heue. Sonsang pon thud ka lai in, nawh mawh cao: pa tiem: ka daux cag dong (Kawmpyuta) heue. Viang nawh ang tien kawx, tawx bawgyam tix, mai: coca tix tawx krax keud tix heue.

(iii)

Yam thud aux ka lai **Lox Phektiem**: nhaox. cao: pa teem: coi aux tiem: ka lai pa mawh (Tax Sai Pleeik) pa ot yaong: Pang Sat mai: pa tawx riangrao ka aux pa mawh (Sara Chali Khun) mai: pa tawx lox kab pa kaux Sara Ai Rong: (Sku) pa ah lox leng Vax ex mai: pa coh aux ih 50 pheen: pa kaux Tax Ai Yawn Rai: pa ot Lashio, pa ah lox leng Vax ex mai: Sara Ai Pan Nyeng: pa ot Hopang, ah ting bwanson: ka pex kukaux, mai: baox mhai: daux lai in heue.

Ceukaux pa tawx mau khri: sonsang pon thud ka lai **Lox Phektiem**: nhaox, mawh awm: plak greem: heue.

1. Tax Sam Bra (Lashio)
2. Saramax Daw Khu Seu (Yang Gong)
3. Tax Lok Yawn: (Lashio)
4. Tax Ai Pao Kap (Yang Gong)
5. Tax Yaw Tax Lux mai: Yax I Sin Tao: (Tang Yan)
6. Tax Ai Pao Shiang mai: Yax Ip Sin Tao: (Lashio)
7. Yax Yex Nang Tao: (Tang Yan)
8. I Noi Liang (Tang Yan)
9. Tax Poi Poi Lux mai: Yax Shie Li (Lashio)

Ah ting bwanson: ka kix kukaux, ex khawm: uik yaox tix phat ka lai in, doh keud rawgbwan: son kix khawm: awawx.

Kawncau Kao: Kaux Ra:

Ka daux riang susai, pa yaox pui pa tiem: lai plak Jhi: mawh nin:.
 “Mai: guh veng, veng an koe: jaong num: kao. mu: ra: mai: ka piang jaong
 an khankix koe: ceukaux kawncau pa ting cie Kawn: Yang: an: kao: kaux
 ra: heue” (Plak Jhi: 21:14). Kawncau kao. kaux ra: an, mawh jaong num:
 ceucao: kawn: khrit heue. Mawh kheu nan: ex khaw: tix tawng grawhgrawng:
 kix heue. Sonsang tawng grawhgrawng: pa mawh kix, ang joeng mawh
 pui pa pon ju kawncau an, mawh pa yuh ka mawx? Mai: kawn: sibex pa
 hawt khaix koe: dee bleeh yuh ka mawx son ex, ex khaw: tix tawng grawhgrawng:
 heue.

Yam plak jhi: ka ceukaux kawncau, ka daux Camlik khraox, tiem:
 tix deuh ceukaux kawncau kao: kaux ra:, loe: dah, mai: pon: dah tix dah
 tiem: tix deuh ceukaux kawncau kao: kaux tix ngie heue. Phuk lai an kix
 kienie, mawh ka daux Makux 3:16-19, Mathiex 10:2-4, Lukax 6:14-16.
 mai: Kawncau 1:13 heue. Ka daux phuk lai an, ceukaux kawncau khankix,
 awm: plak greem: heue.

Makux	Mathiex	Lukax	Kawncau
1. Petru	Petru	Petru	Petru
2. Yakop	Andare	Andare	Yohan
3. Yohan	Yakop	Yakop	Yakop
4. Andare	Yohan	Yohan	Andare
5. Philipux	Philipux	Philipux	Philipux
6. Bathawlamie:	Bathawlamie:	Bathawlamie:	Thomax
7. Mathiex	Thomax	Mathiex	Bathawlamie:
8. Thomax	Mathiex	Thomax	Mathiex
9. Yakop	Yakop	Yakop	Yakop
(kawn: Alaphie:)	(kawn: Alaphie:)	(kawn: Alaphie:)	(kawn: Alaphie:)
10. Thatdie:	Thatdie:	Simon (pa kok mawh Zelot)	Simon Zelot

2 Kawncau Kao: Kaux Ra:

11. Simon	Simon	Yudax	Yudax
(pui Kananix)	(pui Kananix)	(pux Yakop)	(pux Yakop)
12. Yudax	Yudax	Yudax	-
Isakariut	Isakariut	Isakariut	

Pa deeh tiem: Simiang Jem, pa mawh Camlik Inggalik, plak jhi: daux lai Mathiex mai: lai Makux yuh nin:, "Simon pui Kananix" (Simon the Canaanite). mai: tiem: daux lai Lukax nin: "Simon pa kok mawh Zelot heue (Simon called Zelotes).

Daux lai Makux mai: lai Mathiex cie Camlik Simiang Jem, kheu lud pa deeh tiem: nawh, mawh kheu nan:, daux Camlik Inggalik pa hoik cox ang ah (English Revised Version), daux Camlik tang: ceu ang ah cox ka ceu pa lud an heue. Mai: daux lai num: riah lox Greg pa tiem: ka taix pa kied mhawm: pa tiem: khankix kienie, ang mawh Kananites (plak lox Inggalik Cananite mai: plak lox Vax Kananix), viang mawh nan:, mawh Kanaaios (Kananeyo) heue. Phan: plak jhi: ceukaux Simon kienie caw tix mawh Cananaean (Kannaneyan) heue. Mai: ceukaux an, mawh plak lox Arami (Aramaic) mai: dee bleeh nawh kienie mawh Zelot (Zelotes) heue. Mai: Zelot khankix mawh pui pa hai: pa meug, mai: mawh pui pa chix jhak ngie plak pui ceu tix ngie heue. Mai: kix mawh pui pa yuh tix deuh sijax mukheu, sonsang laklheit mai: plaux ka pui Romax krax pa hai: pa meug ceu mawx ang ah heue. Ngai: lai Kanaaios, ang plak jhi: ka Simon mawh pui ceu mawx, viang mawh nan: plak jhi: ngie cubcaw: kaing meung cie nawh heue. Mai: Simon ang mawh pui Kananix (Canaanite), (ang mawh pui tang: ceu tang: cat), viang mawh nan:, mawh pui Yudax pa kied viexrhawm: daux beenli ih tix heue.

Daux Camlik Inggalik (Simiang Jem), viex ka kawncau tix kaux pa mawh Yudax pux Yakop heue.

Mai: daux Camlik Greg, ang viex ngai: lai "pux", mai tiem: tix deuh nin: Yudax cie Yakop (Judas of James) heue. Camlik Simiang Jem, kheu ang caox kriem ka grawhgrawng: ceu an mai: gaing tix tiem: ka ngai: lai pux heue. Ceu pa kok ka Yudax cie Yakop (Judas of James) kienie mawh pa shiao pui tom: nie plak ngai: lai Greg heue. Ceu pa shiao ka ceu an, dee bleeh nawh, ang mawh pux laing laing, viang mawh nan: dee bleeh nawh mawh "kawn:" khawm: heue.

Daux Camlik Inggalik, pa hoik deeh cox tix tiem: mai: daux Camlik pa hoik thut plak khaix khankix, khaw: tete, kheu viex nin: "kawn: Yakop" heue.

Daux phuk lai pa deeh tiem: Simiang Jem, grawng: pa viex ngai: lai pa mawh "pux" khaing: ngai: lai pa mawh "kawn:" kienie, kheu simie tix plak jhi: ka Yudax pux Yakop pa viex daux kawncau mai: Yudax pa tiem: lai Yudax, mawh tix kaux khaing: heue (Yudax 1:1).

Mai: daux carang ceukaux kawncau kao: kaux tix, awm: paox tix heue. Viang mawh nan:, ang sidawng: son ceukaux kawncau kao: kaux ra: heue. Daux lai Makux ceukaux kawncau kao: ra: kaux tix kaux kienie mawh Thatdie: (Thaddaeus) heue. Mai: daux lai Mathiex, pa koe: daux Camlik Simiang Jem, viex nin: "Thatdie: pa kok ceukaux khraox mawh Lebie: (Lebbaeus)" heue. Mai: daux lai Lukax mai: daux lai Kawncau viex nin: "Yudax kawn: Yakop (Judas the son of James) heue.

Phaoxka: ceu pa caw tix satix tix jhak kienie "Thatdie: pa kok ceukaux khraox mawh Lebie:" grawng: lai yuh nan:, ang viex daux lai tiem: pa kied kaux rhawm:, yam ju didix, pa tiem: ka taix tix heue. Daux Camlik Inggalik pa deeh cox tix tiem: kawx, kheu grham: ka grawng: lai an, ceu an kawx caw tix grham: kah heue.

Yam keud ka grawng: lai an, pon yaox ka grawhgrawng: ra: ceu, pa chix pon mawh heue.

(i) Pa kaux Hawt (Hort), nih nai kraih lao ah nin:, "Yam jah, pui pa tiem: lai khankix ang hiex tawng mawh Mathiex, mai: Lewix tix kaux khaing: heue". Mai: nawh baox tix kraih krax keud tix yuh nin: "Otkhaix ka daux kawncau kao: kaux ra:, yam coca tix sau: ceukaux Levix (Levi of Levite), lih tix mawh Lebie: heue".

(ii) Dee bleeh num: lox ngai: lai Thatdie: (Thaddaeus), pon teei ka daux pa daox pa am: heue. Mai: lox ngai: lai Thaddaeus lih mawh khaing: num: lox ngai: lai Thed. Dee bleeh lox ngai: lai That (The), mawh naok mai: teeh heue. Phan: teei num: lox ngai: lai ceukaux an, tag mawh ceukaux pa daox pa am: son kawncau tix kaux heue. Baox tang: ceu kienie ceukaux Lebie: (Lebbaeus), pon teei khaing: lox ngai: lai Lbe heue. Dee bleeh nawh mawh rhawm: heue. Mai: kheu ce: ceukaux Thatdie: (Thadaeu) mawh ceukaux pa am: son kawncau tix kaux, mai: kheu ce: cao: tiem: lai kix.

4 Kawncau Kao: Kaux Ra:

ceukaux Lebie:, nie lheu: mhawm: , mai: kix tom: deeh loh ceukaux nawh mawh Lebie: heue.

Yuh ka mawx kawx, phan: carang kawncau yaox tix koe: kao: kaux ra: kienie Thatdie: mai: Yudax kawm: Yakop yaox tix mawh tix kaux khaing: heue. Grawhgrawng: nawh, yam ju yam kix dix, pui khankix chix sum: ceukaux tix koe:, loe: ceu heue. Mhai: sakse: kienie daux lai Kawncau 1:13 viex ah nin: "Pa mawh Yosiep, pa kok mawh Basabax, pa ceukaux ru nawh mawh Yusatu" heue. Mai: Thatdie:(Thaddaeus) kawx, tag koe: ceukaux tang ceu, pa mawh Yudax (Judas) heue. Yam ceukaux Yudax mawh krax kaig krax tua kienie tag tik ka ceukaux Yudax an, mai: kok ngie ceukaux Thatdie: tix mu: khaing: heue. Phan: ang mawh nan:, ceu kaux Yudax tee: lih tix tieh loh khaing: Theudas pa sidu mai: Thaddaeus heue.

Ka ceukaux kawncau pa viex daux lai khrit in, phan: baox tiag tix yaox mai: lai Yohan kienie lih tix koe: krax suksag tix ceu heue. Daux lai Yohan, plak jhi: tix deuh sidawng: mawh Nasanilax kawncau tix kaus mai: pa tokaux Simiang Yesux laug ka Nasanilax mawh kawncau Tix tix kaux heue (Yohan 1:43-51). Daux lai Yohan 21:1 kawx, yaox sidawng: Nasanilax mawh tix kaux daux kawncau khankix heue. Viang mawh nan:, daux carang kawncau awm: plak piang, ang yaox ka ceukaux nawh heue. Mawh kheu nan:, ceukaux Nasanilax mai: ceukaux Bathawlamie:, caw tix mawh tix kaux khaing: heue. Grawhgrawng: an pa chix pon mawh koe: loe: ceu, mai: awm: plak greem: heue.

(1) Ceukaux Nasanilax ang viex daux lai khrit loe: pluk, mai: ceukaux Bathawlamie: ang viex daux lai khrit pon: phuk tix phuk heue.

(2) Bathawlamie:(Bartholomew) ang doh chix pon mawh ceukaux phaoxka:. Dee bleeh Ba(Bar) kienie mawh "Kawn:" heue. Mai: koe: dee bleeh yuh nin: "Bathawlamie: mawh kawm: Thawlamie:(Tolmai) heue. Viang mawh nan:, ceukaux Bathawlamie: kienie kheu mawh ceukaux pa ao: ra: kaux tix kaux, yuh ka mawx ceukaux sivoe: an, tag yaox tix koe: tix ceu heue.

(3) Mai: ceukaux Philipux mai: ceukaux Bathawlamie: tia: tix deuh tau daux phuk lai khrit tix, ra: mai: loe: heue. Daux lai khrit Yohan (1:45), pa mawh pon: phuk tix phuk viex yuh nin: "Philipux sawg mai: yaox Nasanilax, mai: teei nawh hoek ka Yesux heue". Dee bleeh an kienie, daux lai khrit loe: phuk, tia: tix deuh ceukaux Philipux mai: Bathawlamie tau,

Kawncau Kao: Kaux Ka: 5

mai: lai khrit pon: phuk tix phuk plak jhi: ka kied meed Philipux mai: Nasanilax ka paox tix heue. Mawh kheu nan:, Bathawlamie: mai: Nasanilax tee: sang mawh pui tix kaux khaing: heue.

Thatdie: mai: Yudax kawm: Yakop grawng: mawh pui tix kaux khaing: ang ah, Bathawlamie: mai: Nasanilax grawng: mawh pui tix kaux khaing: ang ah, phan: rieb yuh nan:, tag sidawng: ka carang kawncau khankix heue.

Lawg (2)

Petrux

Pui pa lih tix mawh rang:

Daux carang ceukaux kawncau kao: kaux ra: khawm: uik: ceukaux Petrux mawh pa ot sivoe paox tix heue. Cao: kaing: kawncau khankix kawx. ex tawng tom: nie mawh ceukaux Petrux heue. Viang mawh nan: pui in. ex tom: yaox koe: ceukaux, daux lai Camlik pa khraox loe: ceu heue.

(1)Phaoxka: ka pui in. tom: yaox mawh Simon. daux lai Makux 1:16. mai: lai Yohan 1:40-41 heue. Ceukaux in. mawh ceukaux num: lih nawh heue. Daux lai Mathiex (4:18-10:2) "Petrux pa kok mawh Simon" tiem: tix deuh yuh nan: mai: ceukaux pa ah Simon an. mawh ceukaux pa kok daux leeing lang: ju nawh heue. Mai. pa kok ceukaux Peterux mawh Simon an. koe: ka daux grawhgrawng: ra: ceu heue. Phan: mawh grawng: pa tokaux nawh kienie pui shiao ka Simon heue. Daux lai Makux 1:29-30. "Nyix Simon". mai: "Miex moeng Simon" tiem: tix deuh nan: heue. Daux lai Lukax 5: 3-10. "Reu an tix lhang: pa mawh cie Simon" mai: "Paox pie Simon" tiem: tix deuh yuh nan: khawm: heue. Daux lai kawncau 10:5. 18,11:13. cao: giex kaing: naing pa mawh Kawnilix. yam tawx kawm: lien tix hu: ka Petrux "Chawk cheng pex yaox ka Simon" mai: tawm: lox yuh nan: khawm: heue. Mai: yam ot Petrux tau mai: Yesux. Yesux kawx kok ceukaux ah Simon heue. Daux lai Lukax 5:4. Simiang Yesux kok ceukaux Simon mai: ah nin: "Simon gah reu hu: dee raux. mai: plo: rub maix khankix. sonsang pon kax heue". Daux lai Mathiex 16:17. daux haktiex Kesarix Philipux. yam yaw Simiang Yesux ka Petrux. Nawh kok shiao Simon ka nawh heue. Mai: yam tawx Simiang Yesux lox satix ka grawng: sang ang Petrux kaux sijax mai: ah Simon ka ceukaux nawh heue (Lukax 22:30). Mai: yam laig it Petrux daux sipeem: Kesasemanix. Simiang Yesux so: ka nawh. ah Simon ka nawh heue. Mai: jheeh paox pa meed nawh khankix kawx yie lih tix ah Simon ka nawh heue.

(2)Daux Camlik khraox. tiem: tix deuh ka Petrux. mawh ceukaux Simiyon (Simeon) ra: bawg heue (Viang mawh nan: ang tang: daux Camlik

Vax ex mai: Camlik Man mawh Simon ngie heue). Mai: Yakop kok ceukaux Simiyon ka Petrux heue. Daux lai Petrux phuk ra:(1:1) tiem: tix deuh Simiyon khawm: heue. Pa ah ceu kaux Simiyon(Simeon) an. mawh ceukaux plak lox Hebric:, pa kok ceukaux lih nawh heue. Awm: pa koe: daux pa yib shiao been kawm: pui khankix. pui tom: tieh loh kok ceukaux Simiyon: (Simeon) mawh Simon heue. Daux ceuca: pa koe: daux veng Yerusalie. mai: kix kok Simiyon(Simeon) ka Petrux heue. Daux ceuca: an. ceu pa kok ka Petrux plak lox ceukaux Hebric: kienie mawh pa khaw: heue.

(3)Ceukaux Simon. grawng: lih tix mawh Petrux kienie. mawh pa tokaux Cao: Yesux pa tawx ceukaux pa khraox in. ka nawh heue. Grawng: pa tawx ceukaux pa khraox ka Simon. tiem: tix deuh grum grum naog naog heue (Makux 3:16. Lukax 6:14). Yam viex Andare pa mawh puxke: tix. pa kaux Simon. hu: ka Simiang Yesux. yuh ka mawx. mai: Simiang Yesux jhak nawh. mai: ah nin: "Maix mawh Simon kawm: Yonax. tag sang kok maix mawh Kephax heue." Dee bleeh Kephax mawh "rang:" (Yohan 1:42). Ceukaux Kephax mai: ceukaux Petrux. viang ang awm: paox tix kawx. dee bleeh mawh tix ceu khaing: heue. Ceu pa kieh ex laighawm: tix ceu kienie dee bleeh Yohan mawh sikaux mai: dee bleeh ceukaux Kephax mai: ceukaux Petrux kheu mawh rang: heue. Awm: ah Simiang Yesux nin: ka Petrux " Maix koe: rhawm: pa lhat graung: awm: sikaux. tom: hoek yamin heue. Viang mawh nan: phan: maix rieb aux mawh cao: pa dug thong: maix. mai: phan: maix appong krax pa im: ju tix ka Aux. mai: Aux tag kieh maix kaux cong: awm: rang: heue". Kheu grawng: tawx ceukaux pa khraox ka Petrux. Simiang Yesux sidawng: tix yaox grawng: koe: Nawh pa keud pot jun pot mai: ceu pa simie Nawh ka piang Petrux. daux krax pa im: ju Petrux hu: sivoe ngai: heue. Cao: pa tiem: lai khankix. yam tiem: kix ka grawng: Petrux. mai: kix tia: ka ceukaux prim: mai: ceukaux khraox yuh nin: "Simon Petrux" (Mathiex 16:16). Daux lai Yohan. shiao ka ngai: lai pa mawh Simon Petrux tom: nie ceu heue (Yohan 1:40. 6:68. 13:6. 24,36.18:18.15.25.20:6.21:2.3.7.11.15.16.17).

(4)Hoik nih nai krao. grawhgrawng: mawh ceukaux Petrux mai: ceukaux Kephax tix ceu khaing: nux heue. Petrux mawh plak lox Greg (Greek). mai: Kephax mawh plak lox Arami(Aramic) mai: dee bleeh khankiex mawh rang: heue.

Yam an dix. pui kukaux ah ka lox Greg(Greek) mai: ah ka lox pui

8 Petrux

ceu tix khankix heue. Mawh kheu nan:, pui tom: nie deuh ceukaux tix ra: ceu heue. Ceukaux tix ceu, mawh ceukaux plak lox Greg, mai: ceukaux an, mawh pa kok ka daux kaing pa yuh, mai: pa kok plak praix khankix heue. Ceukaux ra: ceu tix ceu kienie mawh pa kok paoxnyiex paoxma: mai: mawh pa kok pui pa meed heue. Mawh kheu nan., ka Thomax(Thomas) kawx, pui kawx kok ceukaux Didumux(Didymus) ka nawh heue (Yohan 11:16). Thomax mawh plak lox Arami, mai: Didumux mawh plak lox Greg heue. Phan: toe: dee bleeh kienie mawh “ Pa brawm: tix kieh” heue. Mai: ka Tabithax(Tabitha)kawx, pui kawx, kok ceukaux Dawka(Dorcus) ka nawh khawm: heue(Kawncau 9:36). Tabithax mawh plak lox Arami, mai Dawka mawh plak lox Greg heue. Phan: toe: dee bleeh kienie mawh “Kawn: cak iak” heue. Mai: hoek tom: yamin, kok ka Yohan (John) mawh ceukaux Ai-in(Iain) mai: kok ka Yakop (James) mawh ceukaux Hiemit (Hamish), plak lox pui pa ot daux tiag, pa koe: daux meung Skawtalang heue. Yam Pawlux krai ka grawng: Petrux, bawg mawx ang ah, shiao ka ceukaux pa mawh Kephax heue(1 Kaw 1:12, 3:22,9:5,15:5, mai: Kalatix 2:9). Ceu pa kok Pawlux ka Petrux plak ceukaux pui Yudax, khaw: tete, kheu Petrux mawh kawncau sonsang yuh satsana daux pui Yudax khankix heue(Kalatix 2:9).

Ka grawng: Petrux, ex tom; **pon** tix lheu: tawng khaing: kawncau tang: kaux heue. Grawhgrawng: nawh Petrux mai: Makux, kheu kied meed kiex ka paox tix, tix kaux lai tix kaux heue. Yam Petrux tiem: ka phuk lai cie nawh, pa mawh phuk lai tix, tiem: ah nin: “Kawn: simiex aux Makux heue” (1 Petrux 5:13). Daux yam jah num yieh ra:(2nd century), sara ting pa kaux Papiya(Papias) khaing: Hirapolix(Hierapolis), mawh pui tix kaux pa koe: rhawm: tix kraix khrawm: tix tiem: ka lai khrit heue. Grawng: pa kraix khrawm: tix tiem: ka lai Makux, pa yuh ka mawx kienie awm: plak greem: heue.

Kheu mawh Makux pa toe: lox Petrux, nawh tom: tiem: tix deuh ka ceu pa tawng nawh khawm: uik, grum grum naog naog heue. Viang mawh nan:, ceu lox sidiex Simiang Yesux khankix. ang dee ot khaw: caw heue. Mai: pa tokaux Makux, ang sax mhong: ka lox pa sidiex Nawh Cao: tix bawg kawx, mai: ang mawh cao: pa sax hawt khaix Keeing: Cao: tix bawg kawx heue. Otkhaix, Makux tom: mawh pui pa hawt khaix Petrux heue. Mai: Petrux sidiex gau awm: pa khaw: mai: ceu alo pui pa niet lox

sidiex heue. Nawh ang keud sawn: ka riang susai pa deuh Nawh Cao: tix baux hoik tix baux heue. Yam tiem: Makux ceu pa tiem: nawh khawm: uik, ang viex ceu pa lud pa roik daux phuk lai pa tiem: nawh heue. Nawh yuh satix tix tiem: ka ceu pa mhong: nawh khawm: uik, sonsang ang deuk tix ceu ceu, mai: yuh satix tix tiem: ka ceu pa plak jhi: khankix an. sonsang ang koe: dee lud dee cha: khawm: heue.

Awm: pa koe: daux grawng: an, lai Makux, mawh ngie lox pa sidiex Petrux khaing: heue. Caw tix yaw ka Petrux kheu ang nawh grham: tix ceu kawx ka ceu pa yaox nawh, mai: ceu pa mawh nawh khankix heue. Petrux ang mox ka ceu pa lud nawh khankix, mai: ceu pa sidiex Nawh Cao: ka nawh khankix, mai: krax pa lhat graung:, pa mawh grawng: pa ang nawh kaux sijax khankix heue. Nawh krai ka ceu khawm: uik heue. Grawhgrawng: nawh .krax moh pa pon pluut ploi: Simiang Yesux ka phimap, bwanson: pa khraox , pa sang lih mawh piang nawh hoik koe: miex ding miex dawd, mawh kheu sang kieh nawh tix sidawng: heue.

Petrux mawh pui pa myiet kax(cao: teei kax) tix kaux heue. Simiang Yesux kok ka nawh khaing: daux rub, mai: reu heue(Makux 1:16). Petrux mawh pui pa koe: nyiexma: tix kaux(1 Kaw 9:5). Dee ot nawh mawh veng Kapenom heue. Mhai: sakse: pa kieh yaox sidawng: kienie, mawh ceu pa plak jhi: daux lai Makkux 1:29-31, lai Lukax 4:38-39, mai: lai Mathiex 8:14-15 yuh nin: “Yam lih Yesux khaing: daux nyiex sidiex, mai: laig daux nyiex Simon, mai: cox jhawm: saux miex simoeng nawh grai: heue.”

Petrux, kheu mawh nawh, pui meung Galilie:, rhawmrhi: pa tang: pui meung an khankix, koe: daux nawh tom: nie ceu heue. Pa kaux Josiphax(Josephus) mawh pa tawng ka grawng: pui meung Galilie: mhawm: mhawm:, kheu sax mawh nawh simiang daux meung Galilie: heue. Mai: nawh tiem: tix deuh, daux phuk lai (Josephus, life 17; wars of the Jews 3.3,2) yuh nin: “Pui meung Galilie: khankix, mai: kix moh ka pa khraox pa ngha, mai: simie ka pa tieh pa loh. Mai: kix moh ka ceu pa tieh feen khankix. Mai: kix koe: pa cox khre: tix pon hawt khaix cao: bung: kaing: tix, sonsang yuh ceu pa suksag ang ah heue. Mai: pui meung an khankix kied ting rhawm: ting rhi:, mai: pui tom: nie tawng ka ceu pa chix yuh kix, ka krax simah heue. Viang mawh nan:, pui an khankix mawh pui pa kua rhawm: heue”. Mai: pa kaux Tiemat(Talmud) ah nin: “ Pui Galillie: khankix

mawh kix pui pa nie lheu: moh ka ceu pa koe: min: plak pa rah pa see: khaing: ceu pa pon mau pa pon khri: heue". Mai: ceu pa chix yuh pui meung Galilie: khankix kienie, mawh ceu pa yie songrhawm: mai ceu pa phai: rhawm: , mai: ceu pa ang nhimrhawm: mai: rhawm: pa chix so: kaoh ka ceu pa ang lhat tix som: . viang mawh nan: . ceu pa kaux cong: sijax mukheu tom: hoek dee sidah khankix, pa mawh cie pui meung Galilie: kienie lih tix mawh pakpeung Petrux heue.

Mai: ang rheung: . Petrux lih tix mawh cao: bung: kaing: kawncau kao: kaux ra: heue. Daux carang kawncau kao: kaux ra: cie Mathiex, tiem: tix deuh ceukaux Petrux phaoxka: heue(Mathiex 10:2). Lox phaoxka: kienie dee bleeh plak lox Greg mawh Proto(Protos). Lox an: koe: dee bleeh phaoxka: ang joeng mawh, koe: dee bleeh cao: bung: kaing: pa ting khawm: heue.Mathiex deuh ka Petrux dee phaoxka: . ang joeng mawh, simie tix ah Petrux mawh cao: bung: kaing: kawncau khawm: heue.

Daux kawncau kao: kaux ra: . kawncau pa pon tix yuh paox pie dex dawd ot koe: tau mai: Yesux, koe: loe: kaux heue. Pui an kix kienie, mawh Petrux, Yakop, mai: Yohan heue. Yam kieh Simiang Yesux kawnc: sibon: Ya-irux deeh kaoh im: ang ah(Makux 5:37, Lukax 8:51), yam Nawh Cao: loh pakngai: Nawh jhan: riang, awm: singaix, mai: kraung ceep Nawh lih paing, awm: pa riang, ka piang gawng lhaong: ang ah(Mathiex 17:1, Makux 9:2, Lukax 9:20), mai: daux sipeem: Kesasemanix ang ah, pui loe: kaux an, ot tau mai: Nawh Cao: heue. Mai: daux veng Yesusaliem, pui pa yaox tix hu: sivoe, sonsang cox khre: ka pa ih pa un: . son poi Pasakha pa ghoik cie Nawh Cao: kawx, mawh Petrux mai: Yohan heue.

Daux lai khrit, yaox plak jhi: ka Petrux, mawh cao: bung: kaing: kawncau khankix heue.(1) Daux lai Mathiex 15:15, mai: lai Lukax 12:41 "Krai ex mhong: lox phektek:" pui pa chawh yuh nan: ang ah. (2) daux lai Mathiex 18:21 "Simiang eue, puxaik aux phit aux, mai: aux tag pluat ploi: map nawh miex bawg?". pui pa chawh yuh nan: ang ah. (3) daux lai Mathiex 19:27 " Ex hoik prah pa koe: tix khawm: uik. mai: hawt khaix Maix. Mawh kheu nan: . ex tag pon ceu pa tix". pui pa chawh yuh nan: ang ah. (4) daux lai Makux 11:21, pa chawh grawng: vhit kroh hu: khaoxruh pa hoik jhax Nawh Cao: . mai: daux lai Makux 13:3, pa chawh grawng: yieh nyiex bwan: ang ah. (5) daux lai Mathiex 17:4 pa chawh grawng: tawx mau gha: ang ah. (6) daux lai Lukax 8:45, pui pa deeh pawk lox

Nawh Cao: . yam chawh Simiang Yesux nin: "Mawx pa teeh ka Aux" ang ah. (7) daux lai Yohan 21:20-22, pa chawh ka Simiang Yesux pa deeh kaoh im: ang ah, mawh Petrux heue.

Yam ex. sawn: tix yaox ka grawng: ju Petrux khaing: Camlik khraox, pon yaox ka ceu pa ting ceu heue.

(1) Ceu pa yaox ka grawng: pa ting ceu

Pa yaox ex pa ting ceu an. mawh pa mhai: tix tiem: . ka daux lai khrit pon: phuk heue. Daux lai khrit Yohan 6:1-15, yam Simiang Yesux eei: pui phwan: rheng: ka khaomun phwan: lon: mai: kax iak ra: mu: . mai: pui khankix an.khin: Nawh Cao: yuh simiang heue. Nawh Cao: thiang: ka ara simiang an heue.Mawh kheu nan: . kawncau Nawh pa haoh pa hun: deeh tieh tix lih hu: mai: ang deeh hu: mai: Nawh Cao: heue.Mai: Yesux ah nin: ka kawncau Nawh kao: kaux ra: "Pex kawx sang lih hu: khaing: Aux lie?" Simon Petrux pawk lox, mai: ah hin: ka Nawh "Simiang eue, ex tag sang hu: ka pui mawx? Maix koe: gumlox ju leeing ju leeing phan: . Mai: ex hoik yumrhawm: mai: tawng grawng: mawh Maix, Kaw pa singax singeh cie Siyiex heue"(Lai Yohan 6:66-69). Ceu pa kham: nawh, mhai: sakse: yuh nan: kienie, mawh ceu pa kied ting ceu pa yaox nawh heue.

Daux lai khrit phaoxka: . ceu pa nih nai krai lao pa mawh khankix kienie lheu: sidawng: sonsang mhai: ex tix tawng heue.Yam dex uik, bawgyam pa ot Simiang Yesux ka piang haktiex in, mai: kheu rom pui koeng ka Nawh, lih tix ting ceu son tawng ka tawng pui ka Nawh lie? Ang pui tawng lie? Nawh Cao: viex ka kawncau tix khankix hu: ka haktiex cie veng Kesarix Philipux, pa koe: dee caong ma: laong, sonsang sidiex gau ka kix, mai sonsang lheu: meed paox tix, tix kaux lai tix kaux, yam laux lee: heue. Khaix an, Nawh Cao: chawh nin: ka kawncau Nawh khankix" Pui ah Kawn: kawn: pui mawh mawx?" Mai: kix deeh ah " Tiblah mawh Yohan cao: baptis. Tiblah ah mawh Eliyax mai: tang: kaux ah mawh Yeramix. phan: ang mawh nan: mawh cao: jhai: tix kaux kaux heue". Nawh Cao: baox chawh ka kix ah nin: . "Viang mawh nan: . pex ah Aux mawh mawx?" Simon Petrux pawk lox mai: ah nin: ka Nawh Cao: "Maix mawh Khrit kawn: Siyiex pa im: ju heue(Mathiex 16:13-16, Makux 8:27-29, Lukax 9:18-20). Grawng: krax pa im: ju Petrux, viang deuh mawh pa ang khaw: tix tawng kawx. Yesux pui veng Nasariet mawh pui pa yuh ka mawx. ceu

12 *Petrux*

pa jah Petrux tix tawng phaoxka: an mawh pa kieh ceukaux Petrux koe: daux ju kawn: pui leeing: ju leeing: phan: heue.

(2) **Ceu pa deuh Sijax pa kied ting ceu**

Yam Petrux ah nin: ka Nawh Cao: "Maix mawh Khrit Kawn: Siyiex pa im: ju heue". Mai: Yesux deeh pawk lox ah nin: ka nawh "Maix mawh Petrux, mai: Aux tag sum: ceucao: Aux ka piang simaox in heue" (Mathiex 16:18). Dee bleeh pa raux pa mox sijax mukheu an, kied sidawng: tix yaox heue. Petrux kienie mawh pui pa jah tix tawng ka Yesux mawh pui pa yuh ka mawx ang ah, mai: mawh pui pa jah tix kham: mhai: sakse:, pa yaox pui, pa laig daux been ceucao: tix kham: ang ah, mai: mawh kawn: ceucao: tete phaoxka: daux ceucao: kawn: khrit pa koe: piang haktiex in ang ah heue. Mawh kheu nan: Petrux mawh jaong num: cie ceucao: heue. Petrux tag keud ka ceu in, pa viex daux (1 Petrux 2:5) yuh nin: "Pex kawx awm: simaox pa im: pa sum: tix yuh nyiex pa dex pa dawd mai: khwan:" heue. Kawn: khrit kukaux mawh simaox pa im: cie nyiex bwan: daux ceucao: khrit, mai: Petrux mawh simaox pa im: phaoxka:, mai: mawh jaong num: piang simaox pa im: khawm: uik heue.

(3) **Ceu lox sidiex pa krox**

Nawh Cao: dha: tix krai ka grawhgrawng: tag kham: geu: pa teei yum, khaix hoik ah Petrux pa mawh pa meh nin: ka nawh "Maix mawh Khrit Kawn: Siyiex pa im: ju heue" (Mathiex 16:21, Makux 8:31, Lukax 9:22). Yam mhong: Petrux ka lox an, mai: nawh lhat graung mai: ah nin: ka Nawh Cao: "Simiang eue, kieh grawhgrawng: ceu in singai khaing: Maix. Ceu in, ang doh mawh ka Maix tix bawg kawx". Yam an, mai: Nawh Cao: veeh mai: ah nin: ka Petrux "Satan eue, hu: plak khaix Aux" (Mathiex 16:22-23, Makux 8:32-33). Ceu pa sidiex Yesux awm: an kienie, lo tix nih nai sidawng: kheu mawh lox sidiex pa kied kin: heue. Phaoxka: jhak tix yaox ka grawng: Petrux, mai: khaix an, tom: deeh jhak ka grawng: Simiang Yesux tiru ha:

Ceu pa lhat graung Petrux koe: grawng: ra: ceu, kheu dha: Yesux Tix ,grux krai pa sang kham: geu: pa teei yum heue.

(k)Grawng: pa lhat graung Petrux kienie, mawh jao krax moh nawh

Petrux 13

heue. Jao rhawm: moh pa ting lhaong: nawh, mai: nawh tom: ang pon rieb pa sang kham: geu: Yesux pa teei yum piang khaoxlhak heue.

(kh) Ceu pa pao: (cawnya) Simiang Yesux, kheu kied tang: siyox mai: pa gau pa sawn: pa mhai:, pa yumrhawm: nawh laing laing heue. Daux lai Mathiex 16:13, Yesux chawk ka kawncaw Nawh khankix ah nin:, "Pui ah Kawn: kawn: pui mawh mawx?"

Daux lai Lukax 7:34,9:58, 19:10, mai: Makux 10:45, yaox shiao Simiang Yesux ka ceukaux pa tokaux Nawh mawh Kawn: kawn: pui lawx lawx heue. Ceukaux an, mawh Yesux pa ah nong: ang mawh, yam bawgyam sinax Camlik prim:, mai: Camlik khraox, daux lai tiem: pa rieb pui tom: nie, mai: pa moh pui tom nie khankix pa mawh phuk lai cie Enawk (Book of Enoch) kawx viex khawm: tix phuk heue. Daux phuk lai an, plak jhi: tix deuh ah nin: "Kawn: kawn: pui (Son of God), mawh Kawn: raoma:, mai: hoik dawg koe:, sivoe ang nyang bax phan: ka haktiex mai: mawh pui pa pau piang meung raoma, son pa ploi: hoek, pa mawh sonsang im: ju sinax kawn: pui ka daux pa khaw: caw alo Siyiex heue".

Daux leeing: lang: ju Petrux, keud sawn: Kawn: kawn: pui, mawh pa grum naog mai: siawp sibrawm, mai: keud sawn: Kawn: raoma: mawh pui pa chix yuh pui koeng khankix laux leeing: heue. Viang mawh nan:, yam in, Kawn: kawn: pui Yesux an, hoik dex dawd mai: khaoxlhak heue. Ka daux rhawm: Petrux ang doh pon rieb, grawng: ceu pa dex dawd pa koe: yuh nan: heue.

Ceu pa ah lung ah loi Petrux ka pa dha: Simiang Yesux tix grux krai ceu pa sang kham: geu: Tix krax kharhawm: kienie, mawh jao krax moh krax rhawm: Petrux piang Simiang Yesux heue. Ka grawng: ceu pa tag yaox tix kham: geu: awm: an, nawh ang sax pon keud daux rhawm: nawh, tix bawg kawx heue. Son nawh ceu in, mawh pa ang nawh doh pon yumrhawm: kah heue.

Daux lai Mathiex (16:23), "Satan eue, hu: plak khaix Aux", ceu pa blin: Yesux lox tix ka Petrux awm: an kawx, ex sawn: tix yaox ha. Ceu pa ah Simiang Yesux ka Petrux awm: an kienie, awm: pa plak jhi: daux lai Mathiex 4:1-11, mai: lai Lukax 4:1-13, kheu Petrux nyaw glaw ka Simiang Yesux baox tix bawg, awm: nyaw glaw phicaox ka Nawh Cao: daux tiag yam jah Nawh tix yuh kaing jhaw: heue.

"Tawx lox kieh simaox in, mawh khaomun", dee bleeh lox an kienie mawh ah nin: "Sonsang pon tix teei ka sijax mukheu pa kaux cong: kawn:

pui, nyaw glaw daux krax makmi haktiex”. Mai: “Kieh tokaux Tix rau sen:”, dee bleeh lox an kienie, mawh ah nin:, “Kieh pui khankix yaox siawp sibrawm: Maix, mai: nyaw kah liak. Mai: “Phan: Maix krub ka aux, tag mawh cie Maix khawm: uik”, dee bleeh lox an kienie mawh ceu pa nyaw ah nin:, “Hawt been haktiex mai: hawt krax haktiex” heue. Yam nyaw sonsang hawt ka krax pa sitoe: mai: siawp sibrawm, Simiang Yesux thiang: tete telai kheu sang hu: Nawh krax khaoxlhak heue. Daux veng Kesarix Philipux. Simiang Yesux baox caw tix yaox baox tix bawg, pa mawh ceu pa nyaw glaw awm: an, kheu krax moh krax rhawm: Petrux heue.

(4) Ceu pa lih tix hoek bawgyam pa thiang: Petrux

Bawgyam pa caox lih tix hoek ka piang Petrux heue. Grawhgrawng: nawh, bo: pa sang thiang: tix tik ka Nawh Cao: dex sang hoek heue. Daux lai Mathiex (26:31-35), Petrux kham: sijax mukheu ah nin: “Phan: aux tag yum tau mai: Maix kawx, ang aux doh thiang: tix tik tix vud Maix heue”. Daux sipeem: Kesasemanix. Petrux lawd vaid pa viex tix sonsang taoh ka Nawh Cao: heue (Yohan 18:10-11). Viang mawh nan:, yam ngawm Petrux greem: ka brawk nyiex cao: giex kaing: li, mai: bon: tix kaux hoek ka nawh ah nin:, “Maix kawx mawh pa ot tau mai: Yesux pui meung Galile: heue”. Viang mawh kawx nan:, nawh thiang: sivoie kix khawm: uik ah nin:, “Bon: eue, aux ang tawng Nawh” (Makux 14:66-75, Mathiex 26:69-75, Lukax 22:54-62, Yohan 18:25-27). Viang mawh kawx nan:, caw tix yuh satix ka grawhgrawng: ceu in, tix blah heue. Sonsang deuh phimap piang Petrux yie heue. Viang mawh nan:, yam to: yam prah kawncau khankix khawm: uik ka Nawh Cao:, mai: Petrux ca kawncau ot dee brawk nyiex cao: giex kaing: li heue (Mathiex 26:56, Makux 14:50). Pie daux pui pa grum naog, mai: rhawm: kua: kawx chix koe: awm: ceu pa iak riang Petrux heue. Daux grawng: pa iak riang iak rao awm: in, mawh ngie nawh tix kaux khaing: pa yaox tix hoek heue. Pui tang: kaux hoik dawg to: heue. Mai: grawng: ceu pa caw ex tix tawng lawx lawx kienie, daux ceu pa thiang: Petrux ang koe: grawng: tang: ceu, viang mawh nan:, mawh ngie ceu pa nih nai krao ka grawng: pa rug mawh Petrux heue. Phan: lai Makux mawh lox pa sidiex Petrux, lox sidiex pa kied moh Petrux kienie viang nawh ang kaux sijax piang Yesux kawx, mawh grawng: pa pluat ploi: Yesux phimap nawh, pa yuh ka mawx heue.

(5) Grawng: ceu pa ap Simiang Yesux beeh glawm pa ting ka Petrux

Daux lai khrit, krao ka grawhgrawng: deeh yuh Petrux paox pie tau mai: kawncau tang: kaux khankix, khaix hoik yaox Simiang Yesux tix yum heue. Grawng: in, mawh pa plak jhi: ka grawng: pa kied ting lhaong: rhawm: pa kua: nawh heue. Grawhgrawng: nawh, kheu hoik tawng kawncau tang: kaux khankix, ka grawng: pa hoik thiang: Petrux pa yuh ka mawx ka Simiang kix heue. Mai: pa laig daux simeeig ka:, mai: pui pa yaox pa yi simeeig kienie mawh Petrux heue (Yohan 20:6). Mai: pui pa yaox tix mhong: ka lox tawm: Simiang Yesux pa ting ceu (Makux 16:7), mai: pui pa yaox pa lih bleeh Nawh Cao: kawx, mawh Petrux heue (1 Kaw 15:5).

Pui tix kaux kawx ang doh tawng, daux rhawm: Petrux, pa kham: geu: nawh, pa yuh ka mawx heue. Viang mawh nan:, phimap pa khaw: tix ang doh pon pluat ploi: khankix, Petrux hoik yaox ka pa pon pluat ploi: Nawh Cao: ka tix heue. Ceu in kix, mawh pa ang lai chix keud ceu pa pon pluat ploi: Nawh Cao: heue. Otkhaix, dee toi: rawm: nhawng, lih tix hoek bawgyam, pa tawx beeh glawm: ka Petrux, sonsang liang yung: Nawh khankix heue (Yohan 21:15-17).

(6) Ceu pa ting lhaong: pa koe: daux rhawm: Petrux

Grawng: Petrux ang nyang bax uik. Kawncau sang baoc krao ka ceu pa ting lhaong: pa koe: daux rhawm: nawh heue. Daux lai kawncau phaoxka: tom: sidawng: yaoc ka mawh Petrux, cao: bung: kaing: kawncau khankix heue. Mai: Petrux mawh pui pa keud phaoxka: sonsang laug ka kawncau pa khraox, son deeh plud dee ot Yudax Isakariut, pa mawh pui pa tik pa vud Nawh Cao: heue (Kawncau 1:15). Mai: ngaix poi Pientekote kawx, Petrux mawh cao: bung: mai: mawh cao: pa sidiex ka ceucao: heue. Mai: nawh mawh pui pa jah tix sidiex ka lox bwan: gauxrhawm: gauxrhi: khriyan khawm: heue (Kawncau 2:14-40). Mai: Petrux mawh pui pa cox jhawm: saux, pa kaux Mhawm: Grang:, pa hoik laux caong, tom: yam ot ka daux vaig miex tix grai:, mai: Yohan heue (Kawncau 3:1-11). Mai: yam giex ka Petrux mai: Yohan, kheu ah kiex grawng: Simiang Yesux, pui pa kua tix pawk lox cao: giex kaing: li, mai: kuad song: mai: cao: tiem: lai khankix, mawh Petrux heue (Kawncau 4:1-22, 5:26-32). Mai: Petrux mawh pui pa sidiex gau ka pa kaux Simon (Simon Magus), pa koe: rhawm: kawc rhawm: vawc, pa ot daux veng an, yam hu: Petrux ka daux veng an, sonsang

jah tix krai ka lox bwan: gauxrhawm: gauxrhi: Simiang Yesux heue(Kawncau 8:12-25). Mai: Petrux mawh pui pa sidiex daux pa lhat pa graung: ka mex moeng ra: kaux, pa kaux Ananix, mai: Sapphirax pa lox krai ang khaw: tau, mai: pa koe: rhawm: ra: ceu heue (Kawncau 5:1-11). Mai: pa kieh pa kaux Enex, pa yum taix caong deeh moi mai: pa kieh pa kaux Dawka pa hoik yum, deeh kaoh im: kawx, mawh Petrux heue(kawncau 9:32-42).

Pa ting ceu, ka daux pa hoik yuh Petrux kienie, mawh ceu pa tawx akhwang ka pui pa ang mawh pui Yudax, mai: pa mawh pui tang: ceu tang: cat, pa kaux Kawnilix, pa mawh cao: giex kaing: naing, pui naing tix yieh kaux, laig ka daux cubcaw: ceucao: kawm: khrit heue. Pui Yudax khankix, mawh pui ceu pa laug Simiang Siyiex tix deuh heue. Kix kied koeng ka pui tang: ceu tang: cat heue. Sijax mukheu Siyiex kawx, kix ce: ang mawh son pui tang: ceu tang: cat heue. Lox bwan: gauxrhawm: gauxrhi: Siyiex, pa mawh krax taoh, mawh son pui kukaux daux pui, pui pa tawng pa yung: yuh nan: kienie mawh Petrux heue(Kawncau 15:7-11). Mai: sonsang pon laug pui tang: ceu tang: cat, sonsang paoh siviex ceucao:, pui pa paoh krax daux bang: kum: Jerusaliem kawx, mawh Petrux heue (kawncau 15:7-11). Kheu ceu pa yuh Petrux, pa sitioe: mai: grawhgrawng: Kawnilix, yuh ka mawx, ceucao: tom: yaox ka ceu pa ting ceu, awm: pa viex daux lai kawncau yuh nin: "Phan: mawh nan: ka pui tang: ceu tang: cat khankix kawx, hoik tawx ceu pa doh keud doh sawn: tom: pon ju pa im: heue" (Kawncau 11:18).

Daux Camlik khraox viex ka grawhgrawng: Petrux tom: sidah heue. Mai: nawh mawh cao: kaing: pa ao: min: daux pui Yudax, pa mawh ceucao: kawm: khrit heue. Viang grawhgrawng: nawh ang lai viex daux Camlik khraox kawx, daux been ceucao: didix, mai: daux lox krai kuad khankix dix, viex ka grawhgrawng: nawh tom: nie ceu heue. Daux been an:, Petrux sitioe: mai: dee ot loe: dah heue.

(1) Petrux mai: Antiuk sitioe: tix ot tau heue. Petrux kheu mawh nawh pa jah tix mawh sara ting, ka daux ceucao: Antiuk, nawh tom: yuh kaing jhaw: tan: aliah num heue. Mai: mawh dee pa jah tix krai lox bwan: gauxrhawm: gauxrhi: ka pui tang: ceu tang: cat, daux veng an, mawh kheu nan: phan: ang mawh Petrux pa mawh cao: kaing: ceucao:, ang doh lai pon mawh pui tang: kaux heue(Kawncau 11:20). Jah tix shiao ka ceukaux pa mawh khriyan heue(Kawncau 11:26).

(2) Mai: sitioe: mai: Petpix mai: Asix Maingna: (Asia Minor) khawm: heue. Ah nin:, daux Asix Maingna:, nawh krai lox bwan: gauxrhawm: gauxrhi: khaix hoik yuh nawh kaing jhaw: Siyiex daux veng Antiuk heue. Ceu in, ang doh pon ah heue. Grawhgrawng: nawh, phuk lai Petrux, mawh pa tiem: ka nyo sinie, can pa prung: prang: tix ot ka daux meung Pawntux (Pontus), meung Kalatix (Galatia), meung Kappadawkix (Cappadcia), meung Asix (Asia) mai: meung Bisunix (Bithynia) heue (1 Petrux 1:1).

Pa sitioe: mai: phuk lai Petrux phuk tix, ex yaox krax sugsak (sivix) tix ceu heue. Daux phuk lai an(5:13), mawh jao lox ghoik pa viex nin: "Ceucao: pa koe: ka daux Babulon" heue. Lox ngai: lai Babulon ex tawng yung: yuh ka mawx? Tete telai, pui pa koe: pingnya plak lai, pa tawng ka dee bleeh Babulon kienie, koe: ngie ceeix khaing: heue. Pa sidiex gau Petrux ka daux veng Babulon, ang doh pon mawh, ang doh pon ah, pa kaux Staxrita (R. H. Streeter) yumrhawm: ka yuh nan: heue. Ceu pa krai nawh kienie, pui ceu Yudax pa ot ka daux meung Palatinax khankix, koe: dee bleeh pa krox jun kix tix jhak plak krax Babulon heue. Yam giex Simiang Babulon ka pui Yudax khankix hu: ka meung Babulon nhaox, mawh pa laug ka pui pa cheung daux pui Yudax, mai: kix tom: nie an, ang lai bleeh khaing: meung an heue. Pui Yudax tete telai pa yumrhawm: ka beenli pui Yudax khankix, ot ka daux meung Mesopotemia (Mesopotemia) heue. Mai: ngaix poi Pientekote, pui pa viex ka daux carang, pa hoek kudah kudee khankix, mawh pui pa hoek khaing: meung Pathi (Partia), meung Mede (Media), meung Elam (Elam), meung Mesopotemia (Mesopotemia) heue. Mai: pa kaux Josephat (Josephus) pa mawh sara ting plak been, tiem: tix thut lai krax plak lox Arami (Aramaic) ka grawhgrawng: naing cie pui Yudax, sonsang nie lheu: pon pui Yudax bwanson, pa mawh pui ceu pa tokaux tix, pa koe: daux meung Babulon, mai: meung Mesopotemia, kheu pa nie sang tawx aye: ka Babulon heue. Been cie pui Yudax pa kied sidawng: pa plak jhi: kienie mawh been Yudax Babulon (Babylonion Talmud) heue. Phan: sawg cao: tiem: lai pa kied koe: pingnya cuyi, caw tix jhak plak ka Babulon, mai: yaox yuh nan: heue. Viang mawh nan: ceu pa krai Petrux lox bwan gauxrhawm: gauxrhi: tan:, pie ceeix kawx ang mhong: ka daux pa krai kuad kix heue. Babulon kienie grum rhawm: tix tawx krax keud tix, ah mawh veng Romax heue. Tete, ka daux lai plak Jhi: 14:8, 16:19, 17:5, 18:2), pa tiem: Babulon kienie mawh veng Romax heue. Mai: pa ao: min: plak

been, pa kaux sara ting Yusibia(Eusebius), mai: nawh yumrhawm: ka pa viex ka daux Petrux phuk tix 5:13, Babulon mawh Romax ang ah, mai: pui tom: nie krai nin: ka phuk lai in, tiem: daux veng Romax ang ah, mai: grawng: deeh tawx ceukaux Babulon mawh Romax ang ah, tiem: tix deuh daux lai pa mhai: cie beenli(Ecclesiastical History 2,15) heue. Yam keud kawm: khrit phaoxka: kix ka pa ting siawp sibrawm mai: pa hai: pa meeg veng Romax, mai: kix tom: kok mawh ju khraox Babulon, kheu awm: veng Romax tix Babulon dix heue. Ceu pa sidiex Petrux, daux Asix Maingna: tee: mawh heue. Viang mawh nan: pa hu: nawh ka Babulon, ang doh pon mawh heue.

(3)Ceucuo: phaoxka: khankix, grum rhawm: tix rieb,hoek Petrux ka veng Romax heue. Yam an, mawh num khrit been 61 num, mai: pui plaux nawh yum ka daux veng an heue. Grawhgrawng: pa ot Petrux ka daux veng an koe: been tom: nie ceu, daux krax pa laig rhawm: heue. Pa sidawng:, mawh pa plaux ka nawh heue. Grawhgrawng: pa mawh khankix an, mawh ang mawh, ang pon ah tete.Daux lai Kawncau 8:9-24, Petrux yaox ka Simon pa hoik sax sidiex nawh baow tix bawg, pa mawh pui pa kied cheung plak cuyi sibawk heue. Simon krai ka pa tokaux nawh hoik pon kieh kawnyawm deeh kaoh im: tete heue. Viang mawh nan:, Petrux plak jhi: ka mawh Simon, pui pa yaw ka pa tokaux tix heue. Simon keud tix jhi: ka siawp sibrawm pa tokaux nawh, kheu pa po: tix daux bhaung. Petrux rawg bwan: sonsang tawng pui khankix ka ceu pa pie pa lhen: nawh heue.

Yam coca Simon tix po: piang raoma: nawh rau piang tiex mai: yum heue. Daux veng Romax, pui pa hawt khaix nawh, koe: tom: nie heue. Kheu plak jhi: Petrux ka pa ting lox Simon, Petrux tom: lih tix koe: pui koeng tom: nie heue. Mai: lih tix koe: grawhgrawng: pa lheu: caox, khaing: an heue. Grawhgrawng: nawh, kheu lox sidiex Petrux, simoeng iak pon: kaux cie simiang Akrippax(Agrippa),lih tix tich loh tix mawh kawm: khrit heue.Ang joeng mawh ceu an, kheu lox sidiex Petrux, simoeng pa kied moh simiang Abinax(Abinus), pa kaux Zantixpi (Xanthippe) kawx hu: ka krax ju pa singax singeh heue.

Simiang Akrippax mai: simiang Abinax khankiex songrhawm: ka piang Petrux mai: tat rhawm: tix plaux ka Petrux heue.Paox grawm paox grux Petrux mai: ceucuo: tawx satix ka nawh heue.Sonsang baow tix pon

yuh kaing jhaw: Simiang Yesux, tawx krax keud sonsang to: nawh tang: dah heue. Yam lih Petrux khaing: veng Romax sonsang to: tix dux tix, nawh yaox daux riang susai, laig Yesux ka daux veng Romax heue.Mai: yam chawk Petrux nin: ka Nawh Cao: “Simiang eue, sang ah Maix tix hu: dee mawx lie?” Nawh Cao: deeh pawk mai: ah nin:, “Aux ah tix hu: ka veng Romax, sonsang plaux ka Aux heue”. Mai: Petrux baow chawk nin,“Sang kham: Maix tix yum, baow tix bawg lie?” Mai: Nawh deeh pawk mai: ah nin:, “Mawh heue, Aux baow yaow tix yum, baow tix bawg heue”.Mai: Petrux lih tix tawng laig Simiang Yesux ka daux veng Romax, sonsang klawm: khaoxlhak pa to: nawh heue (Acts of Peter 35). Mawh kheu nan:, Petrux kawx deeh laig ka daux veng, sonsang yum nawh heue. Sivoeng ngai: Petrux, plaux ka simoeng nawh, daux krax pa kied kharhawm: kharhi: heue. Grawhgrawng: an, ang jhak ang chix. khin: tix kieh ka Petrux jhak kah heue.Petrux pon tawx riangrao ka simoeng tix, sonsang doh keud ka Nawh Cao: heue (Eusebius Ecclesiastical History 3,30). Mai: cao: kaing: pa giex thawng, yam yaow nawh rhawm: kua: Petrux,kheu kied krox dauw rhawm: nawh, mai: nawh tom: rieb ka krax yumrhawm: kawm: khrit heue. Yam hoek bawgyam, sonsang plaux ka Petrux ka piang khaoxlhak, kheu ce: nawh tix ang keung tix yum, awm: pa tawk ka Simiang nawh ka piang khaoxlhak, mai: nawh tom: khyaox khaw: ka sonsang dang: dung ka pa tokaux nawh (Sonsang ot kaing: nawh plak greem:, mai: plaux nawh heue (Ecclesiastical History 3,1). Dee ghoik Petrux tawx ju tix son Simiang nawh ka dauw pa mhawm: pa mhiem: mai: ka dauw ceu pa rah pa see heue.

Daux Petrux tag koe: phimap tom: nie nhie. Viang mawh nan:, dauw nawh koe: krax moh krax rhawm: pa mhawm: jheeng jheeng heue. Mai: pui pa kaux Phara(F.W Farrar) ah nin: “Been pa mhawm: Petrux kienie, viang nawh som: tix vud tix vud kawx, nawh deeh pon teei rhawm: pa kua: tix, mai: pa rah pa see cie tix heue. Lukax kawx sonsang pon tix tawng, sidawng: mhawm: mhawm: grawhgrawng: pa thiang: Petrux ka Simiang Siyiex ghoik tix deuh awm: in “Simiang Yesux veeh, mai: jhak ka piang Petrux” (Lukax 22:61).Tix khiep ngai:, pa jhak Yesux, deeh kieh ka Petrux hoek dauw pa rah pa see, mai: dauw krax pa mawh pa meh heue. Ex kawx, caw tix rawgbwan: awm: in heue.

Yam yaow ex krax pa ang nhim: rhawm:, mai: yam dex sang goh ex, kheu ceu pa jhak ex Maix, kieh ka ex deeh cung rah see liak.

Lawg (3)

Yohan

Kawncau pa lih tix mawh pui pa koe: krax moh khaing:
kawn: toh sah

Yohan mawh pux Yakop, mai: mawh kawn: Zebedie: heue. Yam cox rub cie kix, Yesux kok kiex (Mathiex 4:21, Makux 1:19). Mai: Yohan mai: Petru, mawh paoxgrawm: pa meed paox tix. Grawhgrawng: nawh, Yohan mai: Petru, mawh pa yuh khaing: tau, dauk khaing: tei kax heue (Lukax 5:10). Yam lih kix khaing: nyiex sidiex veng Kapeniom, Yohan hu: ka nyiex Petru heue (Makux 1:29). Mai: yam dex sang hoek ka bawgyam pa ghoik, mai: Nawh Cao: ploi: Petru mai: Yohan, mai: ah nin: "Hu: mai: cox khre: Pasakha son ex, sonsang ih ex kah heue" (Lukax 22:8). Ka dauk Lai Kawncau, dauk ceuca: phaxka: mai: Petru mawh cao: kaing: dauk kiex yam yuh Petru mai: Yohan kaing tau heue. Khankiex an, awm: yuh kiex kaing tau dauk kaing tei kax, yam lih kiex tix mawh pui pa tei pui kawx yuh kaing tau heue (Makux 1:17).

Yam ang Yohan nyang mawh kawncau cie Simiang Yesux, tee: sang mawh kawncau cie Yohan baptis heue. Dauk lai Yohan yam yaox Yohan baptis ka Yesux mai: ah nin: "Jhak ka Kawn: Yung Siyiex heue". Mai: kawncau ra; kauk mhong: lox pa ah nawh, mai: kiex hawt Yesux heue. Ceukaux pa hawt khaix Yesux an, tix kauk mawh Andare, mai: pa tix kauk ang yaox ceukaux heue. Pui an kienie tee: mawh Yohan heue (Yohan 1:35-45). Dauk kawncau khankix, Petru, Yakop mai: Yohan mawh pa dex tix ot, tix koe:, tix yuh kaing tau mai: Yesux heue. Dauk kix Yohan mawh pa lheu: dex tix ot, tix yuh kaing, mai: Simiang Yesux heue.

Dauk lai khrit loe: phuk, bawg tix blah yaox ka Yohan tix kauk khaing: pa tang: gwieh mai: Yakop heue. Plak nie, Yakop mai: Yohan ang tang: gwieh tix ot ka paox tix, tix kauk lai tix kauk, mai: kiex grum rhawm: tix yuh kaing tau, mai: yaox yuh nan: heue. Dauk phuk lai kix an, yaox ka grawhgrawng: Yohan sidawng: heue. Ceu pa am: kienie mawh ceu pa ang pui tang: kauk tau tix moh ka ceu pa plak jhi: ka grawhgrawng: nawh heue.

(1) Yohan mai: Yakop lih tix simie tix ting lhaong: ao: min: heue Dauk lai Makux 10:35-45, Yohan mai: Yakop hoek dex ka Nawh Cao:, mai: rawg mhaing: ka sonsang tawx dee lhaong: dauk meung Nawh heue. Yam mhong: kawncau Nawh kao: kauk grawhgrawng: ceu an, kix songrhawm: ka Yakop mai: Yohan heue. Mai: Yesux gau sawn: ka rhawm: pa awn: pa tiem: pa kied lo kawncau khankix heue. Yam deeh krai Mathiex ka grawhgrawng: ceu an, ang tiem: rawg mhaing: Yakop mai: Yohan ka dee lhaong: an, viang mawh nan:, tiem: ka rawg mhaing: miex kiex ka son kiex heue.

Grawng: pa deeh loh tix tiem: ka grawhgrawng: awm: in kienie, kheu tiem: Mathiex khaix Makux been 30 num heue. Jah tom: yam an, pui khankix deuh kawncau khankix, mawh cao: bung: kaing: ceuca: mai: jaong num: ceuca: heue. Mawh kheu nan:, ceu pa tik ka satang pa tag sang kieh ka siawp sibrawm kawncau laux ang ah, mai: ceu pa kieh yhawm: ka krax ot krax koe:, mai: ceu pa nih nai krai lao ka grawhgrawng: pa mawh khankix ang ah, koe: dee bleeh heue. Mawh kheu nan:, Mathiex ang tiem: ka pa mhaing: tokauk cao: Yakop mai; Yohan ka dee lhaong: an, mai: tom: tiem: ka pa mhaing: miex kiex heue. Viang mawh nan: kawx, grawhgrawng: pa plak jhi: Makux, ex tag yaox tix sawn:, mawh grawng: pa mawh pa meh heue.

Ka dauk kawncau, dauk pa mhaing: dee lhaong: awm: in, tee: koe: ra: ceu heue.

(k) Yakop mai: Yohan tag lheu: lhaong: krax ot krax koe: ceeix, mai: tag lheu: mi ceu kraung khrai: ceeix, khaing: kawncau tang: kauk ka dauk lailing heue. Zebedie: pa mawh keeing: kiex mawh pui pa haok hwan:, tom: hoek tix pon vai pui cang: pui caing dauk kaing yuh nawh heue. (Makux 1:20). Mai: tokauk cao: kiex kawx, tag ce: tix ting lhaong: krax ot krax koe: khaing: kawncau tang: kauk heue.

(kh) Yakop mai: Yohan tee: mawh paoxnyiex paoxma: Simiang Yesux heue. Yam yaox Simiang Yesux tix yum, yaox ka carang sibon: khankix loe: ceu pa ot dex khaoxlhak heue. Dauk carang Makux viex yuh nin: "Marix Magadalax mai: Marix miex Yakop pa iak, mai: Yosiep, mai: Salom" (Makux 15:40). Dauk carang Yohan viex yuh nin: "Miex Nawh Cao:, mai: pux o: miex Nawh Cao:, mai: Marix moeng Kalaphax, mai: Marix Magadalax heue" (Yohan 19:25). Mai: dauk carang Mathiex viex

yuh nin:, “Marix Magadalax, mai: Marix miex Yakop mai: Yosie:” (Mathiex 27:56). Ceu kaux Marix Magadalax yaox viex daux carang khawm: uik heue. Marix miex Yakop mai: Yosiep, mai: Marix moeng Kalawphax kienie yaox tix tawng mawh tix kaux khaing: heue. Mai: sibon: pa kawm daig kienie mawh pux o: miex Nawh Cao: mai: mawh miex kawm: Zebedie: heue. Mawh kheu nan:, Yakop mai: Yohan mawh puxaik mai: Simiang Yesux heue. Daux rhawm: Yakop mai: Yohan, kheu mawh kiex puxaik mai: Simiang Yesux, kiex kawx ce: tix pon akhwang tix rawg mhaing: dee lhaong: daux meung Simiang Yesux heue.

(2) Yakop mai: Yohan mawh pui pa chix lih krax songrhawm: heue. Phan: jah tix hu: dee Galilie: tom: hoek ka Yesusalie m kienie yaox tix phat hu: ka meung Samarix heue. Pui Yudax kix ang yuh paox pie mai: pui Samarix kix heue. Mai: Yesux shiao ka krax in, yam hu: krax pa ghoik ka Yesuralie m heue. Mai: Nawh Cao: ploi: kawncau Tix hu: plak sivoe ngai: Nawh Cao: mai: kix hu: laig ka daux yaong: pui Samarix tix yaong:, sonsang cox sang khre: son Nawh Cao: heue. Mai: pui yaong: an, ang rieb tix teei ka Nawh Cao:, kheu Nawh veeh pakngai: Tix, sonsang hu: ka veng Yerusalie m heue. Yam kawncau Nawh Yakop mai: Yohan yaox grawng: in, kiex ah nin:, “Simiang eue, Maix koe: rhawm: tix kieh yiex nhie: ngu lih khaing: raoma: , mai: gleeing: kix. awm: pa hoik yuh Eliyax lie?” Viang mawh nan:, Nawh Cao: deeh veeh mai: ah ka kiex “Kawn: kawm: pui hoek sonsang plaux pui ang mawh, viang mawh nan:, hoek sonsang taoh pui heue (Lukax 9:51-56).

Mawh kheu nan:, Yesux sum: ceukaux khraox kiex Bawnaji, dee bleeh ceukaux an, mawh kawm: simex sinum praix heue (Makux 3:17). Mai: kiex koe: rhawm: kua, mai: yie lih tix songrhawm:, mai: phai: tix salao raw ka pui tix kaux heue.

(3) Daux lai khrit loe: phuk, yaox tix phat ka ceu pa plak jhi: grawng: Yohan tix kaux khaing: tix bawg ngie, mai: rhawm: nawh kienie yaox ka ang pon gun yeung, mai: yaox ka ang chix jhak plak mhawm: heue.

Yohan ah nin: ka Nawh Cao: “ Simiang eue, ex yaox pui tix kaux, pa grheu: phicaox lih ka daux ceukaux Maix, mai: ex kieh nawh, kheu ang nawh hawt tau mai: ex heue”. Viang mawh nan:. Yesux ah nin: ka nawh “Paw vi kieh nawh, mawh kheu pui pa ang ot plak pui koeng ka pex, ot

plak pex heue (Makux 9:39-40, Lukax 9:49-50).

Phan: jhak tix yaox ka Yohan, tag yaox tix ce: ka nawh yuh nin:, “Yohan simie tix ot dee lhaong:, mai: ting rhawm: ting rhi:, mai: mawh pui pa ang chix jhak plak pa mhawm: heue”.

Daux lai khrit loe: phuk, yaox ka ceukaux Yohan tix vud tix vud, viang mawh nan:, daux lai Yohan ang yaox ka ceukaux Yohan tix bawg kawx heue. Viang mawh nan:, daux lai Yohan in, viex ka kawncau pa moh Yesux heue (Yohan 14:23). Daux bawgyam pa hoik luan didix, kawncau pa moh Yesux kienie mawh Yohan, ang koe: krax pa ang yumrhawm: heue. Viang mawh nan:, ba ox ju yam in, kawncau pa moh Yesux, koe: krax tang: lox siyox moing ka pa ox tix ka grawng: mawh, ang mawh Yohan heue.

Daux krax pa laig rhawm:, phan: sawn: tix yaox ka ceu pa plak jhi: mai: rhawm: keud kienie.....

(1) Kawncau pa moh Yesux ang mawh pui pa im: ju ka piang haktiex, viang mawh nan:, mawh ngie pa yuh ka pui tix kaux daux rhawm: keud, sonsang jhak mai: hawt tix yuh been pa mhawm: nawh mai: ah yuh nan: heue.

(2) Kawncau pa moh Yesux ce: mawh Yudax Isakariut, mai: ceu an ce: mawh pa am: heue. Mai: ah kaux kaux cong: cong: yuh nin: “Mawh ngie Yudax Isakariut tix kaux khaing: pa tawng rhawm: Yesux mai: pa yuh Yudax Isakariut mawh pa teem: coi ka kaing jhaw: pa yuh Yesux heue. Mai: pa ah, pon krax nyawm: rhawm: (Makmi) khaing: pa tawng pingnya, pa mawh daux pui pa tieb ka been (Gnostic Sect), pa mawh pa gwieh khaing: beenli khrityan kienie koe: lai Yudax Isakariut tix phuk heue. Pui khankix an, deuh ka Yudax Isakariut mawh pakpeung pa mhawm: cie Nawtstix khankix mai: deuh Yudax Isakariut mawh tix kaux khaing:, pa tawng rhawm: Yesux, mai: mawh pa teem: coi ka ceu pa yum Yesux heue. Mai: pa viex daux lai Yohan 13:21-30, kawncau pa moh Yesux, mai: Yudax Isakariut ang doh mawh, tix kaux khaing: heue. Pui ra: kaux an, ang awm: pa ox tix, tix kaux lai tix kaux, mai: tang: tix yaox sidawng: heue.

(3) Pui Isarilax tete, pa ang chix pie chix lhen: pa mawh Nasanilax ce: mawh kawncau pa moh Yesux heue (Yohan 1:43-51).

(4) Pui pa awn: ju tix kaux, pa hawt khaix Nawh Cao:, pa koe: man: vhua: tix pheem:, yam giex kix nawh pa prah man: vhua: nawh tan:, ah

mawh kawncau pa moh Yesux heue(Makux 14:51).

(5) Kawncau pa moh Yesux, ce: mawh Lazarux heue. Grawhgrawng: nawh, yam kraik ka grawhgrawng: Lazarux, kheu plak jhi: Simiang Yesux krax moh tix ka Lazarux, loe: bawg heue(Yohan 11:3,5,36).

(6) Kawncau pa moh Yesux tee: mawh cao: mi heue. Grawhgrawng: nawh dauh lai Makux (10:21) ah nin: “Yesux jhak ka kaw an, mai: moh nawh” heue. Grawhgrawng: pa sitioe: mai: cao: mi an, koe: phuk lai tix phuk pa tiem: mai: krax keud tix heue. Dauh phuk lai an, Otkhaix cao: mi an tieh loh rhawmrhi: tix, mai: appong tokauh tix ka Simiang Yesux, mai: lih tix deeh mawh pui mhawm:, mai: kieh Yesux mai: kawncau khankix, yip shiao ka lawg pa ting plak piang cie nyiex nawh, sonsang ih poi Pasakha heue (Makux 14:4). Mai: nawh viex dauh priex bo: pa ghoik, mai: mawh pui pa ngawm neung piang naok Nawh Cao: heue. Mawh kheu nan:, kawncau pa moh Yesux tag mawh cao: mi an heue.

Grawhgrawng: ang Yohan pon mawh kawncau pa moh Yesux kienie mawh kheu tang: rhawm: pui an, ra: kauh heue. Yohan simie tix ot dee lhaong:, mai: ting rhawm: ting rhi:, mai: ang koe: krax caoxrhawm: heue. Mai: kawncau pa moh Yesux mawh pui pa chix moh heue. Viang mawh nan: awm: pa ce: kuad khankix kix, ex rieb ka kawncau pa moh Yesux mawh Yohan heue. Kheu tieh loh Simiang Yesux ka simex sinum praix, lih tix deeh mawh, kawncau pa chix moh heue.

Dauh Camlik khraox, jhak tix yaox ka pa plak jhi: grawng: kawncau, pa moh Yesux mawh pa yuh ka mawx ha:. Didix, yam yuh poi pa ih pa un:, pui pa ih priex khankix ot tix nyat caong tix, mai: nyat tokauh tix ka piang ku: tiem: (plak Man kupit) heue. Mai: kix du taix khawn: gwieix tix, mai: ih priex ka taix khawn: dawm: tix heue. Dauh priex bo:, kawncau pa moh Yesux, kheu ah mawh pa neung ka piang naok cie Yesux, mawh kheu nan:, pui an, yaox tix koe: plak taix khawn: dawm: cie Yesux heue. Mai: mawh pui pa Petruh yib taix ka nawh, sonsang chawh ka Yesux, mawh pui mawx, pa tik pa tawx ka Nawh heue(Yohan 13:21-25). Mai: Simiang Yesux tawm: lox ka kawncau pa moh Nawh, sonsang jhak ka miex Nawh heue(Yohan 19: 26-27). Mai: dauh ponngawb caocao, pa hoek phaoxka: ka dee simeeig mawh kawncau pa moh Yesux heue(Yohan 20:10-10). Mai: yam plak jhi: Yesux ka pa tokauh Tix ka kawncau pa ot

dex rawm: nhawng:, kawncau pa moh Yesux ot tan: heue. Kawncau an kienie mawh pa kham: mhai: sakse: grawhgrawng: ceu in khankix, pa tiem: ceu in khankix dauh lai Yohan heue (Yohan 21:24).

Ka: ang nyang nawx, grawhgrawng: Yohan, dauh Camlik khraox, baoh koe: pa thien thie: ceeix heue. Dauh lai Yohan (18:15-16) viex yuh nin: “Simon Petruh mai: kawncau tang: kauh tix kauh, hawt hu: khaix Yesux heue”. Yam hoik giex tix phyawh Yesux, yam viex kix Nawh hu: ka cao: giex kaing: li, Petruh mai: kawncau tix kauh, sonsang tawng grawhgrawng: khankix, mai: hawt khaix Yesux heue. Kawncau ra: kauh tix kauh an, kheu meed mai: cao: giex kaing: li, mai: nawh tom: pon akhwang tix laig ka dauh sipeem: cao: giex kaing: li heue. Grawhgrawng: ceu pa meed Yohan mai: cao: giex kaing: li, paoh tix kienie awm: plak greem:, ka dauh ceu ting ra: ceu, tee: mawh ka tix ceu ceu heue.

(1) Num khrit (190), dauh lai pa tiem: Pawlikrati: (Polycrates), pa mawh cao: bung: kaing: veng Efesux kienie tiem: tix deuh ah nin: dauh lai mhai: beenli “Yohan pa mawh pui pa neung piang naok Yesux, kheu mawh nawh cub cao: giex kaing: li, pa yuh ka ceu pa sidiex, mai: ceu pa kham: mhai: sakse:, mai: nawh tom: ceep graung khrai: cie cub cao: giex kaing: li khankix heue.” Phan: pa tiem: Pawlikrate: rug mawh tete, ang doh nu sonsang laig Yohan dauh sipeem: cao: giex kaing: li pa ting kheu meed Yohan tix cao: giex kaing: li pa ting heue(Eusebius, Ecclesiastical History 3,31).

(2) Pa plak jhi: ra: ceu tix ceu kienie lheu: tix pon mawh heue. Dauh phuk lai pa tiem: Mawtang(H.U.Monton), pa mawh “Rhoi caong cie Khrit”(in the steps of the Master), plak jhi: ka ceu pa caw tix mhai: pa koe: krax pa laig rhawm: heue. Plak khaix veng Yerusaliem dauh krax tix mu:, koe: nyiex iak tix mu: heue. Yam in, hoik mawh shiang rawm: teeh cie pui Arab heue. Dauh nyiex iak an, ka: dix, pon tix yaox ka makut pa max khaing: nyiex bwan: cie kawm: khrit heue. Dauh pa kraik cie been Frisikin (Franciscan) kienie ah nin:, “Dee ot nyiex Zebedie: keeing Yohan sum: ka nyiexbwan: tix lhang: heue”. Pa lox kraik cubcaw: kix an, mawh nin: “Nyiex ma: Zebedie: baoh gwieh ka shiang tix mu:, kheu mawh kix cao: teei kax khaing: Galilie: heue. Mai: nyiex cao: giex kaing: li pa ting kawx kix coh ka kax, yam coh kix kax khaing: shiang an heue.

Ceu an. plak jhi: ka ceu pa meed cao: pau siviex cie cao: giex kaing: li pa ting. mai: Yohan ka paox tix heue. Kaing jhaw: Zebedie: kheu haok hwan: sidawng: tix yaox ka ang joeng mawh kawn: simex nawh khankix. mai: pui cang: pui caing kawx pon vai khawm: heue(Makux 1:20).

Daux lai khrit, yam phat ka grawhgrawng: Yohan, yaox pakpeung pui tix kaux pa vaorhawm:, lih tix mawh cao: pa chix moh daux greem: tawm: taix Simiang Yesux heue.

Daux lai Yohan kawx, Yohan mawh pui pa ao: min: tix kaux heue. Viang mawh nan:, nawh ang krai lox tix gum kawx, Yohan mai: PetruX mawh kiex pa ot tau lawx lawx, mai: ka daux kiex, PetruX mawh pa bung: tix krai lox heue. Mai: yam cox jhawm: saux pui tix kaux, pa laux caong, pa ot dex siviex nyiex bwan: ku ngaix, pa kok mawh pa " Mhawm: Grang" moi, PetruX mai: Yohan ot tau heue (Kawncau 3:1-10). Mai: Yohan ot tau mai: PetruX, yam krai PetruX, lox bwan: gauxrhawm: gauxrhi: sivoe ngai: cao: giex kaing: li, yam giex kix kiex heue (Kawncau 4:1-22). Mai: Yohan hu: tau mai: PetruX ka veng Samarix, sonsang jhak tix yaox ka pui veng Samarix, pa rieb ka lox bwan: gauxrhawm: gauxrhi: Siyiex, kheu kham: Philipux tix mhai: sakse: heue (Kawncau 8:14). Mai: daux lai Kalatix 2:9. Pawlux plak jhi: ka grawng: mawh Yohan tix cao: bung: kaing: ceucao: kawn: khrit heue.

Daux Camlik khraox hoik uik grawhgrawng: Yohan heue. Sonsang lheu: tawng ka grawhgrawng: nawh, pon tix gau sawn: ka daux lox krai kuad khankix, mai: ka daux been khankix heue. Plak khaix grawng: Yohan kienie mawh been pa keud daux rhawm: tix plak nie heue. Viang mawh nan:, grawng: pa rug mawh kawx koe: heue. Daux grawng: an khankix, sidu mai: grawng: Yohan, pa plak jhi: khaing: Camlik khraox heue. Yesux tawm: lox ka Yohan sansang priex ka miex Nawh Cao:, mai: Yohan kaux sijax mukheu mai: hawt tix yuh ka lox tawm: Yesux heue (Yohan 19:26-27). Jah tom: yam an, Yohan viex miex Nawh Cao: ot mai: tix ka daux nyiex nawh awm: kawn: pa lih kiex, daux veng YerusalieM heue (Nicephorus The Ecclesiastical History 2.2). Khaix hoik yum miex Yesux, Yohan tom: hu: ka veng Romax heue. Yohan yaox tix kham: geu: krax tuktiak tukte: ka daux veng an heue. Mai: taing tix sau: ka Yohan daux bee koek, ka daux aw: (Khang) ting, pa kied ting heue (Tertulison De Proascriptione, 36).

Mai: kuad didix kix ah nin: "Viang mawh nan:, Yohan ang hax, mai: yam luat luan: nawh khaing: an, lheu: singax khaing: phaoxka: heue. Mai: kawn khin: ka Yohan nyaux ka rawm: cai: heue. Viang mawh nan: Yohan ang yum, mai: ang yaox tix kham: geu: pie ceeix kawx heue .

Otkhaix, grheu: Yohan hu: ot ka daux klawn: tiex, pa kok mawh Patmo, mai: yaox tix tawng yuh nan:, daux lox pa krai kuad ju didix khankix heue. Yam an, mawh yam kwang simiang Domitia (Domitian) heue. Yam hoik kuad nawh khaing: klawn: tiex Patmo, mai: nawh hu: ka veng Efesux, mai: lih tix dech mawh cao: bung: kaing: pa ao: min: tix kaux daux ceucao: Efesux heue. Grawhgrawng: pa mawh nawh khankix yam an, mai: lox pa krai kuad khankix, sidu mai: jhawm: koe: nawh heue.

Daux veng Efesux koe: pui tix kaux, pa kaux Sarinta (Cerinthus), pa koe: krax lhak krax haing: plak been pa caox heue. Mai: nawh mawh pa rieb ka been Dositit (Docetist) heue. Nawh gau nin: ka pui tibleh "Simiang Yesux ang mawh nham: mai: kaux, mai: ang mawh nex mai: kaux, viang mawh nan:, mawh ngie khwan: pa ot tix lailing awm: jung pui heue". Been in, chix pon yuh ka krax yumrhawm: kawn: khrit laux heue. "Gumlox hoik lih tix mawh nex", pui pa yumrhawm: yuh nan: yaox tix lih khaing: ceucao:, mai: yaox tix kham: krax nunai: heue. Daux pa krai Airineta (Irenaeus) mawh nin: "Daux tix singaix, daux veng Efesux, yam liag Yohan daux lawg heem: rawm: tix mu:, sonsang heem: tix daux lawg an, Yohan ah nin: yam tawng nawh hoek Sarinta " Ex to: dee klawd ex, nyiex bang: in, tag ah tix khrup, kheu koe: pui koeng pa rah pa see daux lawg heem: rawm: in heue".

Krax ting rhawm: ting rhi: Yohan pa koe: phaoxka: nhaox, ang grai: tix bawg kawx heue.

Grawng: pa mawh daux veng Efesux, pa mhong: khaing: pa krai pa kaux Klimix, pa ot daux veng Alezadre (Clement of Alexandria) kienie, tix bawg dix, yam hoek Yohan ka daux bang: kum: ceucao: tix mu:, daux bang: kum: an, nawh yaox ka kawnyawm tix kaux, pa koe: krax nab krax yam:, pa rhawm: koe: riangrao, mai: pa kied mhawm: grang tix yaox heue. Mai: Yohan jhi: gien tix ka kawnyawm an, mai: tawm: lox ka cao: bung: kaing: daux bang: kum: an, mai: ah nin: "Aux kied viexrhawm: tix tawx ka kawnyawm in, ka daux tawm: taix maix, sonsang priex maix ka nawh, mai: deuh mhai: sakse: ka Yesux, mai: ceucao: in heue " Yam an cao: bung:

kaing: tawx sijax, sonsang priex ka kawnnyawm an heue. Mai: cao: bung: kaing: an, sidiex gau ka kawnnyawm an, mai: priex tix eei: nawh, daux nyiex tix heue. Otkhaix tawx baptis ka nawh heue. Yam yhawm: pa priex cao: bung: kaing: ka kawnyawm an, kawnnyawm an, kox yuh paox pie mai: paoxgrawm pa ang mhawm: been heue. Mai: paoxgrawm an khankix, nyaw ka kawnnyawm an viexrhawm: ka daux krax gauhrhawm: haktiex, mai: gau nawh mawh pui tud pui rhim: heue.

Mai: kawnnyawm an, lih tix pon ju pa hai: pa meeg, tix ngaix hoik tix ngaix heue. Awm: brung pa naog mai: riangrao pa nu tix sidiex, mai: pa kiied ka maox tix, mai: pa lud krax hu: tix, mai: pa sau: riang tix to: ka daux tiag daux tu yuh nan:, mai: kawnnyawm an kawx hu: singai khaing: krax moh krax rhawm: Simiang Siyiex heue. Mai: nawh sum: cubcaw: pui tud pui rhim: mai: nawh lih tix mawh cao: bung: kaing: cubcaw: an heue. Cubcaw: pui tud pui rhim: an, lih tix mawh cubcaw: pa kied tuktiak tukte:, mai: pa kied hai: kied meed, mai: pa kied plaux ka pui heue.

Yohan baox hu: baox tix bawg ka ceucao: pa koe: kawnnyawm an heue. Yohan ah nin: ka cao: bung: kaing: “Deeh tawx ceu pa tawx aux ka maix priex nhaox, sivoengai: ceucao: maix liak”. Yam an cao: bung: kaing: kied daox deng kah. Mai: cao: bung: kaing: ce: Yohan ah ka ceu pa priex mau heue. Yohan deeh ah sidawng: grawng: mhaing: nawh ka khwan: ju kawnnyawm an heue. Mai: cao: bung: kaing: kraik grawng: hoik yum kawnnyawm an, daux pa lauxrhawm:. Mai: Yohan baox chawk ah nin: “Yum pa yuh ka mawx?” Cao: bung: kaing: deeh pawk mai: ah nin: “Kawnnyawm an hoik yum khwan: ju son Siyiex”. Mai: cao: bung: kaing: baok kraik mai: ah nin: “Kawnnyawm an, to: tix luan khaing: krax moh krax rhawm: Siyiex, mai: nawh mawh cao: kaing: pui tud pui rhim: heue”. Kheu kied lauxrhawm: Yohan, nawh riah ka kraung ceep tix, mai: nawh raw mai: ah nin: “Aux ap khwan: ju puxaik ex tix kaux ka maix, sonsang priex mhawm: mhawm: heue”.

Yohan vai pui thong: krax tix kaux, mai: brug brung, mai: lih hu: khaing: nyiex bwan:, sonsang sawg ka kawnnyawm an heue. Yam dex hoek ka dee ot pui tud pui rhim: khankix, cao: pau daux pui tud pui rhim: tix kaux giex ka Yohan heue. Yohan ang coca sonsang klawd tix heue. Mai: Yohan khyox sonsang viex nawh hu: ka cao: bung: kaing: kix, kheu hoek nawh son an heue. Pui tud pui rhim: kawx, viex Yohan hu: ka cao: bung:

kaing: kix heue. Yam yaox cao: bung: kaing: ka Yohan, mai: nawh to: kheu kied lhat nawh, mai: kheu kied kaig nawh heue. Mai: Yohan kawx piawm: ka pa hoik kuad tix. mai: to: tix hawt khaix cao: bung: kaing: an. mai: yo lox mai: ah nin: “Kawn: moh aux eue, yuh ka mawx maix to: khaing: keeing: tix, pa ang giex kraung naing mai: pa hoik kuad, mai: pa lauxrhawm: ? Caoxrhawm: ka keeing: maix liak. Paw lhat ka keeing: maix. Kawn koe: pa krox jun son ju maix. Aux ka kraik krax ot krax koe: maix, mai: pa rug mawh maix ka Simiang Yesux. Phan: lo tete. awm: yaox Simiang Yesux tix yum son phimap ex, mai: aux kawx yum ka son phimap maix. Paw to: yumrhawm: ka aux liak. Simiang Yesux kieh aux hoek ka maix heue”. Mai: yam mhong: cao: bung: kaing: pui tud pui rhim: lox an. nawh tik ka kraung naing tix, mai: lhat graung: , mai: roik rawm: ngai: heue. Kawnnyawm an, laux rhawm:, mai: doh keud doh sawn: ka phimap tix heue. Yohan rawgbwan: mai: nawh mai: deeh kok ka nawh hu: dee koe: ceucao: heue. Mawh kheu tieh loh Yesux khrit ka rhawmrhi: kawnnyawm an, dee ghoik lih tix deeh mawh cao: bung: kaing: ceucao: heue (Clement of Alexandria, the Rich Man’s Salvation 42).

Pa lheu: khaing: grawhgrawng: an, ang lai koe: lox phektiex:, mai grawhgrawng: pa kieh rhawmrhi: Yohan sidawng: heue. Daux grawhgrawng: in, sonsang sidawng: min: plak ngai: Simiang Yesux, Yohan plakjhi: ka krax moh krax rhawm: khaing: pa sang lih tix songrhawm: heue.

Mai: kawm koe: grawhgrawng: Yohan daux pa kraik kuad khankix heue. Phan: nih nai kraik lao ka pa kraik pa kaux Jon Kasia (John Cussion) grum grum naog naog kienie....

Tix bawg dix. Yohan pa grum naog mai: bwanson:, yam jawg nawh tix pupe: ka sim: tix mu: ka taix tix. mai: yaox ka hoek pui tix kaux, sonsang hu: hawt tiag. pa mawh pui pa grum naog daux krax lhat krax haing: heue. Yam yaox nawh ka Yohan pa ao: min: tix kaux, pa viexrhawm: tix gauhrhawm: mai: pa ang keung tix yaox yuh nin:, nawh kied daox am: mai: chawk nin: ka Yohan “Kheu ao: min: maix, pa simie kieh rhawm: aux koe: tix sang yuh paoxpie mai: maix, pa kaux Yohan mawh maix lie? Yuh ka mawx, maix ot tix gauhrhawm: ka daux pa ang keung: tix yaox yuh nin:” Mai: Yohan deeh tix chawk nin: ka nawh. “Daux taix maix giex maix pa tix lie?” Pui an deeh pawk nin: “Mawh ak heue”. Khaix an Yohan deeh ah nin: ka nawh “Yuh ka mawx, maix phex ang vaik ka ak tix ku bawg lie?” Pui an deeh ah nin:

“Phan: vaik ka ak tix ku bawg, ceu pa cong: khankix tag yhawm: tix hu: heue. Mawh kheu nan: phan: vaik ka ak tix ku bawg, ang doh lai pon tix sau: riang tix puing ka totiag totu ka te: heue.” Yohan ah nin: ka nawh “Paoxgrawm eue, awm: an aux kawx laux lee: ka rhawm: tix, tix vud khaing: grawhgrawng: kaing pa ting lhaong: heue. Grawhgrawng: in paw tix kieh mawh pa nieb yuh ka rhawm: maix liak, Kheu hoik taug mao aux ka daux kaing pa ting ceu khankix ku bawg, phan: ang sau: riangrao pa khraox ka daux pa laux lee: tix, tix vud daux pa gauxrhawm: kienie rhawmrhi: aux tag yhawm: tix hu: mai: ang doh pon yuh ka beeh glawm: pa kied ting ceu heue” (Conférenus 24,21).

Daux pa kraai pa kaux Jerom (Jerome) ka grawhgrawng: Yohan baox tix ceu kienie daux veng Efesux, yam Yohan ot tom: riex ju tix, mai: kawncau nawh khankix, yaox tix klawm: tix tawx nawh hu: ka nyiex bwan: heue. Daux krax rawgbwan:, Yohan ang lai pon tix sidiex ka lox tang: ceu, lheu: khaing: lox ah nin: “Kawn: sibon: kawn: simex aux eue, moh ka paox tix tix kaux lai tix kaux awx.” Yam mhong: kawncau nawh, mai: cao: bung: kaing: ceucao: khankix ka lox an ku bawg, kheu hoik nieh kix ka mhong: tix, mai: chawk mai: ah nin: ka nawh, “Sara ting eue, yuh ka mawx, maix phex ah lox in ku bawg lie?” Yohan deeh pawk lox mai: ah nin: “Lox in tix gum, hoik grum naog sonsang yuh ka khawm: uik heue” (Commentary on balations 6,10).

Daux pa ghoik. Yohan sidiex ngie krax moh krax rhawm:, mai: piawm: ka tang: ceu heue.

Yam hoik yum Yohan, sipaung: ka nawh daux tiex heue. Viang mawh nan:, ah kawn im: Yohan daux simeeig heue. Pa kaux Augietstin (Augustine) ah nin: “Bhauang: pa toek Yohan jhi: yaox ang yum, grawng: kawn im: nawh, kheu kieh ka phawng: tiex, pa ot piang simeeig vung viang heue”. “Ka ceu an, ang lo tix thiang: heue. Awm: can ceu pa kraai yuh nan:, mawh ang mawh, pui pa tawng ka simeeig Yohan an, simie tix kieh hu: jhak kah heue. Can ceu in, viang aux kawx mhong: khaing: pui pa yaox aux tix yumrhawm: heue” (Thactates on John 124,1).

Ka pui tix kaux, kheu yip shiao Yesux ka riangrao nawh mai: rhawm: pa koe: nawh, pui an, lih tix mawh pui pa ting lhaong: tix kaux, pa jhi: yaox sakse: pa kied mhawm: kienie mawh Yohan heue. Riangrao ang koe: plak mawx, viang mawh nan:, mawh pa chix mhong: heue. Hawt ka pui pa

chix shiao ka riangrao, jhak heue, kieh mawh pa mhawm: (a) pa caox heue. Daux Yohan koe: riangrao jheeng jheeng heue. Raingrao an, yam Yesux kwang mai: shiao kienie lih tix klao: tau mai: krax moh krax rhawm: mai: kied lih tix haok hwan: ting lhaong: heue.

Lawg (4)**Andare****Pa viex pui tang: kaux hoek ka Yesux**

Andare mawh pui pa viex ka pui tang: kaux hoek ka Yesux heue. Daux veng Rasix, mai: meung Greg, mai: meung Skotilan khankix deuh ka Andare mawh pui pa singax singeh pa pau kix, daux been pa ang koe: ka kix heue. Daux Camlik khraox plak jhi: ka grawhgrawng: nawh cceix khaing. Viang mawh nan:, daux Camlik pa viex ka grawhgrawng: nawh, sidawng: kieh yaox mawh nawh pui pa yuh ka mawx heue.

Andare mawh pui veng Biesedax (Yohan 1: 44). Yesux kok nawh sonsang mawh pui pa teei pui, yam nawh ploi: rub ka daux nhawng:, kheu mawh nawh pui pa teei kax heue (Makux 1:16-18, Mathiex 4: 18-20).

Yam jah, Andare mawh pui cau Yohan cao: baptis. Mai: daux pa kraih Yohan yaox tix tawng, grawng: mawh Andare mai: Yohan pa jah tix sitioe: ka Yesux heue. Andare mai: Yohan jah tix yaox ka Yesux, yam ah Yohan baptis nin: “ Jhak ka Kawn: Yung: Siyiex heue” (Yohan 1:35-39). Kawn: khrit ceucao: ka: didix khankix, sum: ceukaux Andare mawh Protokletox (Protokletos) heue. Yam tawng Andare dom: mawx dom: an ka Simiang Yesux, mai: nawh sawg puxke: tix Petru, mai: tawx hoek ka Yesux heue. Mai: Andare ot tau mai: Petru (Makux 1:29). Daux leeing lang: ju nawh, nawh gwieh tix shiao ka can ceu khawm: uik tau heue. Yam in kawx, nawh simie tix kieh puxke: tix pon tau mai: tix, ka sinngao pa kied mhawm: pa yaox nawh heue.

Grawhgrawng: in, rhawm: pa mhawm: Andare jah tix lih heue. Ang rheung:, Petru lih tix mawh cao: bung: kaing: daux kawncau. Mai: Petru, mai: Yokop, mai: Yohan mawh khawncau pa kied meed mai: pa yaox tix ot dex mai: Simiang Yesux heue. Yam pa kied ting ceu khankix, kix loe: kaux ot tix koe: tau mai: Simiang Yesux heue. Awm: pui loe: kaux an, viang Andare ang mawh kawncau pa yaox tix ot dex mai: Yesux kawx, bawg tiblax, nawh viex tau mai: pui loe: kaux an, yam chawx ka grawhgrawng: pa tag sang mawh ka Yesux, kheu ang nawh singai mai: Nawh Cao: heue (Makux 13:3). Ang joeng mawh an, yam jhi: ka Andare, pui ah “ Andare pux Petru” kah heue. Daux lai Mathiex (10:2) mai: lai Lukax 6:14, daux

pa viex carang kawncau ah. “ Andare pux Simon Petru” ka Andare, mai: yam plak jhi: grawng: viex Andare ka kawncawm tix kaux hoek ka Yesux, pa mawh daux lawg pa eei: Yesux ka pui phwan: rheng: ang ah, yaox plak jhi: “ Andare pux Simon Petru” ka Andare heue. Phan: keud kienie pui tom: nie ang tau tix tawng ka Andare, viang mawh nan:, pui ku kaux tawng ka Petru mhawm: mhawm: heue. Yam plak jhi: ka Andare mawh pui pa yuh ka mawx, phan: plak jhi: mawh pux Petru pa ao: min: kienie mawh pa kied khaw: heue. Mawh ngie pui tux khaing: pa pon gun yeung ka awm: pa mawh Andare, daux pa mhawm: rhawm: heue. Daux kawncau pa jah tix sitioe: mai: Yesux. Andare kawx viex daux kix ang mawh lie? Vaing mawh nan:, mawh ngie Petru pa ao: min:, mai: pui kok ngie Andare pux Petru” ka ceu kaux Andare heue. Daux pui tux pa ang laux rhawm:, son yaox tix ot ra: dee tix dee, jhak heue. Andare kawx viex heue. Pie daux ceucao: kawx, ex ce: tix keung: khaw: tix pon dee lhaong: mai: pui pa koeng ka pui pa pon ceu an kawx koe: tom: nie heue. Pui mawx pon dee lhaong: ang ah, daux pui pa ang yuh tix tawng, Andare kawx viex heue. Rhawm: pa simie nawh tix ceu khaing: kienie mawh ngie sonsang yaox tix ot dex mai: Yesux heue. Son Andare mawh ngie pa hoik kaing, pa ting ceu, mai: son pon ceukaux pa mhawm:, mai: pa ang mhawm: kienie ang ting ayie:(ceu) heue. Pui pa awm: Andare yuh nan, ang chix pon dee lhaong: heue. Viang mawh nan:, cao: bung: kaing: khankix yaox tix ceu rhawm: mai: yaox tix yun rhawm: ka kix heue. Mai: kawn: khrit ceucao: yaox tix ceu rhawm:, deuhrhawm: ka nawh, kheu mawh nawh kih haktiex heue.

Ka daux lai khrit loe: phuk, daux carang kawncau kao: kaux ra:, viex ngie ceukaux Andare, viang mawh nan:, ang plak jhi: ka grawhgrawng: nawh heue. Mai: mawh ngie daux lai Yohan ngie pa yaox ka Andare mawh jung pui tix kaux, mai: pa koe: krax lhak krax haing: heue. Mai: Andare lih tix sidawng: loe: bawg, daux grawng: pa ang ex bak ce: , mai: daux dee pa ang ex bak ce: heue. Daux grawng: an loe: bawg kawx, Andare mawh pui pa viex ka pui tang: kaux hoek ka Yesux heue.

(1) Andare jah tix viex puxke: nawh pa mawh Petru hoek ka Yesux heue (Yohan 1:40-42). Andare jah tix yuh kaing jhaw:, daux nyiex nawh heue. Pui pa simie tix yuh kaing jhaw: son Yesux, pon tix yaox pakpeung pa pon yuh daux nyiex pa tokaux tix heue. Pa ox nyiex pa ox ma: pui pa yuh kaing daux ceucao: khankix, yaox tom: nie daux pa laux rhawm: singai mai:

ceucao: heue. Yam ah tix yuh ka kaing jhaw: cie Yesux, khaw: tix satix pa plak jhi: daux lai Lox Kab 17:14 yuh nin: “Ngai: pui caox khankix chix lylie: tix jhak tom: sidah haktiex heue”.

(2) Ra: bawg tix bawg kienie, Andare viex kawnnyawm tix kaux pa viex khaomun phwan: lon: mai: kax ra: mu: hoek ka Yesux heue (Yohan 6:8-9). Viang ce: ang koe: bwanson:, son cao: tix kawx, nawh koe: rhawm: tix viex kawnnyawm tix kaux ka Nawh Cao:, sonsang pon shiao Yesux kah heue.

(3) Loe: bawg tix bawg, Andare viex Helasax tibble hoek ka Yesux heue (Yohan 12: 20-22). Pui Helasax khankix hu: khyox ka Philipux, sonsang yaox ka Yesux heue. Kheu Philipux ang tawng tix yuh tidtix son pui an kix, nawh tom: kum: kawng: mai: Andare heue. Daux rhawm: Andare kienie nawh ang nieh ang ciien, sonsang viex ka pui an kix hoek ka Yesux heue. Mai: Andare mawh pui pa tawng ka rhawm: Yesux mhawm mhawm: heue. Andare tawng mhawm: mhawm: ka pa Simiang Yesux simie tix yaox pui kukaux, mai: viang Simiang Yesux nie kaing kawx, yam hoek pui tix chawk cheung: ka pa rah pa see, Nawh teei bawgyam tix tawx kah heue.

Yam keud tix yaox ka ceu pa viex Andare ka pui tang: kaux hoek ka Yesux kienie yaox ka grawng: ting loe: ceu heue.

(i) Daux rhawm: Andare ang koe: rhawm: pa jhak ka pa tokaux cao: tix. Phan: koe: yuh nan: kienie Andare ang doh pon ot tau mai: Petru, pa mawh puxke: nawh, leeing lang: ju tix heue. Andare tawng ka Petru mawh cao: bung: kaing: pa grum naog mai: krax lhak krax haing: heue. Phan: Petru koe: kienie pui tang: kaux ang doh lih tix pon min: plak ngai: heue. Ceu an ang ting ceu son Andare, mai: viang tawng pa tokaux cao: nawh tag sang yhawm: tix hu: khaing: min: plak ngai: kheu viex nawh pui tix kaux hoek ka Yesux, mai: pui an lih tix koe: min: plak ngai: kawx, mai: nawh ang lauxrhawm tix viex pui tang: kaux hoek ka Yesux heue.

(ii) Andare chix jhak ngie plak pa mhawm: heue. Ceu pa ce: nawh, kawnnyawm pa viex khaomun phwan: lon: mai: kax ra: mu:, tag pon teem: coi ka sonsang eei: ka pui phwan: rheng kienie, mawh ceu pa chix jhak plak pa mhawm: heue. Mai: nawh yumrhawm: kraung khrai: pa hoek ka Yesux khankix, pa Nawh Cao: chix pon yuh, sonsang hoek krax pa kied mhawm: heue. Mai: pui tix kaux pa hoek ka Yesux tag mawh giex going mai: nawh ang keud daux rhawm: tix, tix bawg kawx heue.

(iii) Sonsang mhawm: krax ot krax koe: pui kukaux, Andare jhak sivoelawx lawx heue. Mai: pa ce: ka pui tang: ceu tang: cat tix kaux, pon koe: bwanson:, son Siyiex kienie cha: ka been pa dawg koe: pui Yudax khankix heue. Mai: pui Yudax khankix deuh pui tang: ceu tang: cat khankix mawh pui seeing pui brai: heue. Viang mawh nan: Andare ang mawh daux pui ceu an heue. Mai: pui pa jah tix tawng ka lox bwan: gauhrhawm: gauhrhi: Nawh Cao:, mawh son pui kukaux, mai: Simiang Yesux koe: rhawm: tix krai lox bwan: gauhrhawm: gauhrhi: mai: tix rieb ka pui ceu khawm: uik kienie mawh Andare heue.

Mai: ceu pa koe: krax pa laigrhawm: daux lai tiem: pa kaux Jaw Miligen (George Milligan) kienie, Andare mawh pui pa jah tix yuh kaing jhaw: Siyiex daux meung tix, mai: meung tang: dah daux bawgyam tix mu: heue. Ceu pa viex ka Petru mai: kawnnyawm hoek ka Simiang Yesux kienie Andare mawh pa yuh kaing daux meung tix, mai: ceu pa viex ka pui Helasax hoek ka Yesux kienie Andare mawh pa yuh kaing meung tang: dah heue. Grawhgrawng: ceu in kix, mawh pa kieh nawh ao: min: heue.

(1) Daux lox krai kuad khankix, Andare lailing tix sidiex gau ka lox bwan: gauhrhawm: gauhrhi: ka meung tang: dah khankix heue. Mai: meung an khankix kienie mawh Kappadosia (Cappadosea) mai: Bittinia (Bithnia) mai: Galatia (Galatia), mai: Bizatia (Byzantian) heue. Viang mawh nan:, pa plak jhi: daux lai (Ensebius Ecclesiastical History 3,11) kienie Andare lheu: dex mai: meung Sitia (Scythia) heue. Didix dee bleeh pui Sitia (Seythians) kienie mawh pui pa kied hai: kied meeg heue. Mai: pa kaux Bengie (Bengel) tiem: tix plak jhi: ah nin:, “Pui Sitia khankix lheu: hai: khaing: pui tiag khankix heue”. Mai: pa kaux Josiphax ah nin:, “Pui ceu an kix, ang tang: mai: totiag totu heue”. Mai: pa kaux Tike Iebot (T.K. Abbot) plak jhi: ah nin:, “Awm: kok ka pui hai: pui meeg ka Gawt (Goth) baow ju in, mai: ju dix kawx kok ka pui hai: pui meeg ka pui Sitia heue”. Daux pa krai kuad didix khankix, mai: kix ah Andare viex ka pui Sitia hoek ka Yesux heue.

Meung Sitia ot dee caong ma: seh rawm: sigrit sigra: pa lung: (Blak Sea) mai: ot sinax rawm: klawng: Denyux (River Denube) mai: rawm: klawng: Tienex (River Tanais) heue. Yam in Sitia mawh kaung: tix kaung: cie meung Rasix heue. Mawh kheu nan: pui meung Rasix khankix deuh ka Andare mawh kawncaw pa singax singeh pa pau ka meung kix heue.

(2) Daux lox pa krai kuad khankix, yaow tix tawng ka pah ka

Andare dauw meung Greg (Greece), kaung: Ietkhia (Achaia), veng Piettra (Patras) heue. Yam hoek Andare ka veng Piettra, pui tix kaux pa mawh khriyan, pa kaux Iphidamia (Iphidamia) krai ka Andare mhong: ka pa kied saux simoeng simiang Egea (Aegeas), pa kaux Mazamila (Mazamilla) heue. Mai: Egea kawx, phan: simoeng nawh yum, sonsang plaux ka pa tokaux cao: tix, nawh eung mai: giex ka vaid lang: dex simoeng tix heue. Yam hoik moi jhawm: saux Mazamila kheu siawp sibrawm pa daox pa am: pa yuh Andare, jhak heue, pa Mazamila yumrhawm: mai: rieb ka Yesux, mai: lih tix mawh kawm: khrit tix kaux heue. Viang mawh nan: Egea mawh pui pa cha: ku ceu pa yumrhawm: kawm: khrit (Khriyan) heue. Mai: Egea koe: pux tix kaux pa kaux Stratasic (Stratocles) heue. Mai: Andare deeh kiek jhawm: saux pui cau Stratosie pa kied moh nawh, pa kaux Alemien (Aleman) moi khawm: heue. Mai: Stratosie kawx lih tix mawh kawm: khrit tix kaux heue.

Egea lih tix songrhawm: mai: giex ka Andare, kheu lih pux nawh mai: moeng nawh tix mawh khriyan heue. Ang rheung: nawh tawx lox sonsang plaux ka Andare heue. Mai: tawx lox ang kiek tawx jim, ka Andare ka piang khaoxlhak, viang mawh nan: kiek vien ka maox ngie, mai: kiek grham: dauw pa cairhawm: mai: dauw pa cairawm, mai: dauw lhiex, mai: dauw koek, yam plaux ka Andare, sonsang lheu: kham: geu: nawh heue. Andare rawgbwan: piang khaoxlhak heue. Lox rawgbwan: Andare tibleh awm: plak greem: heue.

“Khaoxlhak pa kied koe: tix moh eue, kheu tokaux Simiang aux, mai: maix hoek tix mawh pa singax singeh. Taix caong Nawh Cao: khankix ceep ka maix mawh shiang pa mhawm: pa kied ngawh heue. Aux hoik hoek ka maix, ka dauw pa kied gauxrhawm: gauxrhi: heue. Gauxrhawm: gauxrhi: mai: rieb ka aux liak. Khaoxlhak pa koe: tix moh eue, kheu tokaux taix caong Simiang aux, maix pon tix mhawm: grang heue. Aux kied moh ka maix. Mai: aux sawg maix hoik dawg rheung: kheu lo aux ka maix heue. Mai: maix hoik cox khre: sonsang thien thie: ka pa kied krox jun aux heue. Rieb tix teei aux liak. Mai: teei ka aux khaing: pui khankix, mai: appong aux ka Simiang Sara aux liak. Piang maix, Cao: pa laug tix taoh ka phimap ex khankix, ka aux kawx tag rieb, kheu maix heue”.

Dauw lox krai didix, pui aliah kaux pa hai: pa meeg khankix, sivied ka Andare, mai: grham: tom: yum nawh heue. Otkhaix dauw grawhgrawng:

nawh, mai: nawh khyox sonsang plaux ka nawh piang khaoxlhak, awm: pa koe: pakpeung caong ia:(x), kheu ce: nawh tix ang keung: khaw: tix yum, awm: Simiang nawh heue. Mawh kheu nan: khaoxlhak pa awm: caong ia: (s) kok tom: yam in, mawh khaoxlhak Andare heue. Ceu in, ex koe: krax pa ang yumrhawm: kawx, pa yaox Andare tix yum son Simiang kienie krax pa ang yumrhawm: ang koe: heue. Kheu yaox Andare tix yum dauw kaung: ietkhia, veng Piettra, jhak heue, pui meung Greg khankix, tat tix mhai: nawh, mawh pui singax pa pau ka meung Greg heue.

(3) Meung loe: meung tix meung pa ot tix sitioe: mai: Andare kienie mawh meung Skotilan heue. Been pa sitioe: Skotilan mai: Andare kienie lih tix mawh, dauw bawgyam pa ang nyang rheung: heue. Viang mawh nan: koe: pa kied laigrhawm: son pui Skotilan heue. Dauw been an, dauw num khrit (337) num, simiang Konstantaing (Constantine) viex ka kaing: Andare hoek ka veng Bizantiyan (Byzantium) phan: ang mawh nan: ka veng Konstantinobie (Constantinople) heue. Yam hoek num yieh daix, kawncaw Siyiex kiek sara ting Rigula (Regulus) teei gien loe: gien khaing: taix khawn: dawn: mai: si:ang taix tix mu:, mai: rhang: tix mu:, mai: si:ang ngawng caong tix mu: khaing: Andare, son hu: plak khaix haktiex heue. Sara long (ting) an hu: krax awm: pa tawm: kawncaw Siyiex, dee ghoik, nawh hoek ka plak dee sivoe meung Skotilan, yam in, mawh dee pa koe: veng Sengindru heue. Mai: cawng rawgbwan: Shinrigula pa hoik laux khankix koe: tom: yam in heue.

Yam an, Hanga (Hungus) pa mawh simiang pui Pit (Piets) mai: simiang Inggalik pa kaux Ethiestan (Athelstan) yuh naing heue. Dauw tix bo: ka: ang nyang yuh naing, Andare hoek ka simiang Hanga dauw camaox, mai: ah grawhgrawng: pex naing in, mai: sonsang yumrhawm: ka ceu in heue. Yam pasax, yaox ka khaoxlhak Andare pa ot piang gru naing pui Pit, piang raoma: heue. Khaoxlhak an, ang grai: khaing: raoma: tom: hoek sidah pex, pui Pit kix naing heue. Mai: lien Pit khankix pex ka lien Inggalik khankix, kheu yo kix lox ah nin: “ Andare mawh pa pau tix kya ex heue”. Yam yaox lien Inggalik khankix ka khaoxlhak pa jhan: riang dauw raoma:, piang gru naing pui koeng kix, mai: kix lhat graung tom: som: ka jao an heue. Jah tom: yam an, khaoxlhak Andare tom: lih tix mawh “Chit” (plak lox man mawh “alang”) pui Skox heue.

Dauw leeing lang: ju Andare, grawng: pa mawh nawh khankix, viang

Lawg (5)

Thomax

**Kheu ceu pa ang yumrhawm:
pui pa lih tix tawng pa rah pa see**

Yam doh keud ka Thomax, phan: kok: "Thomax pa ang yumrhawm:" ka nawh kienie tag hoek pa nieb ah ka piang nawh heue. Ceu pa kok awm: in, viang ang lud kawx, tag kieh ka min: nawh tiem: heue.

Daux lai khrit loc: phuk, ang koe: pa plak jhi: grawhgrawng: nawh, lheu: khaing: tawng ngie mawh nawh kawncaw tix kaux heue. Mawh ngie lai Yohan pa sidawng: yaox ka grawhgrawng: nawh heue.

Daux lai Yohan, tiem: tix deuh ah nin: ka nawh "Thomax pa kok mawh Didumux". Ceukaux Thomax mawh plak lox Hebrie:, mai: ceu kaux Didumux kienie mawh plak lox Greg heue. Phan: toe: dee bleeh kienie mawh pa brawm: tix keh heue. Daux phuk lai grawhgrawng: pa yuh Thomax khankix, yaox ka pa toe: dee bleeh ceukaux Thomax daux pa daox pa am: heue. Daux phuk lai an, kok ka ceukaux nawh mawh Yudax jheeng jheeng heue. Mai: sidawng: tix yaox Thomax koe: ceukaux tang: ceu baox tix ceu heue. Ka: didix ang bax nyang kok ka pui tix kaux ka ceukaux ru nawh heue. Yam an dix, awm: baox ju yam in, pui khankix chix sum: ceukaux phaoxka: tix mawh ceukaux pa chix sum: pui tom: nie heue. Viang mawh nan:, sonsang pon gwieh kaux mawx kaux an, baox sum: ka ceukaux ra: kaux tix kaux heue. Thomax, phan: ang mawh nan:, Didumux kienie sonsang pon gwieh mai: pui tang: kaux, mawh ceukaux ra: kaux tix kaux heue. Mai: ceukaux Thomax pa grum naog kienie mawh Yudax pa brawm: tix keh heue. Daux lai Makux 6:32 mai: daux lai Mathiex 13:55, yaox ka ceukaux ah nin: "Yudax pux Simiang Yesux" heue. Pa ang viex daux Camlik, pa mawh daux camlik pa kok mawh pa tik tix deuh, ceu pa yuh Thomax khankix kienie plak jhi: Thomax mawh pa brawm: tix keh mai: Simiang Yesux heue (Acts of Thomax). Grawng: in, pie ceeix kawx, ang doh pon mawh heue. Viang mawh nan: kheu lox pa kraik kuad awm: in, sidawng: tix yaox ka grawng: meed Thomax mai: Simiang Yesux ka paox tix miex ding heue.

Daux lai Yohan plak jhi: ka Thomax mawh pui pa grum naog heue.

(1) Thomax mawh pui pa koe: rhawm: kua. Mai: jah tix yaox nawh

daux grawhgrawng: Lazarux heue. Yam hoek tawx satang grawng: kied saux Lazarux mai: Yesux ang hu: sijaox, tom: pau been ra: ngaix, mai: nawh tom: hu: ka yaong: Betanix heue. Betanix mai: Yerusaliem singai been tix lhak heue. Yaong: Betanix an, mawh yaong: pa chix peung pui **pa hoek** poi Pasakha heue. Daux veng Yesusaliem, sonsang dheem: Yesux **ka simaox**, cao: giex kaing: li khankix coca ra: bawg heue (Yohan 8:59, 10:30). Ceu pa hu: Simiang Yesux ka Yesusaliem kienie mawh ngie pa plaux tokaux Cao: tix yum heue. Mai: ceu pa lheu: caox khaing: an kienie kheu hoik yum Lazarux, ceu pa hu: Yesux ka Yesusaliem, mawh ceu pa hu: daux pa ang koe: krax keud krax sawn: ang joeng mawh, mai: mawh ceu pa hu: daux pa ang koe: bwanson: heue. Yam Simiang Yesux kieh kawncaw khankix tawng ka grawhgrawng: pa ah tix hu: ka Yerusaliem, kawncaw khankix keud tix sang tik ka Yesux heue. Kheu nan: Thomax pa kok kaux Didumux, ah nin: ka paox kawncaw tix khankix, "Ex, ex kawx hu: yum tau mai: Nawh Cao: heue (Yohan 11:16). Mai: Thomax tawng pa tag sang koe: krax tuktiak tukte: heue. Viang mawh nan: tat rhawm: tix hu: sivoe heue. Thomax mawh pui pa tat rhawm: tix kaux sijax ka piang Yesux hoek dee sidah yum tix heue. Son pui **pa chix jhak plak pa mhawm:** yie koe: sijax mukheu, daux pa nu pa ciien **heue**. Grawhgrawng: nawh, son pui pa chix jhak plak krax pa mhawm:, jhak heue, nawh tag krox jun ka pa tag sang mawh kawx, mawh pa mhawm: heue. Son pui pa chix jhak krax pa caox kienie nu sonsang kaux sijax yam in heue. Grawhgrawng: nawh, nawh chix krox jun ka pa caox ngie heue. Mai: Thomax mawh pui pa chix jhak krax pa caox heue. Sivoe ngai: nawh mai: nawh yaox krax pa tug kha. Viang mawh nan, ang koe: rhawm: pa deeh plak khaix. Phan: nawh yaox tix yum kawx nawh ka yum. Viang mawh nan: nawh ang tik sijax mukheu. Mai: yam Simiang Yesux kraik grawhgrawng: pa ah tix hu: ka veng Yerusaliem, Thomax mawh pui pa deeh khawm: kawncaw kao: kaux tix, deeh kaux sijax mukheu piang Nawh Cao: heue.

(2) Thomax mawh pui pa sivix rhawm: kheu ang nawh yaox pa sidawng: mhawm: mhawm: heue. Yam dex sang uik ngaix pa ot Yesux piang haktiex. Thomax lheu: koe: rhawm: krax pa sivix heue. Tix bo:, daux haw, Simiang Yesux kraik ka sonsang yaox ka khaoxlhak mai: ceu pa koe: plak khaix khaoxlhak khankix ka kawncaw pa daox pa aw: khankix heue. Yam Yesux ah nin:, "Pex tawng krax pa hu: dee sang hu: Aux". Thomax

pawk mai: ah nin: ka Nawh Cao: "Simiang eue.ang ex tawng dee sang hu: Maix, ex kheu chix tawng krax yuh ka mawx?" Yesux baox pawk lox mai: ah nin: ka nawh "Aux mawh daux krax, mai: pa mawh pa meh, mai: ju heue". Mawh kheu nan:, Thomax pon ceu pa kied koe: ngawh jum: heue. Ceu pa deeh pawk Simiang Yesux ka Thomax kied sidawng: tix yaox heue. Mai: mawh nin: "Thomax eue. Aux tawng ang maix doh rhawm: ka ceu pa mawh khankix yamin. Pui mawx kawx ang doh rhawm kah. Yuh ka mawx kawx, maix hoik pon ka Aux . Aux mawh daux krax mai: pa mawh pa meh, mai: ju heue.

Piang haktiex, yam sawg ex tix chawk cheng, ceu pa lo ex kienie ang mawh ceu pa thung thiang:, viang mawh nan:, mawh ngie Nawh Cao: pa ot dex mai: ex heue. Ceu pa thung thiang: pon yaox ka pa rah pa see mhawm: mhawm: ang mawh, viang mawh nan: mawh ngie pa tokaux Nawh pa sibieh tix tawx ka ex heue.

Thomax ang mawh pui pa yie yum rhawm: heue. Piang khaoxhak yam yaox Simiang Yesux tix yum, can ceu khankix, yam ce: hoik hoik khawm: uik, ceu pa simie Thomax kienie mawh rhawm: pa simie tix ot tix kaux khaing: heue. Tosat pa mhawm: simie, yam yaox krax mat, awm: gah tix ot, sonsang kham: ka pa kham: geu: tix, mai: Thomax kawx awm: an heue. Yam Simiang Yesux deeh kaoh im:, mai: yam Nawh hoek ka kawncau khankix, Thomax ang ot tau mai: kawncau khankix heue. Thomax ang yumrhawm: sijaox ka pa deeh kaoh im: Nawh Cao: heue. Mai: Thomax ah nin: "Phan: aux ang yaox khaix dee tawk jim rhiem: ka tawm: taix Nawh, mai: ang pon tix sau: gien: taix aux ka daux khaix tawk jim rhiem:, mai: ang pon tix sau: taix aux ka paw Nawh,aux ang lai yumrhawm: kah heue (Yohan 20:25). Khaix hoik yaox mai: ngai: tix, Thomax tom: yumrhawm kah heue.

(4) Kheu hoik yumrhawm: Thomax ka Nawh Cao:, mai: Thomax lih tix mawh pui pa krub ka Nawh Cao: heue. Simiang Yesux baox lih bleeh tix bawg, mai: ah nin: ka Thomax, "Nyeu taix maix sau: tix yaox ka daux paw Aux" heue. Yam hoik yaox Thomax tix pa deeh kaoh im: Nawh Cao:, daux Camlik khraox, plak jhi: ka pa kham: Thomax mhai: sakse:, ceu krax yumrhawm: pa kied ting lhaong: nawh yuh nin: "Simiang aux, mai: Siyiex aux" heue (Yohan 20:26-28). Rhawm: pa ang yumrhawm: pa hoik lang: kham: Thomax, yam hoek sivoe Nawh Cao: lih tix tich loh ka daux pa rah pa see heue.

Pa viex daux Camlik khraox, grang Thomax kienie lih tix sidawng: daux ra: ceu heue.

(1) Ceu pa ang Thomax yumrhawm: Yesux ang deuh phimap kah heue. Phan: Thomax ang lai koe: rhawm: pa ang yumrhawm: kienie nawh tag lih mawh pui pa tawng pa yung, mai: pa kied kaux cong: daux khrityan mai: Yesux tawng yuh nan: heue. "Paw kieh rhawm: pex koe: krax pa ang yumrhawm: tix bawg kawx" Yesux ang ah nan: heue. Pa simie Yesux tix ah kienie mawh ngie ah nin: " Phan: ceu pa yumrhawm: ang koe: tete, paw kham: mhai: sakse: mai: caw tix sawg, hoek sidah tawng tix ka pa rah pa see heue". Pa caw ex tix satix kienie daux pa hoik tawng, mai: daux pa hoik yumrhawm: Thomax, ang mawh ceu pa yumrhawm: pa tat kheu riangrao pingnya tokaux dong: tix ka pa rah pa see beenli, viang mawh nan: mawh kheu hoik yaox pa tokaux nawh ka siawp sibrawm Nawh Cao: heue. Ka grawng: Yesux, ceu pa lih Thomax tix yumrhawm: kienie jao mhong: tix ang mawh, viang mawh nan:, mawh kheu jao yaox tix heue.

(2) Pui pa yuh paox pie mai: pui pa yumrhawm: khankix kienie, ceu pa deeh sang doh rhawm: tix tawng ka pa rah pa see koe: tom: nie ceu heue. Jao ot Thomax tix, tix kaux khaing:, ang joeng mawh singai mai: paoxplawg paoxnyhawm tix, mai: baox lih tix singai mai: Yesux khawm: heue. Khaix an, kheu deeh hoek nawh ka paoxplawg paoxnyhawm tix, Simiang Yesux kawx nawh deeh tix yaox heue.

Daux dee pa yien yawk, yam ot ex tix kaux khaing:, ang pon yaox ka Yesux ang ah yuh nan: heue. Pa simie tix ah kienie ex lheu: pon tix yaox ka Nawh Cao: daux cub daux caw: pa moh ka Yesux heue.

Daux lai Yohan (21:2) plak jhi: ka grawhgrawng: Thomax baox tix bawg heue. Yam deeh kaoh im: Simiang Yesux, yam hoek tix jhak ka kawncau khankix dee nhawng: Galilie: Thomax ot tau mai: kawncau tang kaux khankix heue. Kheu hoik pon Thomax pa gau pa sawn:, jah tom: yam an, nawh ot tau mai: pui pa yumrhawm: khankix heue. Yam hoek Yesux tix jhak ka kawncau mau soi Tix kawx Thomax ot tau mai: kix heue.

Pa sitoe: mai: grawhgrawng: Thomax ang lai koe:, sonsang plak jhi: baox tix bawg, khaing: Camlik khraox heue. Viang mawh nan: daux been pa krai kuad khankix, grawhgrawng: Thomax koe: tom: nie ceu heue. Pa sitoe: mai: grawhgrawng: Thomax koe: ra: dee heue.

Dee tix, mawh dee pa yuh Thomax tix, kaing daux meung Pathi(Parthia) heue. Daux pa kraï pa kaux Yusilia(Eusclius) kienie, yam gwieh kawncaw khankix tix rieb ka dee, sonsang kham: mhai: sakse: lox bwan: gauhrhawm: gauhrhi: krax taoh Yesux, Thomax tom; yaox tix tei beeh glawm: sonsang yuh kaing daux meung Pathi heue. Daux lai mhai: beenli cie Sokreti(Socrates) yaox ka kieh ceu in kaux cong: heue (Eusclius, Ecclesiastical History 1,19). Mai: sonsang doh keud ka Thomax grawng: sum: cawng rawgbwan: pa kied ting tix vieh tix mhawm: grang tix mu: mai: grawng: yaox Thomax tix yum daux meung Mesopotemia (Mesopotamia). veng letdis(Edess) kienie yaox daux lai mhai: beenli cie Sokreti: mai: cie Szamin khankix heue(Socretes, Ecclesiastical History 4,18. Sozomen Ecclesiastical History 6,18). Yam an nhaox, meung Pathi koe: sinax rawm: klawng: Indie (Indus) mai: rawm: klawng: Taigri (Tigris) heue. Pui Pathi khankix mawh pui ceu pa kua rhawm:, mai: mawh pui ceu pa deuh rhawm: ka riangrao pa tokaux cao: tix heue. Pie pui Romax khankix, nabyam: ka pui ceu an khankix heue. Daux pa kraï kuad khankix didix, yaox tix tawng ka grawng: kraï Thomax tix lox bwan: gauhrhawm: gauhrhi: krax taoh daux pui ceu an heue.

Ra: dee tix dee, daux lox pa kraï kuad didix, lheu: tawng grawng: Thomax grum naog mai:lheu: koe: krax pa laig rhawm: heue. Pa baox thien: thie: pa kaux Sophronia (Sophrnius) tix tiem: ka pa tiem: Jerom(Jerome) pa mawh phuk lai “ Ju cie pui pa ao: min: khankix” (Live of Illustrious men) kienie plak jhi: ah nin: “Thomax kraï loxbwan: gauhrhawm: gauhrhi: ka pui pa ot daux meung Pathi, mai: meung Mede, mai: meung Pasix, mai: meung Kaman mai: meung Hakinnia, mai: meung Biattia, mai: meung Magia khankix(Pathians, Medes, Persians, Carmonians, Hyrcanians, Bactamina, and Magians), mai: yum daux meung India, dee Kalamina (Calamina) heue.”

Dee ra: dee tix dee, sitioe: ka Thomax mai: meung India heue. Yam an nhaox, ang nyang tat tix kok ka ceukaux meung India mhawm: mhawm:, viang mawh nan: kok ka ceukaux pa lih khaing jheeh tix ngie heue.

Tom: hoek baox ju yamin, koe: ceucao: tix mu: pa sum: ceukaux mawh khrityan cie Thomax heue (The Christians of St. Thomas). Num: riah pa koe: ceucao: an, yaox sitioe: mai: Thomax heue. Been num: riah ceucao: in, koe: krax pa sugsak pa ang pon doh rhawm: kah heue.

Pui Pawtugi tix cub, pa lailing tix sawg haktiex pa khraox, pa mawh paox mai: Vaskodagama:(Vaskodagama) khankix, yam hoek kix ka meung India, daux num khrit 1500 num, yaox ka hoik dawg koe: ceucao: in heue. Ceucao: an, lih tix haok hwan: daux kaung: Malaba(Malabar) mai: daux kaung: Travankore(Travancore) heue. Mai: daux lai pa mhai: kix been kienie, Thomax hoek ka klawn: tiex Malankara(Malankara), pa koe: dex dee Krangamo (Crangamore) mai: pui tom: nie deeh tieh loh, mai: rieb Baptis kheu sidiex gau ka pui khankix, pa ot dee an, mai: ah nan: heue. Mai: ah nin:, “ Thomax nawbbwan: ka piang sara long 7 kaux, mai: sum: ceucao: ra: mu: heue. Otkhaix Thomax dux tix ot dee Melapo (Myalapur), pa kok mawh baox ju yamin, pa mawh veng Madra(Madras) heue”. Mai: baox kawm ah nin:, “Daux dee an, Thomax kieh simiang mai: pui meung khankix, deeh tieh loh ka been ih khrityan heue. Mai: Thomax baox hu: ka meung Hawx, mai: daux meung Hawx kawx, kaing jhaw: pa yuh nawh baox tix haok hwan: heue”. Yam hoik yuh nawh kaing daux meung Hawx, mai: nawh deeh ing: ka Melapo heue. Pui Bramin (Brähmins) pa ot dee an khankix, sonsang dheem: tix plaux Thomax ka simaox, mai: kix cheek pui pa ot tan:, kheu koeng kix ka pa haok hwan: kaing jhaw: Thomax heue. Dee ghoik swat tix plaux Thomax yum ka pliah lang: heue. Mai: cub Vaskodagama: kix, yaox ka kraung khrai: pa kawm deug cie kawm: khrit phaoxka: dix khankix heue. Pa ting ceu, kix yaox cawng rawgbwan: tix mu:, yam kaong: kix tix jhak greem: cawng an, mai: kheu yaox kix ka si:ang jungpui pa kied paing, mai: pa kied riang, mai: tat si:ang an, keung: tix mawh si:ang cie Thomax heue.

Awm: pa hoik plak jhi: plak piang, pa hoek beenli khrityan ka meung India, sugsak tix yaox heue. Viang mawh nan:, pa dawg hoik koe: beenli khrityan ka daux meung India, mawh tete heue. Mai: piang gawng Thomax, yaox ka khaoxlhak tix mu:, pa yuh ka simaox heue. Piang khaoxlhak an, pa tiem: ka plak lox Palivi(Pahlivi) kienie mawh ngai: lai ah nin: “ Simiang Yesux Khrit pa singax singeh, Cao: pa mawh pa jhi: krax, yaox tix kham: krax tuktiak tukte:, son pui pa koe phimap khankix, ka piang khaoxlhak heue.

Khaoxlhak simaox an, dawg koe: tom: num yieh daix heue. Awm: khaoxlhak an daux meung Travanko (Travancore), veng Kotayam

44 *Thomas*

(Kottayam) kawx. yaox ka khaoxlhak tix mu: pa dawg koe: tom: num yiex kao: heue.

Pa ang viex daux Camlik. pa tik tix deuh pa mawh phuk lai "Ceuh pa yuh Thomax." kienie tiem: ka grawng: ploi: ka Thomax ka meung India pa yuh ka mawx. mai: grawng: kaing jhaw: pa yuh ka mawx. mai: grawng: kaing jhaw: pa yuh Thomax daux meung an. pa yuh ka mawx. awm: plak greem: kieh koe: tix laighawm: heue.

Daux tix ngaix, yam kum: kawng kawncau khankix, daux veng Yerusalieim, kix doh keud ka pa ah Yesux yuh nin:, "Pex tag sang mawh pui pa kham: mhai: sakse: son Aux, tom: hoek dee sidah haktiex heue" (Kawncau 1:8). Jao an, mai: kix tom: gwieh beeh glawm:: sonsang kham: mhai: sakse:, tom: hoek dee sidah haktiex heue. Sonsang hu: ka meung India, Thomax yaox tix teei beeh glawm:: heue. Viang mawh nan: Thomax thiang: ka ceu an heue. Thomax thiang: mai: ah nin:, "Aux ang pon hu: krax lang: kheu koe: jhawm: saux aux, mai: sonsang yuh kaing jhaw: kawx, ang kraung khrai: grum naog, mai: kheu mawh aux pui Hebrie: pon krai: ka pa rah pa see yuh ka mawx sinax pui India lie?" Yam hoek plak bo:. Thomax yaox lih bleeh Simiang Yesux ka nawh, ka daux riang susai heue. Simiang Yesux ah nin: ka nawh "Thomax eue. paw lhat, mai: hu:, mai: krai loxbwan: graurhawm: gauxrhi: ka meung India awx. Bwanson: Aux ot tau mai: maix". Viang mawh nan:, Thomax keud plak pa caox, mai: nawh thiang: mai: ah nin: "Simiang eue, Maix simie aux hu: dee mawx kawx aux lawk hu:. Viang mawh nan:, aux ang simie tix hu: meung India". Jhak heue, yam an:, daux veng Yerusalieim, pui tix kaux pa yuh lai, pa kaux Abbane (Abbanes) hoek khaing: meung India heue. Mawh simiang Gandaphora (Gundaphorus) pa ploi: ka cao: yuh lai an, hoek heue. Simiang Gandaphora tawx beeh glawm: ka Abbane, sonsang sawg mai: kok ka cangmai pa cheung tix kaux hoek ka meung India heue.

Jhak heue, Simiang Yesux yuh awm: pakpeung jungpui. mai: hoek ka Abbane pa ot daux lah, mai: chawk mai: ah nin:, "Simie maix tix liag ka cangmai tix kaux lie? Abbane deeh pawk mai: ah nin:, "Mawh heue. Simie tix laig kah heue". Simiang Yesux jhi: nawh yaox ka Thomax, mai: ah nin:, "Ka aux koe: siliex tix kaux pa cheung ka plak cangmai. Mai: aux simie tix coh nawh heue". Mai: coh ka Thomax ka daux tawm: taix Abbane ka mau 30 plah, mai: pa Thomax ang yaox tix tawng tidtix heue. Otkhaix

Simiang Yesux viex Thomax hoek ka Abbane heue. Mai: yam Abbane chawk mai: ah nin: ka Thomax "Pui in, khex mawh Simiang maix lie? Mai: Thomax deeh pawk mai: ah nin:, "Mawh heue". Yam an, Abbane krai grawhgrawng: pa hoik liag nawh khaing: Simiang nawh heue. Thomax ang lai simie tix ah tidtix, mai: nyeeep jheeh tix heue. Daux ponngawb caocao pasax, Thomax kaoh caocao mai: grux ngawng tix sivoe Yesux mai: ah nin: "Aux lawk hawt hu: pa simie Maix aux hu: heue. Kieh mawh alo Maix liak".

Thomax hu: tau mai: Abbane ka meung India heue. Khaix hoik hoek kix daux meung an, Abbane chawk mai: ah nin: ka Thomax "Chix yuh maix kraung ceu pa tix lie?" Thomax deeh pawk mai: ah nin: "Phan: mawh khaox kienie, aux chix yuh thai: khankix, mai: khaox klawm khankix, mai: khaox pa hawh moi khankix, mai: reu khankix, mai: rong reu khankix, mai: ling: khankix heue. Phan: mawh simaax kienie aux chix yuh lhak simaax khankix, mai: cawng rawgbwan: khankix, mai: nyiex bang: pa ot son simiang khankix heue". Mai: Abbane gauxrhawm: ka kheu mawh Thomax tix cangmai pa koe: pingnya tix kaux, pa lo simiang Gandaphora heue. Mai: simiang Gandaphora tawx beeh glawm: ka Thomax sonsang sum: ka nyiex bang: tix mu: son nawh heue.

Son dee nyiex bang: an, laug ka dee pa koe: rawm: mai: dee pa koe: khaox khankix heue. Thomax tawx sijax mukheuh son sum: ka nyiex bang: an laung laung heue. Thomax teei khaox tix mu:, mai: tiag ka dee haktiex. Mai: nawh yuh carang pa sang ah nawh tix yuh tix mu: hoik tix mu: heue. Mai: deuh siviex plak lih singaix, mai: deuh siviex vawng plak laig singaix, sonsang pon bhaung: mhawm: mhawm:, mai: deuh rawm: laig rawm: lih plak seh, mai: deuh nyiex kuik plak laong heue. Simiang tawx mau mai: pa ih pa un: tom: nie ka Thomax. Viang mawh nan:, Thomax ang shiao ka mau an khankix, yam sum: nyiex bang: an, jhak heue, nawh lai ling tix krai lox bwan: gauxrhawm: gauxrhi: ka veng tang: dah khankix mai: daux yaong: khankix, mai: sibieh tix tawx ka mau an ka pui pa yaox krax sia khankix heue. "Khex dex sang hoik nyiex nang: lie?, yam chawk simiang yuh nan:, mai: Thomax deeh pawk mai: ah nin: "Hoik dex hoik heue. Kawn deuk ngie braux nyiex tix mu: khaing: heue". Viang mawh nan:, ang nyang bax jah tix sum: ka nyiex bang: an, tete telai heue. Mau khri: khankix kawx nawh hoik tawx uik ka pui pa sia khankix heue. Thomax khirhawm: mai:

khyox khaw: rawgbwan: mai: ah nin: ka Simiang Siyiex nawh "Son ceu khawm: uik. ah ting bwanson: ka Maix Cao: heue. Kheu yum Maix son aux. aux yaox tix im: ju lawx lawx. Kheu coh Maix ka aux. pui tom: nie tom: pon krax taoh heue". Mai: Thomax ang nawx ka pa kraï nawh lox bwan: gauhrhawm: gauhrhi:, mai: pa sidiex nawh, mai: pa teem: coi nawh ka pa yaox krax sia khankix tix bawg kawx heue. Thomax tawx riangrao mai: ah nin: ka pui pa tug kha: khankix "Nawh Cao: sibieh tix tawx ka pex. kaux mawx kaux an. mai: tag eei: ka pui kukaux, mai: Nawh Cao: mawh Cao: pa eei: tix teem: coi ka kawn: doe: mai: mawh pa een: miexmai khankix rhawm:, mai: mawh Cao: pa taoh ka pui pa yaox tix kham: krax tuktiak tukte: khawm: heue".

Kheu Thomax ang lai pon lang: tieb glip ka grawhgrawng: pa ang nyang bax sum: ka nyiex bang:, pui tiblax tang mai: kraï ka simiang heue. Viang mawh nan:, pui pa tang khankix an, tawng mawh Thomax pui pa singax singeh heue. Thomax yuh ka krax rawgbwan: lawx lawx, mai: twah pa ih pa un: heue. Mai: ih khaomun mai: kih ngie mai: nyaux ka rawm: ngie heue. Mai: ceep ngie sibex tix pheem: ngie, daux yam kwat hoek tom: yam raux heue. Mai: nawh ang rieb kraung khrai: tix ceu kawx khaing: pui tang: kaux, viang mawh nan:, nawh sibieh tix tawx ngie pa koe: nawh khawm uik ka pui tang: kaux heue.

Dee ghoik simiang nhie: Thomax jhi: ka nyiex bang: heue. Thomax deeh pawk mai: ah nin: "Simiang eue, maix ang doh yaox ka nyiex bang: pa sum: aux, yam kawn im: ju maix yam in, viang mawh nan:, maix tag yaox ka nyiex bang: khaix hoik yum maix heue". Kheu kied songrhawm: simiang, tawx lox mai: kieh phyawk tix deuh ka Thomax daux thawng mai: koe: rhawm: tix sang plaux nawh heue. Mai: keud tix sang plaux Abbane, pa viex Thomax hoek khawm: heue. Thomax pau, yam yum tix daux thawng heue. Mai: jhak heue, simiang Gandaphora koe: pux tix kaux, pa kaux Gad(Gad). Kheu grawhgrawng: pa yuh Thomax, kieh ka Gad kied songrhawm: heue. Kheu kied songrhawm: Gad, kieh nawh kied saux mai: yum heue. Yam ang Gad nyang bax yum, sonsang tak ka hak mai: tong: tix plaux Thomax ka ngu, Gad mhaing: akhwang ka puxke: tix pa mawh Gandaphora heue. Jhak heue, kheu hoik yum Gad, mai: yam hoik hoek meung raoma:, kawncau raoma: khankix hawt tix jhi: nawh yaox ka nyiex bang: pa koe: meung raoma: mai: chawk nawh dee simie nawh tix ot heue,

Yam hoik hoek ka nyiex bang: pa kied mhawm: tix yaox .tix lhang: mai: Gad ah, simie tix ot daux lawg pa iak cie nyiex bang: in heue. Kawncau raoma: deeh pawk mai: ah nin: "Nyiex bang: in, mawh nyiex bang: pa deuh nong:, son pui tix kaux heue". Mai: kawncau raoma: baox tix ah nin:, "Nyiex bang: in, mawh nyiex bang: pa sum: Thomax son puxke: maix heue". Jhak heue, sonsang deeh kraï ka grawhgrawng: in, ka puxke: tix pa mawh Gandaphora, mai: nawh mhaing: akhwang ing tix vud ka haktiex heue. Yam hoek Gad ka piang haktiex, kheu hoik pon nawh akhwang, mai: nawh nih nai kraï lao ka puxke: tix ka grwhgrawng: nyiex bang: nawh, pa koe: piang meung raoma: heue. Mai: Gandaphora ang doh rhawm: laung laung (sijaox) pa nih nai kraï lao pux nawh ka grawhgrawng: nyiex bang: heue. Gad baox kraï lao ka grawhgrawng: nyiex bang: pa sum: Thomax, son Gandaphora, daux meung raoma: heue. Gandaphora lih tix doh rhawm: ka sum: Thomax tix deuh nyiex bang: son nawh piang meung raoma: kheu teem: coi Thomax ka pui pa yaox ka krax sia, mai: pui pa yaox **krax** tuktiak tukte: ka mau pa tawx nawh, mai: pa ih pa un: pa tawx nawh heue. Mawh kheu nan: Gandaphora ang joeng mawh taoh Thomax khaing: thawng mai: baox tix com rawm: ka daux tawm: taix Thomax, mai: lih tix mawh kawn: khrit pa chix nab chix yam: tix kaux heue.

Awm: pa koe: grawhgrawng: plak piang, grawhgrawng: Thomax awm: mawh been heue. Daux been an, yam hoik yum Thomax, mai: viex pa tokaux yum nawh hoek ka veng letdesa(Edessa) mai: grawhgrawng pa sipaung nawh daux cawng rawgbwan: pa kok ceukaux nawh kawx, baox tix plak jhi: kah heue.

Pui pa chix lai khankix, ce: grawhgrawng: Thomax mai: India mawh ngie been, mai: Thomax pa mawh cao: jaong num: pa jah tix sum: cie satsana kawn: khrit daux India kienie ang tie mawh kawncau, viang mawh nan:, mawh ngie pa yuh satsana tix kaux kaux heue. Daux lai pa toe: lox kuad khankix dix. (Dictionary of Christian Antiwuities), pa kaux Ropat Sinka (Robert Sinker) plak jhi: grawng: in mai: ah nin: "Grawhgrawng: Thomax mai: India, phan: ah mawh been pa mawh tete kienie mawh ngie pa ang keud pa ang sawn:, mai: daux been in, phan: ah ang koe: dee bleeh kawx, mawh ngie pa ang keud pa ang sawn: heue. Mai: ceu pa ah ra: tix ceu, lheu: mawh pa ah pa ang keud pa ang sawn: heue". Caw tix tik ka grawhgrawng been pa mawh Thomax mai: India, daux pa lauxrhawm: heue. Viang yaox

48 Thomax

tix tik kawx, ju Thomax, mai: bwanson: pa yuh nawh, mai: jhawm: nawh khankix, yaox sidu mai: been in khankix heue.

Thomax mawh kawncau pa singax singeh daux pa laux ceukaux heue. Phan: nhie: Thomax yuh kaing tix ceu ceu, pa deeh pawk nawh lawx lawx kienie mawh pa thiang: heue. Phan: ah sonsang yumrhawm: nawh kawx nawh ang yumrhawm: mai: nawh chix pawk daux krax pa ang yumrhawm: heue. Beeh glawm: pa nhie: nawh yuh khawm: uik, mawh kaing pa nu song nawh laing laing heue. Satang pa mhong: nawh khawm: uik kawx, kheu kied mhawm: tix miex nyao, mai: nawh sawn: mawh pa pie pa lhen: heue. Daux pa nu, yam hoik doh Thomax ka grawhgrawng: pa khaw: tix yumrhawm: mai: nawh lih tix kaux cong: krax yumrhawm: heue. Ang doh pon kieh krax pa ang Thomax yumrhawm grai:, kheu pa thung thiang: heue. Viang mawh nan:, kheu ot Nawh Cao: sivoe nawh, dex nawh, tom: pon grai: ceu pa ang nawh yumrhawm: khankix heue. Ceu tix ceu pa caw kawn: khrit tix tawng, mai: Thomax yaox daux ju tix, tix vud tix vud heue. Ceu an kienie “**Ang doh pon yuh tix ceu kawx, kheu riangrao pa tokaux tix. Viang mawh nan: phan: Simiang Siyiex ot kienie ang koc: ceu pa ang chix pon yuh tix ceu kawx heue**”.

Lawg (6)

Mathiex

Pa yaox tix kham: ka ceu pa seeing pa brai: pui kukaux

Phan: jhak grawhgrawng: Mathiex tix ceu, ex tawng ngie ceeix khaing: ka grawhgrawng: nawh, mai: phan: baox jhak pa tang: plak, tom: yaox ka riangrao pa chix yuh nawh tom: nie ceu heue. Viang ex yaox tix tawng ka riangrao pa chix yuh nawh ceeix kawx, pon sawn: ka mawh nawh pui yuh ka mawx, kheu mawh nawh cao: ko'h mau heue. Phan: tiag tix yaox ka grawhgrawng: Mathiex khankix, pa viex ka daux lai khrit phaoxka: kienie pon teei tix tawng ka riangrao nawh heue.

Pa ah Makux “Yam hu: krax, Nawh Cao: yaox Lewix kawn: simex Alaphie:, nyawm daux nyiex koh mau, mai: Nawh ah nin: ka nawh ‘Hawt Aux heue’. Mai: nawh kaoh mai: hawt khaix Nawh Cao: heue” (Makux 2:14).

Pa ah Mathiex “Mai: yam hu: Yesux khaing: tan: Nawh yaox pui tix kaux, pa kaux Mathiex, nyawm dee koh mau, mai: ah nin: ka nawh ‘Hawt Aux heue’. Mai: nawh kaoh mai: hawt khaix Nawh Cao: heue” (Mathiex 9:9).

Pa ah Lukax “Mai: khaix ceu an khankix, Nawh Cao: lih hu:, mai: yaox pui koh mau tix kaux, pa kaux Lewix ngawm dee koh mau, mai: ah, nin: ka nawh ‘Hawt khaix Aux heue’. Mai: nawh prah khawm: uik, mai: kaoh hawt khaix Nawh Cao: heue” (Lukax 5:22-28).

Ex yaox tix tawng grawhgrawng: kok ka Mathiex mawh Lewix, kheu phuk lai in khankix. Daux Palatinax, simex pa ot tan: khankix, chix sum: ka ceukaux tix, ra: ceu, hoik plak jhi: daux lawg pa hoik luan nux heue. Dee bleeh ceukaux Mathiex kienie mawh “Bwanson: cie Simiang Siyiex” heue. Awm: kok Simiang Yesux ceukaux Simon deeh mawh Petrux, mai: Mathiex kawx tag mawh ceukaux khraox Lewix, yam hoik mawh nawh kawncau heue. Daux kawncau kao: kaux ra:, kawn koc: pux Mathiex tix kaux heue. Mai: ceukaux nawh mawh Yakop, mai: nawh kawx, mawh kawn: Alaphie: heue (Mathiex 10:3).

Ceu pa kieh Mathiex sidawng: kienie mawh ceu pa mawh nawh, cao: koh mau tix kaux heue. Daux Camlik Simiang Jem kok tix deuh ka

Mathiex mawh Publikien (Publican). Daux Camlik Inggalik. loh ka dee bleeh ngai: lai in heue. Daux Camlik. ka ngai: lai in. teei khaing: lox Lietding (Latin). pa mawh ngai: lai Publikinap (Publicanus). Dee bleeh kienie mawh "Cao: yuh kaing pui meung" heue. Pa ting ceu. mawh kaing pa giex ka mau khri: heue. Mawh kheu nan.: tom: kok mawh cao: koh mau heue.

Yam an dix. lheu: khaing: cao: koh mau tix kaux. cao: pa yaox tix kham: geu: krax pa koeng ang koe: heue. Mai: pa kaux Stafa (Stapfer) kok ka cao: koh mau khankix mawh ceucat pa seeing pa brai: heue. Daux pa plak jhi: pa kaux Sisaro (Cicero) ka kaing pa ang keung pui mhawm: pui mhiem: tix eei: ju tix kienie pui khankix laug tix plak jhi: ka kaing pa koh mau pa seeing pa brai.: mai: kaing pa teei riah mau tom: nie heue (De officiis 1.42). Daux riang susai pa yaox pa kaux Lusua (Lucian) kienie daux meung yum, yaox ka tok ka pui haoh pui hun: pa tia: tix kieh lang.: hu: ka dee koe: dangngeung simiang yum heue. Mai: dee dex dangngeung an, pui pa sang tuktiak tukte.: mai: pui pa sang pawk bix tix khankix, kheu songrhawm: kix, mai: kix cung tix pau tan: heue. Pui pa viex daux pui haoh pui hun: pa tia: tix kied lang: an kienie mawh pui pa phit pa vao mai: moeng mai: kawm: pui, mai: mawh pui pa teei kraung khrai: ka daux pa ang khaw: ang caw, mai: mawh pui pa koh mau, mai: mawh caomi khankix, mai: mawh pui pa chix ah lox salao khankix, mai: mawh pui pa gauxrhawm: daux krax haktiex khankix heue. Ceu in khankix plak jhi.: daux phuk lai (Menippus 2) heue.

Daux pui ceu khawm: uik. pui Yudax khankix mawh pui ceu pa kied koeng ka pui pa koh mau khankix heue. Pui Yudax tiblax sawn: yuh nin.: "Mau gha: caw tix tawx ka Siyiex tix kaux khaing.: Mai: ceu pa tawx mau gha: ka pui tang: kaux khankix kienie phit vao ka akhwang Siyiex heue". Mai: deuh ka cao: pa plaux pui khankix, mai: pui tud pui rhim: khankix, mai: pui pa koh mau khankix, mawh tix ceu khaing: heue. Pui pa koh mau khankix, ang yaox tix kham: mhai: sakse: daux nyiex prawng see.: mai: ang yaox tix yuh cao: prawng see.: mai: pie daux cawng rawgbwan: kawx ang yaox tix rawgbwan: heue. Mawh kheu nan.: daux been pa viex daux lai Lukax (18:3), yaox ka cao: koh mau cung tix rawgbwan: dee singai heue. Pui koh mau tix kaux, sonsang deeh chix doh keud doh sawn: nawh, kied nu tete. kheu sawn: kix yuh nan: heue.

Phan: mawh daux beenli kienie ang koeng ka pui koh mau khankix heue. Ceu pui an khankix, mawh pui pa koe: ceukaux pa caox, daux pa

ghoing: ka kraung khrai: pui. mai: daux pa tud rhim: tix teei ka kraung khrai: pui. daux pa ang khaw: ang caw heue. Mai: yam chawk pui koh mau pa doh keud doh sawn: nin: ka Yohan cao: baptis " Ex tag sang yuh ka mawx?" Yohan deeh pawk mai: ah nin: "Paw vi teei nie lheu: khaing: pa hoik nhie: pex koh heue" (Lukax 3:13). Krax ceu pa koh pui ceu Romax kix mau, yie sonsang yuh pa ang khaw: pa ang jiet heue. Greem: simiang Romax, mai: deuh ka cao: koh mau, sonsang koh mau gha: son simiang heue. Cubcaw: pa sitoe: mai: mau khri.: liag ka akhwang pa yaox tix teei tix tawx mau gha: miex ding daux meung, khaing: simiang haktiex, daux pa yuh tix deuh daux been khankix heue. Khaix an, cubcaw: pa koh mau khankix, koh ka mau gha.: daux pa ang khaw: ang caw ka pui meung khankix heue. Greem: simiang Romax, pa yuh tix deuh cubcaw: pa koh mau khankix in, tawx tug kha: krax pa lauxrhawm: ka pui meung khankix, awm: yaox tix ot daux mawnarhok heue. Daux meung Romax, been pa deeh cox tix tieh loh pa khraox kienie yuh tom: nie ceu heue. Simiang Romax khankix, pa tokaux kix, giex ka mau gha.: Phan: ang mawh nan: giex ka mau gha: mhawm: mhawm: heue. Pie greem: been pa deeh cox tix tieh loh pa khraox kawx, lo tix deuh cao: koh mau tang: kaux, sonsang koh mau gha: heue. Cao: koh mau tang: kaux an khankix kawx, deeh koh mau gha: krax pa ang khaw: ang caw heue. Pa daox pa am: kienie pui khankix lheu: koeng ka cao: koh mau khankix, daux greem: been pa deeh cox tix tieh loh pa khraox heue.

Phan: deeh jhak khawm: uik kienie krax ceu pa koh mau gha.: koe: ra: ceu, mai: cao: pa koh mau gha: kawx koe: ra: ceu heue. Mau gha: tiblax tat tix deuh daux been heue. Pui pa koh ka mau an, kok mawh Gabbe (Gabbai) heue. Pui an kix, ang pon akhwang tix yuh pa ang khaw: ang caw heue. Grawhgrawng: nawh, mau gha: pa caw pui an kix tix koh, kheu hoik tat tix deuh daux been heue. Mau gha: pa tat tix deuh daux been koe: loe: ceu loe: krax heue. Tix ceu kienie mawh gha: haktiex heue. Pui tix kaux yaox tix tawx mau gha: 10% (Tix yieh son kao: son) pa pon khaing: taux lhax pa sum: pa tokaux nawh heue. Mai: yaox tix tawx mau gha: 5% (Tix yieh son phwan: son) pa lih khaing: rawm: plix siiet, mai: plix khaox, mai: bee heue. Gha: mau laig tat 1% (Tix yieh son tix son). Mai: gha: jung pui kawx tat tix deuh heue. Simex daux pa koe: ju 14 num, hoek ka 16 num, mai: sibon: daux pa koe: ju 12 num, yaox tix tawx denari tix plah, son tix

num heue. Mau Romax denari tix plah, sidu mai: mau Inggalik dim: piak heue. Yam an dix, daux Palatinax ngawh riang kaing pui cang: pui caing tix kaux, tix ngaix mawh denari tix plah heue.

Ra: ceu tix ceu, kok Mok (Mokhes) ka pui pa koh mau khankix heue. Pui an khankix awm: mai: cao: bung: kaing: khaing: nyiex pa koh mau gha: heue. Simiang haktiex khankix, deuh ka cao: bung: kaing: tix kaux, tix dah sonsang jhak ka mau gha: ka kraung khrai: tix ceu heue. Awm: an, sonsang jhak mau gha: kraung khrai: kienie kied nie, ang joeng mawh kaing rheng kaing mheen: heue. Piang kraung laig kraung lih meung kawx, yaox tix jhak tix koh mau gha: heue. Mau koh in, mawh mau laig pa ting ceu, son simiang haktiex heue. Hawt ceu kraung khrai:, piang kraung laig kraung lih koh mau gha: 2½ % (Tix yieh son ra: son plak) mai: hoek tom: 12½ % (Tix yieh son kao: ra: son plak) heue. Piang kraung khrai: khankix tiblah, koh mau gha:, awm: carang pa koh meung Asiria heue. Piang kraung khrai: pa liag pa coh kawx koh mau gha: heue. Phan: shiao sipauk yaox tix tawx mau gha: . Mai: phan: shiao krax ting, yaox tix tawx gha:. Mai: phan: reu ting hoek praok rawm: kawx, yaox tix tawx gha:. Mai: phan: yuh lai daux lah kawx yaox tix tawx gha: heue. Mai: phan: pui pa hu: krax, laig daux veng kawx yaox tix tawx gha: laig daux veng. Mai: phan: pui tix kaux hu: krax, kheu shiao nawh krax, yaox tix tawx gha: son krax heue. Mai: son lawx brung, mai: lawx moi nawh kawx, yaox tix tawx gha: son tosat. Mai: son tiang klawng: kawx yaox tix tawx gha:. Mai: daux kaing jhaw: tiblah, sonsang pon akhwang tix yaox tix yuh kaing kawx, yaox tix tawx gha: heue. Simiang Romax khankix, yaox tix shiao mau tom: nie, kheu yaox kix tix yuh plak ku ceu, pa mawh son haok hwan: meung, mai: son kwang meung, mai: son yien yawk meung, mai: son yuh krax khankix heue. Sonsang pon thien thie: kix ka mau pa shiao an, mai: kix tom: pon tom: nie khaing: pa koh mau gha: in khankix heue.

Sonsang koh ka mau gha: khankix mai: kix deuh ka cao: bung: kaing: khankix koh mau heue. Cao: bung kaing: an pon nhie: ka pui tix kaux cung, mai: pon cied ka kraung khrai: nawh heue. Lheu: khaing: sibon: pa koe: nyiexma:. koe: akhwang tix pon cied ka pui kukaux heue. Daux lai (Declamation) pa tiem: pa kaux Kuingtilia (Quntilian) plak jhi: tix tiem: mai: ah nin:. “Sibon: Romax pa koe: nyiexma: tix kaux, kheu tawng nawh pon luan sibon: khaing: pa cied cao: bung: kaing: koh mau khankix, mai: nawh

tom: viex tix mox ka shiang paing pon: yieh daux sibex naok nawh heue”. Yam mawx ang ah, cao: bung: kaing: koh mau khankix, pon tix sawg tix paoh ka kraung khrai: simex tix kaux heue. Khaix an cao: bung: kaing: koh mau pon tat ka gha: pa koe: rhawm: nawh. Mai: kraung ceep pui an kawx pon peeik tix sawg heue.

Pui Yudax khankix sawn: ka cao: bung: kaing: koh mau khankix, mawh pui caox heue. Mai: ceu pa shiao pingnya mai: via ka ceu pa koh nawh, sawn: mawh pa rah pa see heue. Mai: kix ah nin: “Ceu pa viex, daux lai krub(20:5) mawh pa plak jhi: ka pui an heue”. Pie daux Camlik khraox, deuh ka pui an khankix mawh tau mai: pui tang: ceu tang: cat heue (Mathiex 18:17). Mai: deuh mawh tau mai: sibon: coh kaux heue (Mathiex 21:31-33). Mai: deuh mawh tau mai: pui pa koe: phimap heue (Mathiex 9:16-21, 11: 19, Makux 2:15-16, Lukax 5:36, 7:34, 15:1). Mathiex mawh ka daux pui an heue.

Mai: koh mau gha: khankix daux veng Kapenion (Makux 2:14). Sonsang yie tix kwang ka meung Palatinax, gwieh ra: plak heue. Simiang Romax tom: kwang Samarix, mai: meung Yudax pa koe: plak caong ma: seh, mai: Herut pa ot greem: simiang Romax tom: kwang ka meung Galilie: pa koe: plak caong ma: laong heue. Mawh kheu nan:, Mathiex tom: yuh kaing greem: simiang Romax ang mawh, viang mawh an:, yuh kaing greem: simiang Herut heue. Viang mawh nan:, rhawm: pa deuh pui khankix piang Mathiex ang tang: siyox. Son nawh akhwang pa pon yuh mau gha: daux krax pa ang khaw: ang caw kawx ang yhawm: tix hu. Grawhgrawng: nawh Herut mawh greem: simiang Romax heue. Nyiex dee koh Mathiex gha: tee koe: dee dex mee meung heue. Krax ting pa sitioe ka veng Damase pa koe: plak lih singaix mai: veng Aka (Acre) pa mawh praok rawm: sigrit sigra: pa koe: plak laig singaix kienie phat tix hu: ka meung Iturax (Ituraea) pa kwang simiang Philipux, mai: meung Tarakhawnitix (Trachonitis), mai: baoux tix hoek ka veng Kapeniom, khaix an, tom: phat tix hu: ka veng Galilie: pa kwang simiang Herut heue. Beeh glawm: kaing yuh Mathiex kienie mawh sonsang koh gha: ka piang pui pa lai ling tix hu: mai: kraung khrai: khankix daux krax in, mai: piang pui pa lai ling tix hu: mai: kraung khrai: khankix piang nhawng Galilie: heue.

Nyiex dee koh Mathiex gha:, kheu koe: dee dex rawm: sigrit sigra:, mai: nawh tag yaox tix mhong: ka pa sidiex Simiang Yesux laing laing heue.

Lox pa kok simiang Yesux Khrit, kheu kied krox ka rhawm: Mathiex pa ang koe: paoxpie, yuh ka mawx, yam kok Simiang Yesux ka nawh, mai: nawh hoik koe: satix sonsang hawt khaix Nawh Cao: heue. Daux lai Lukax, ceu pa jah Mathiex tix yuh kienie, mawh ceu pa yuh poi pa ih pa un:, daux nyiex nawh, mai: pui pa koh mau pa mawh paoxgrawm paoxgrux nawh heue. Yam hoik tawng Mathiex tix ka Yesux, pa jah nawh tix pawk kienie mawh ceu pa paoh krax sonsang yaox pui tang: kaux, tix tawng ka Yesux heue. Yam Pharishie: mai: pui tiem: lai khankix yaox ka Yesux sawm: rheap tau mai: pui koh mau, mai: pui ting map ting gham: khankix deuh phimap kah heue. Mai: Yesux deeh pawk lox mai: ah nin:.. " Pui pa nyawm ot nyawm koe:, ang lo pui pa chix sidah dim:, viang mawh kawx nan: mawh pui pa koe: jhawm: saux jhawm: ngia khaing: pa lo pui chix sidah. Lheu: khaing: dee in Aux khaw: tix ot dee mawx lie?" (Lukax 5:59-30). Yesux laug ka pui pa yaox tix kham: pa koeng pui ku kaux heue. Mai: Yesux laug pui pa ang koe: sibrawm mawh kawncaw tix, tix kaux heue. Cao: koh mau tix kaux, daux veng Kapeniom, Simiang Yesux yaox ka pakpeung son lih tix mawh kawncaw tix kaux heue. Yam plak jhi: Lukax tix tiem: ka grawhgrawng: pa deeh pawk Mathiex ka ceu pa kok Yesux kienie mawh nin:, "Mai: nawh prah khawm: uik, mai: kaoh hawt khaix Nawh Cao: heue"(Lukax 5:18). Viang mawh nan:, Mathiex teei ka kraung tix mu: **hu**: taumai: nawh heue. Kraung an, mawh gawng: tiem: nawh heue. Daux pa krai kuad ju didix ah nin:, " Mathiex tiem: ka lai khrit plak lox Hebrie heue". Ceu pa tiem:, pa kaux Yusibia daux lai(The Ecclesiatical History" 2.24.5.cf irenaws. Agaist Heresies 3,1, Origen quoted in Eusebius, 6,25.4) kienie....

Daux kawncaw Simiang Yesux, mawh ngie Mathiex mai: Yohan pa deuh ka lai mhai: kix son ex heue. Mai: koe: lox pa ah nin: "Mawh kheu kied lo, Mathiex tom: tiem: lai khrit nawh heue". Yam jah Mathiex sidiex gau loxbwan: gauxrhawm: gauxrhi: ka pui Yudax khankix heue. Yam hoek bawgyam sonsang hu: kham: mhai: sakse: loxbwan: gauxrhawm: gauxrhi: dee tang: dah, mai: nawh tom: tiem: tix deuh ka loxbwan: gauxrhawm: gauxrhi: lai khrit plak lox Hebrie:, son pui Hebrie: pa kawncaw deug khankix heue. Pa kaux Jerom(Jerome) ah nin:, " Mathiex pa deeh kok mawh Lewix, pa lih tix mawh kawncaw khaing: **pui koh** mau kienie mawh pui pa jah tix

tiem: ka loxbwan: gauxrhawm: gauxrhi: Yesux, ka daux meung Yudax, plak lox Hebrie: son pui Yudax pa mawh pui pa yumrhawm: mai: pa mawh pui pa rieb been pat hak khankix heue. Mai: pui mawx pa deeh tiem: plak lox Greg khaing: lox Hebrie:, ang yaox tix tawng sidawng: heue".

Daux phuk lai (The Monarchian Prologues) ah nin:, "Mathiex tiem: ka lai khrit nawh, daux meung Yudax heue". Daux pa tiem: Yusibia (The Ecclesiatical History, 5.10,3) mai: daux pa tiem: Jerom (Concerning Illustrious Men.36) mai: ah nin:, "Yam hoek pa kaux Pantenax ka meung India, yaox ka lai khrit Mathiex pa tiem: plak lox Hebrie: heue. Mai: lai khrit an, Bathawlamie: mawh pa viex hoek heue". Mai: Awgawtstin ah nin:, " Mawh ngie Mathiex tix kaux khaing: pa tiem: ka satang loxbwan: gauxrhawm: gauxrhi: plak lox Hebrie:, mai: can cao: tiem: lai tang: kaux khankix, tom: tiem: plak lox Greg heue. Pa kaux Jerom, baox thien thie: mai: ah nin:, "Pimphilax (Pamphilus) priex ka Camlik plak lox Hebrie: cie Mathiex, daux nyiex lai, daux Sisria(Caesarea) heue. Viang mawh nan:, ang krai pa tokaux nawh yaox ka Camlik an heue".

Kuad khankix, grum rhawm: tix ah Mathiex mawh pui pa tiem: ka lai khrit tix phuk, plak lox Hebrie: heue. Viang mawh nan:, yam in, pui pa chix lai khankix ce: ka lai khrit Mathiex, pa mawh phuk lai khrit phaoxka:, an, ang mawh lai tiem: Mathiex plak lox Hebrie: heue. Lai khrit Mathiex pa mawh lai khrit phaoxka: an, mawh kheu sidawng: tix yaox, deuh jaong num: tix piang lai khrit Makux, pa mawh pa tiem: Makux heue. Pui pa ot tau mai: Yesux, mai: pa tokaux cao: nawh pa yaox ka Yesux kienie ang tau tix deuh jaong num: tix tom: nie piang phuk lai pa tiem: Makux heue. Ang joeng mawh an, yam phat ka lai khrit phaoxka: an, ang yaox pakpeung pa tiem: khaing: lox Hebrie: heue.

Papia(Papias) pa pui pa sawg tix khrawm: grawhgrawng:, pa sitoe: mai: lai khrit kienie ah nin:, " Mathiex tiem: ka susai pa pon nawh, plak lox Hebrie: krax pa shiao yaong: heue. Viang mawh nan:, pui pa deeh tiem: khankix plak jhi: awm: pa tawng pa yung kix dee bleeh heue". Ceu in, tiem: tix deuh daux lai (Quated in Eusebius, The Ecclesiatical History 3.29,16) khankix heue. Pa mawh tete kienie Mathiex mawh pui pa khrawm: tix cox mai: tix thut ka lai mhai: pa viex lox sidiex pa krai Simiang Yesux heue.

Daux lai khrit phaoxka:, lheu: yaox ka lox sidiex Simiang Yesux khaing: lai khrit tang: ceu heue. Phan: **jhi**: yaox pakpeung kienie mawh

Grawng: bwanson: daix ceu, pa sidiex ka piang gawng heue. Ex pon yumrhawm: ka lox sidiex gau Nawh Cao: pa plak jhi: Mathiex mai: ceu pa khrawm: Mathiex ka lox pa kraï Nawh Cao: khankix mawh jaong num: lai khrit phaoxka: heue. Mawh kheu nan:, ka lai khrit an, tom: kok ceukaux mawh lai khrit Mathiex heue. Grawhgrawng: nawh, sonsang lih tix mawh lai khrit an, kheu Mathiex yaox tix yuh tom: nie ceu heue.

Mathiex mawh pui koh mau. Mawh kheu nan:, nawh pon shiao gawng: tiem: kheu pa nawh ang awm: kawncau tang: kaux pa lih tix mawh kawncau khaing: pui pa teei kax khankix heue. Yam Mathiex prah ka kaing jhaw: pui koh mau, mai: nawh teei tix viex ka gawng: tiem: cie nawh mai: nawh heue. Pui in pa mawh pa kied koeng pui ku kaux kienie mawh pa jah tix tiem: tix plak jhi: ka loxbwan: gauxrhawm: gauxrhi: cie Yesux piang haktiex heue. Phan: plak jhi: ka bwanson: Mathiex, pa mawh pui pa yaox tix kham: pa koeng pui khankix nhaox kienie ang dak doh uik kraï heue. Lheu: khaing: lai khrit, phan: ex sawg ka grawhgrawng: Mathiex ka daux lox kraï kuad mai: been khankix, tag yaox pa nu pa cien heue. Mai: ceu grawhgrawng: nawh, yaox ka tang: siyox tix ceu mai: tix ceu heue. Daux been khankix, grawng: nawh mawh ngie pa keud daux rhawm: tix, mai: mawh pa ang koe: dee bleeh heue. Pa kieh lheu: sugsak kienie lox kraï kuad mai: been khankix mawh kheu sugsak ceukaux Mathiex mai: Mathi tau heue (Kawncau 1:26). Ah ka mawx kawx mawh sonsang plak jhi: ka grawhgrawng: ceu pa tawng ex, awm: pa koe: heue.

Daux lai (Eusebius The Hisroty 3,24,5) ah nin:, "Yam jah, Mathiex sidiex gau loxbwan:: gauxrhawm: gauxrhi: ka pui ceu tix khankix, mai: tiem: tix deuh ka loxbwan:: gauxrhawm: gauxrhi: Simiang Yesux, daux meung Yudax, son pui an khankix heue". Mai: Sokarati (Socrates) ah nin: daux lai (The Ecclesiastical History, 1, 19, of Rubinus 1.9) "Yam kawncau khankix gwieh dee, sonsang kham: mhai: sakse: grawhgrawng: loxbwan:: gauxrhawm: gauxrhi:, mai: Mathiex yaox tix teei beeh glawm: sonsang hu: ka meung Ethiopia (Ethiopia) heue. Mai: pa kaux Ambrok (Ambrose) kraï ka Mathiex sitio: mai: meung Pasia (Persia) heue. Pa kaux (Paulinus of Nola) kraï Mathiex sitio: mai: meung Pathi (Parthia). Mai: pa kaux Isido (Isido) kraï Mathiex sitio: mai: meung Makedonix heue.

Mai: pa yum nawh kawx ah kuceu heue. Pa kaux Klemen (Clement) ah nin: daux (The Miscellanies) "Mathiex yum, awm: pa koe: been

heue". Mai: nawh baow ah nin:, "Mathiex ang ih nex, mai: ang ih kax, viang mawh nan: ih ngie plix khaow, plix ox, mai: taux lhax heue" (Paedadagogus 2.1). Dau lai Tiemad (Taimud) cie Yudax, daux pa kraï kuad khankix dix, plak jhi: mai: ah nin: "Cao: giex kaing: li khankix pah ka Mathiex yum heue". Daux been plak khaix khankix kawx ah yum Mathiex son Simiang Nawh heue. Ceu pa tang: siyox, daux lox pa kraï grawng: yum Mathiex awm: in kienie kheu ang khriyan phaoxka: khankix hiex tawng ka Mathiex hu: ka dee mawx sonsang kham: mhai: sakse: loxbwan:: gauxrhawm: gauxrhi: heue.

Ka lai mhai: pa kied ao: pa sitio: mai: ceu pa yuh Mathiex kienie yaow daux phuk lai grawhgrawng: pa yuh Andare mai: Mathiex (Act of Andare and Matthew) khankix heue. Grawhgrawng: an, viang mawh ceu pa keud kawx, ceu pa kieh kied ao: kienie kheu jawg sara long Sinewat (Cynewulf) tix tiem: kah heue. Daux grawng: an, sonsang kraï loxbwan:: gauxrhawm: gauxrhi:, ploï: ka Mathiex hu: dee Antropopha, pa mawh dee pa ot pui pa pheem: jhawm: (tibbleh ah "pui tiag" kah) pa ih nex jungpui heue. Mai: pui pa pheem: jhawm: an, mawh pui pa ang ih khaomun, mai: pa ang nyaux rawm: plix siiet, viang mawh nan:, ih ngie nex jungpui, mai: nham: jungpui heue. Mai: kix giex ka pui pa hoek khaing: dee tang: dah mai: tik ka ngai: kix heue. Mai: tawx ih cai, sonsang laux dong:, mai: sonsang cien nex heue. Yam ang nyang bax ih ka nex jungpui an khankix, mai: phyawk tix deuh tingoe: ngaix heue. Ka Mathiex kawx yuh awm: an heue. Viang mawh nan:, cai pa tawx kix ih an, ang pon yuh dong: Mathiex laux. Mai: kix ang tawng ka Mathiex deeh yaow, kheu siawp sibrawm: Simiang Siyiex heue. Pa giex ka Mathiex daux thawng, yam hoik koe: (27) ngaix, mai: satang hoek ka Andare sonsang hoek tix taoh Mathiex heue. Ka Andare, son hu: dee an, kawncau taig ngie loe: ngaix heue. Mai: yam hu: Andare mai: paowgrawm tix praok rawm: sigrit sigra:, yaow ka reu ting tix mu:, mai: cao: pa vai reu tix kaux, mai: pui reu ra: kaux heue. Jhak heue, Andare ang tawng ka cao: vai reu mawh Simiang Yesux, mai: pui ra: kaux an, mawh kawncau raoma: heue. Yam jah tix hu:, bhauing ting plu:, Viang mawh nan:, Cao: vai reu pon giex tix vai ka reu ting an, mhawm: mhawm: daux pa daow pa am: heue. Mai: Andare tom: ah nin:, "Aux mawh pui pa hu: krax daux rawm: sigrit sigra: lawx lawx. Phan: ah hoek tom: yamin, hoik ca koe: kao: aliah num. Awm: in, pui pa pon vai reu mhawm: mhawm: ang sax yaow tix

Lawg (7)

Yudax Isakariut

Pa lih mawh kaw pa ang kaux sijax

Daux Camlik khraox, daux rhawm: ex tag lih tix ah nin: "Yudax Isakariut mawh pui pa kied nu tix keud, sonsang doh kah heue". Grawhgrawng: nawh, pui tix kaux pa ot dex mai: Yesux, kheu ang ex pon keud ka ceu pa tik pa tawx ka Simiang Yesux ka daux tawm: taix pui koeng khankix heue.

Daux carang ceukaux kawncau pa viex daux lai Mathiex 10:41, mai: lai Lukax 6:16, mai: Makux 3:19, Yudax Isakariut kawx, viex khawm: heue. Mathiex mai: Makux kieh Yudax Isakariut sidawng:, kheu lox in "Yudax Isakariut, kaw pa ang kaux sijax ka Nawh Cao:" heue. Lai Lukax, kok tix deuh nin: "Yudax Isakariut, kaw pa lih tix mawh pui pa ang kaux sijax" tag yaox tix deeh tiem: awm: in heue.

Pa deeh tiem: daux Camlik Vax, mai: daux Camlik Man, tiem: awm: paox tix, khawm: loe: phuk yuh nin: "Yudax Isakariut, kaw pa tik pa tawx Nawh Cao:." Viang mawh nan: daux lai Mathiex mai: lai Lukax, pa mawh Camlik Inggalik (RSV) pa hoik deeh cox kienie tiem: mai: ah nin: "Yudax Isakariut pa ang kaux sijax piang Nawh Cao:" (Judas Iscariot who Betrayed Him), mai: daux lai Lukax tiem: tix deuh ah nin:, "Yudax Isakariut, kaw pa lih tix mawh pui pa ang kaux sijax" (Judas Iscariot, who became tratitoo) heue.

Daux lai khrit loe: phuk, yaox tix phat ka grawhgrawng: Yudax Isakariut, plak khaix ngie heue. Viang mawh nan:, daux lai Yohan, yaox ka plak jhi: tix deuh ka grawhgrawng: Yudax Isakariut phaoxka: ra: bawg heue. Yam jah Simiang Yesux tix eei: ka pui phwan: rheng: pui khankix koe: rhawm: tix sang giex tix khin: Nawh yuh simiang heue (Yohan 6: 15). Yam tawng kawncau khankix ka pa simie Yesux mai: pa simie kawncau: pui, mawh pa kied tang: siyox kienie kawncau Nawh pa haoh pa hun:, deeh tieh tix lih hu:, mai: ang deeh hu:, mai: Nawh Cao: heue. Mai: Yesux ah nin: ka kawncau Nawh kao: kaux ra: "Pex kawx sang lih hu: khaiing: Aux lie? Mai: Petrux pawk lox mai: ah nin: ka Nawh "Simiang eue, ex tag sang hu: ka pui

mawx?" Maix koe: gumlox ju leeing ju leeing phan: Mai: ex hoik yumrhawm: mai: tawng grawng: mawh Maix, kaw pa Singax Singeh Siyiex heue". Yesux baox pawk lox mai: ah nin: ka kix "Aux hoik laug tix teei pex kao: kaux ra: ang mawh lie?" Viang mawh nan: ka daux pex tix kaux, mawh phicaox heue". Nawh sang ah ka Yudax Isakariut, kawncau: Simon, kheu mawh nawh, kaw pa sang tik sang tawx Nawh Cao: mai: nawh mawh nang tix kaux, ka daux cub kawncau kao: kaux ra: heue (Yohan 6:66-71). Ra: bawg tix bawg, baox tix sito: tix tiem: ka grawhgrawng: pa kraix Marix ka caong Simiang Yesux ka sidah bhawng: Nadu tix pawng, pa kied ngawh tete heue. Grawhgrawng: in, mawh pa kied mhawm: tix yaox heue. Viang mawh nan: pa deeh pawk Yudax Isakariut kienie "Yuh ka mawx ang coh sidah bhawng: in denari loe: yieh (300) plah, mai: tawx ka pui pa hot pa sibhawm: Grawhgrawng: pa siote: mai: ceu pa pawk in, Yohan raw mai: ah nin: daux lai Yohan (12:1-18) "Nawh ah kheu keud nawh, son pui hot pui sibhawm: ang mawh, viang mawh nan:, hoik mawh nawh pui briex, mai viex hau: mau mai: sax teei mau pa sau: ka hau: an heue". Daux Camlik Inggalik pa mawh Simiang Jem (K.J.V), shiao tix deuh ngai: lai bieya (bare) kah heue. Ka ngai: lai "bieya" an, mawh pa deeh tiem: khaiing: lox Greg pa mawh battaseng (Bastazein) heue. Dee bleeh num: cie battaseng kienie mawh "ceu pa teei hu:" heue. Viang mawh nan:, ngai: lai an, daux lox Greg pa shiao daux yaong:, awm: dee bleeh mawh "pa mox tix briex" heue. Ngai: lai in, awm: sidu mai: ngai: lai pa shiao pui Skawtilang pa mawh lit (Lift) heue. Ngai: lai lit kienie koe: dee bleeh "pa yaog tix teei" heue. Mai: koe: dee bleeh yuh nin: "briex tix mox tix teei" khawm: heue. Pa simie Yohan tix ah kienie Yudax Isakariut mawh pui pa ghoing ka kraung khrai:, mai: kheu mawh nawh, cao: priex mau cie kawncau khankix, yuh ka mawx, nawh tom: mawh pui pa briex ka mau khankix khaiing: daux hau: mau, sonsang pon shiao mau tom: nie heue.

Yam dex sang hoek ngaix pa ghoik cie Simiang Yesux, piang haktiex in, yaox ka Yudax Isakariut, daux ceu pa ting ceu heue. Cao: giex kaing: li cie pui Yudax, yaox tix caw krax lulax rhawm:, sonsang hoek Yesux daux tawm: taix kix, daux pa yien yawk pui khankix heue. Grawhgrawng: nawh, kheu mawh bawgyam, nabyam: pui khankix tix moh ka Simiang Yesux heue. Ka daux krax pa lulax rhawm:, pa yaox cao: giex kaing: li pa ting khankix, tix caw an, Yudax Isakariut mawh cao: na naoh krax heue. Daux

lai Lukax 22:3, Lukax ah nin: "Mai: Satan laig ka daux Yudax pa kok mawh Isakariut, pa mawh tix kaux ka daux kao: kaux ra: an heue". Yam an, pa tix kaux daux kawncau kao: kaux ra:, pa kok mawh Yudax Isakariut, hu: ka cao: giex kaing: li pa ting khankix, mai: ah nin: "Phan: aux tawx Nawh Cao: ka pex, pex sang tawx ka aux miex ding? Mai: kix ciang tix tawx mau ka nawh tingoe: (30) plah heue. Mai: tawx lox mukheu grawhgrawng: sang tawx mau ka nawh heue. Mai: nawh eu lox an, mai: sawg bawgyam sonsang pon tix tawx Nawh Cao: ka kix, yam ang cub pui hun ot heue(Mathiex 26:14-16, Makux 14:10,11, Lukax 22:3-6). Daux lai Yohan, tang: siyox ceeix, mai: lai tang: phuk, yam plak jhi: ka bawgyam pa laig satan daux rhawm: Yudax Isakariut heue. Daux lai Yohan viex yuh nin: "Mai: yam ih kix priex bo:, kheu phi: caox hoik sau: pa keud pa sawn: ka daux rhawm: Yudax Isakariut, pa mawh kawn: Simon, sonsang tik sang tawx nawh, Cao: Yesux". Yam ang Yudax Isakariut nyang bax yuh ka pa keud pa sawn: krax pa lhat pa graung cie nawh, viang nawh pon satix khaing: Yesux, kheu krax moh, mai: viang nawh pon akhwang sonsang deeh loh rhawm: tix kawx, mawh giex going heue. Daux lai khrit, dee loe: dah, pa sitio: mai: lox satix, kheu krax moh Simiang Yesux, yaox ka tang: siyox ceeix heue. Mai: daux lai khrit khawm: uik plak jhi: ka pa dha: Yesux tix krai, daux pa lauxrhawm: tix, mai: ah nin:, "Aux krai lox tete telai ka pex, ka daux pex tix kaux, tag sang tik sang tawx Aux heue". Daux lai Makux mai: lai Lukax, ang plak jhi: ka ceukaux, pui pa tag sang tik sang tawx ka Yesux, grawng: mawh Yudax Isakariut heue. Mai: ceu pa tawx satix kawx ang viex heue(Makux 14:18-21, Lukax 22:21-23). Mai: daux lai Mathiex, Yudax Isakariut chawx lox mai: ah nin: "Rabi cue, mawh aux lie?" Mai: Nawh Cao: ah nin: ka nawh "Mawh awm: pa hoik ah maix heue"(Mathiex 26:21-27). Mai: daux lai Yohan 13:18-30, ceu pa plak jhi: Yohan kienie, grum naog mai: tang:, mai: koe: krax pa laighawm: tix mhai: heue. Mai: phan: keud tix yaox ka ceu pa ih priex bo: kienie phaoxka: tag yaox tix keud ka pa ngawm kawncau khankix tix ih priex pa yuh ka mawx heue. Bawgyam pa hoik luan didix, pui pa ih priex daux poi khan kheu: khankix, mai: kix chix ih priex piang ku pa tiem:, mai: ngawm neung tix du ka taix plak khawn: gwiex tix, mai: ih priex ka taix khawn: dawm: tix heue. Plak nie, piang ku: tiem: tix mu:, pui loe: kaux ngawm neung heue. Kheu Yohan neung ka piang naok Yesux, nawh caw tix ot plak khawn:

dawm: heue(Yohan 13:23). Mai: pui pa khan kheu:, yaox tix deuh ka pui pa simie tix yaog min:, plak khawn: gwiex pui pa khan kheu: heue. Grawhgrawng: nawh, piang naok nawh, kheu yaox tix du kaing: pui pa khan kheu: heue. Mai: yam phat ex lai Yohan, sidawng: tix yaox ngawm Yudax Isakariut dee pa yaog min: heue.

Daux yam poi Pasakha, piang pheem: pa deuh pa ih pa un:, ang joeng: mawh koe: priex tang: ceu khankix, mai: baox deuh ka priex loe: ceu heue. Pa tix eu an, kok mawh Charoshiet (Charoshet) heue. Priex in, mawh priex pa klao tix yuh mai: plix khaox, plix ox, pa koe: bee pid heue. Priex in, jhi: yaox ka makut pa yaox tix yuh, yam yaox pui Yudax kix tix yuh siliex daux meung Ejiptux heue. Ra: ceu tix ceu, mawh puan: taux lhax pa song: heue. Priex an, mawh sonsang deeh doh keud ka pa yaox tix kham: krax song:, yam mawh siliex daux meung Ejiptux heue. Mai: loe: ceu tix ceu kienie, mawh khaomun pa ang sau: susai heue. Daux yam poi priex tix bawg an, daux sinax khaomun, khiep ka puan: taux lhax pa song:, mai: cub daux rawm: pa kaux Charoshiet, mai: ih heue. Ka priex an, kok mawh "Khaomun pa cub daux rawm:" heue. Mai: ceu pa tawx cao: khan ka "Khaomun pa cub daux rawm:" ka nyo kienie mawh ceu pa yaog min: ka nyo heue. Simiang Yesux tawx khaomun pa cub daux rawm: an ka Yudax Isakariut heue(Yohan 13:26). Mawh kheu nan:, dee pa ot Yudax Isakariut dex mai: Simiang Yesux kienie, mawh dee pa yaox tix kham: krax yaog min: heue. Mai: lox pa krai Simiang Yesux mai: Yudax Isakariut khankix, mawh lox ah sinax paox tix, tix kaux lai tix kaux, mai: kawncau pa kawm taig khankix, ang tawng ka pa mawh kiex pa yuh ka mawx, mai: pa ah kiex pa yuh ka mawx heue.

Yam lih hu: Yudax Isakariut, kawncau khankix ang tawng lih hu: nawh ka dee mawx. Phan: kawncau pa kawm taig khankix tawng, mai: kix tag ang tawx Yudax Isakariut lih hu: khaing: daux lawg an heue. Kawncau khankix ce: nawh, lih hu: sonsang tawx tix ceu ceu ka pui hot pui sibhawm: , pa mawh beeh glawm: nawh tix ceu ceu, mai: pa sax yuh nawh, yam poi Pasakha, kheu priex Yudax Isakariut hau: mau heue(Yohan 13:29). Yam lih hu: Yudax Isakariut mawh plak bo: heue(Yohan 13:30). Mai: Yudax Isakariut hoik tawng mhawm: mhawm: ka phan: Simiang Yesux hoik sawm:, hu: dee mawx heue. Daux veng Yerusalie, sipeem: ang koe: nie nie, kheu kied tux dee heue. Mai: caomi pa koe: khankix, yuh tix deuh sipeem: pa tokaux kix,

piang gawng Sanlun heue. Paoxgrawm pa ang tawng ceukaux tix kaux, kheu hoik tawx akhwang ka Yesux, sonsang shiao sipeem: nawh. yam poi Pasakha, jao an. Yudax Isakariut tom: viex cao: giex kaing: li khankix. hu: dee an heue. Yam poi Pasakha kheu mawh ngaix naog khix, ponsawm: jhan: riang awm: ponggaix heue. Viang mawh nan:, kheu chix pon lih tix mawh krax sugsak, Yudax Isakariut tom: hoik tawx mhai: ka kix. sonsang jhi: ka Yesux mawh pui mawx heue. Daux been pui Yudax khankix, phan: kawncau tix kaux yaox ka sara nawh, mai: koe: been tix deuh taix tix piang klip sara. mai: ngheut ka sara heue(Mathiex 26:47-50, Makux 14:43-45, mai: Lukax 22:47). Daux lai khrit khankix yam plak jhi: ka grawhgrawng: in tang: siyox ceex heue. Daux lai pa tiem: Lukax, plak jhi: yuh nin:, Yam ah Yudax Isakariut tix ngheut Yesux, kheu tie Yesux ka nawh, mai: nawh ang yaox tix ngheut ka Nawh Cao: heue”. Ceu pa plak jhi: Mathiex mai: Lukax kienie sidawng: tix yaox heue. Mai: lai pa shiao kiex, son ngai: lai ngheut(kiss) mawh Kataphileng (Kataphilien) heue. Dee bleeh kienie mawh ceu pa ngheut ku bawg mai: ceu pa ngheut krax pa kied moh heue. Ceu pa ngheut in, tag yaox tang siyox mai: ceu pa ngheut pui pa ang kaux sijax tix kaux heue.

Jah tom: yam an, krax pa lauxrhawm: khankix, rom tix vung viang ka Yudax Isakariut heue. Daux lai Mathiex (27: 3-10), daux pa phak jhi: grawng: in kienie Yudax Isakariut doh keud doh sawn: ka phimap tix, mai: deeh viex mau tingoe: (30) plah, deeh tawx, ka cao: giex kaing: li pa ting mai: kuad song: khankix, ah nin: “Aux hoik phit hoik lud, kheu hoik tik hoik tawx aux.nham: pa ang koe: dee phit heue”.

Viang mawh nan:, yam ang kix cu tix rieb lox an, mai: taing tix tik mau an, ka daux nyiex bwan: mai: lih hu:, mai: hu: rhawt tokaux tix yum heue. Khaix an, hoik uik grawng: Yudax Isakariut heue. Mai: pa kaux Ebibrot (A.B Brouce), plak jhi: tix tiem:, grawng: pa sitioe: mai: Yudax Isakariut yuh nin: “Nawh brai: tix yaox, son ceu pa yuh nawh pa brai: heue. Viang mawh nan:, ka daux rhawm: nawh, yaox ka ceu pa mhawm: pa ang pon kham:, son phimap nawh heue”.

Daux lai Mathiex, ah nin:, “Cao: giex kaing: li pa ting khankix, liag hakitex sonsang yuh dee sipaung nyo kah heue. Grawhgrawng: nawh, kix ce: mau an, ang khaw:, mai: beenli tix sau: ka daux dee deuh mau, mawh kheu ngawh nham: heue”. Mai: daux lai kawncau, ah nin: Yudax Isakariut liag haktiex ka mau an, mai: ka piang haktiex an, nawh goh glung: kaing: tix,

mai: vaig nawh bih, mai: kraung vaig nawh lhua khawm: uik heue. Daux lai kawncau (1:18), Yudax Isakariut goh glung: kaing: tix kheu viex yuh nan:, yuh ka mawx, tee: mawh plaux nawh pa tokaux tix, phan: ang mawh nan:, rau khaing: dee lhaong: heue.

Grawng: pa sitioe: mai: grawng: ceu pa yum Yudax Isakariut kienie, pa kaux Mofat (Moffatt) toe: tix tiem: ka lai kawncau (1:18), daux pa lhat pa graung yuh nin: “Vaig Yudax Isakariut lih tix ploh mai: bih, mai: kraung vaig nawh lhua tix lih heue”. Daux Camlik Inggalik (R.S.V) pon teei dee bleeh, “Ploh tix hu: plak greem: (Swelling up)” heue. Kheu plak jhi: yuh nan: pa plak jhi: Mofat, tee: mawh heue. Mai: pa kaux Krama(Cramer) baoh ah nin: “Yudax Isakariut pon jhawm: saux tix mu:. Kheu jhawm: saux an, tokaux nawh lih tix ploh, mai: to: nawh lih tix ting heue. Kaing: nawh kawx kheu lih tix ploh, pie sara sidah, ang chix yaox ngai: nawh. Mai: kawng khankix lih khaing: to: nawh, mai: rawm: pa awm: rawm: mya kawx lih heue. Mai: nawh yaox tix kham: tom: yum tix heue. Mai: pui khankix via ka dee yum nawh, kheu kied sioe cux pa lih khaing: to: nawh heue”. Mai: pa kaux Okumenia (Occumenius) baoh tix nih nai krao lao yuh nin: “To: Yudax Isakariut gwieh ra: plak mai: yum, kheu ling brung tix mu:, dig ka Yudax Isakariut heue”. Plak khaix kawx, pa kaux Dante(Dante) pa tiem: lox leng, tiem: tix plak jhi: yuh nin:, “Yudax Isakariut hoek daux lawg plak greem: cie mawnarhok heue”.

Grawhgrawng: pa hoik krao khawm: uik, mawh ngie pa plak jhi: ka pa yuh Yudax Isakariut plak piang heue. Ceu pa ting ceu kienie mawh pa yuh nawh daux rhawm: tix ngie heue. Phan: tawng ka dee bleeh ceukaux Yudax Isakariut pa yuh ka mawx, tag tawng ka daux rhawm: cie Yudax Isakariut pa simie ex tix tawng heue.

Pa kaux Jerom(Jerome) ah nin:, “Ceukaux Isakariut sitioe: mai: ceukaux Isakha. Dee bleeh Isakha kienie mawh ngawh, phan: ang mawh nan:, mawh laksawng: heue(Yam Jah 30:18). Ceu kaux an, jhi: ka ceu pa ghoing Yudax Isakariut heue. Mai: pa kaux Ti Ke Chexaine(T.K.Cheyne) ce: ceukaux Yudax Isakariut sitioe: tix mai: ceukaux Hirochit (Hierochites), dee bleeh nawh mawh pui veng Yerikho:. Ah Yudax Isakariut mawh pui veng Yerikho: heue. Ceu in kix ang koe: dee bleeh heue.

Mai: ce: Isakariut sitioe: mai: lox Lietding (Latin) pa mawh Sikari (Sikarios) mai: sitioe: mai: lox Greg pa mawh Siġario(Sikario) heue. Dee

bleeh kienie "Pa giex gawn:" heue. Daux lai kawncaw 21:38, shiao tix deuh dee bleeh Sikari (Sikarios) mawh "Pui pa hawt khaix pui Ejiptux pa mawh cao: pa tieh feen: tix kaux" heue. Daux lai Simiang Jem tiem: mai: ah nin: "Cao: pa pah pui yum khankix (murderers)" mai: daux Camlik pa hoik cox (R.S.V), toe: tix tiem: mai: ah nin: "Cao: pa jiang tix pah pui yum khankix (Assasis)" heue. Mai: pui pa kaux Sikari (Sicari) khankix mawh pui pa hai: pa meug heue. Mai: kix mawh pui pa jhak ngie bwanson: pui ceu tix, mai: kix mawh pui jhak plak beenli ih tix ngie heue. Mai: pui an kix ang joeng mawh pui pa yuh tix deuh sijax mukheu son tieh feen ka pui Romax, mai: baow mawh son jiang tix plaux ka kix khawm: heue. Phan: mawh yuh nan:, Yudax Isakariut tag mawh pui Yudax pa haing tix viexrhawm: tix moh ka pui ceu tix heue. Mai: ceu pa sitioe: nawh mai: Yesux kienie tag mawh sonsang haok hwan: pui ceu tix pa simie nawh tix yuh heue. Awm: pa ce: in, grawhgrawng: pa ang pon mawh tix ceu kienie mawh kheu viex ceukaux Isakariut daux ceukaux keeing::: nawh khawm: heue. Daux Camlik pa tiem: ka taix, pa kied mhawm: pa tiem: tix deuh, plak lox Greg ang ah, daux Camlik Inggalik pa hoik cox tix toe: tix tiem: ang ah, ah nin:., "Yudax Isakariut kawm: Simon Isakariut (Judas Isacariot the Son of Simon Isacariot) heue. Mawh kheu nan: dee bleeh ngai: lai pa mawh Isakariut kienie tag yaow tix sitioe: mai: keeing::: mai: kawm: khawm: ra: kaux heue.

Daux Camlik pa tiem: tix deuh plak lox Sarix (Syria), yam tiem: ka Yudax Isakariut, tik ka (I), mai: tiem: yuh nin: (Judas Scariot) heue. Mai: ngai: lai Scortya (Scortya) mawh Sakarita (Scoreta), plak lox Greg, mai: dee bleeh nawh kienie mawh sibex pa caing ka hak heue. Yudax Isakariut mawh cao pa priex mau, daux cubcaw: kawncaw heue. Kheu koe: hau: nie, daux sibex hak an, pon sau: ka mau tom: nie, daux hau: an heue. Jao an, pa kaux Laik Fut (Lightfoot) ce: mai: ah nin: "Yudax Isakariut tag ceep ka sibex hak heue". Phan: sitioe: ka ngai: lai Isakariut (Isacariot) mai: ngai: lai Scortya (Scortya), tag yaow tix ah nin:., "Yudax Isakariut kawm: kiex keeing::: khankiex, mawh pui pa eci: ju tix mai: kaing hak" heue.

Mai: pa chix pon mawh tix ceu, pa sitioe: mai: ceukaux Isakariut (Isacariot) kienie caukaux an, tee: mawh ceukaux dee, khawm: heue. Daux lox Hebric:, lox pa mawh It (Ish) mawh jungpui. Mai: Kariut (Kerioth) mawh ceukaux dee heue. Phan: kleuk ka lox in ra: ceu kienie Isakariut pon teei

dee bleeh mawh " Jungpui khaing: veng Kariut" heue. Ka ceukaux veng Kariut, daux Camlik prim: plak jhi: ra: bawg, daux Amot (2:2) tix bawg, mai: daux Yoshux (15:25) tix bawg heue. Daux lai Amot, pa plak jhi: ka veng Kariut koe: daux meung Mawbax (Moab), mai: veng Kariut pa viex daux lai Yoshux koe: daux meung Yudax (Judah) heue. Mai: Yudax Isakariut ang doh pon mawh pui Mawbax, Phan: nawh mawh pui Mawbax, tag mawh pui tang: ceu tang: cat heue. Phan: mawh pui Yudax, pa hoek khaing: Yudax kienie tag mawh kawncaw heue. Daux cubcaw: in, mawh ngie nawh tix kaux khaing:, pa ang mawh pui Galilie: kienie mawh ceu pa tang siyox heue.

Phaoxka:, phan ce: ka Yudax Isakariut mawh pui brai: tix kaux kienie tag lud heue. Daux Camlik tang: phuk, pa mawh pa ang viex daux Camlik khriyan, ceu pa viex grawhgrawng: Yudax Isakariut ceex kienie mawh pa daow pa am: heue. Daux Camlik pui Arab, yaow ka tiem: tix deuh, pa plak jhi: ka grawhgrawng:, pa mawh yam awn: ju Yudax Isakariut heue. Been pa plak jhi: daux lai an kienie pie yam awn: ju Yudax Isakariut, phicaow ot daux rhawmrhi: nawh heue. Yam Simiang Yesux mai: Yudax Isakariut sidah paow tix, yam kawm awn: ju kiex, mai: Yudax Isakariut simang (tap toi) ka Simiang Yesux heue. Yam an, Simiang Yesux grheu: ka phicaow pa ot daux rhawm: Yudax Isakariut, mai: phicaow an, lih tix mawh sox ting pa lung, mai: lih khaing: Yudax Isakariut, mai: tiem: tix deuh yuh nan: heue. Yam phat ka lai khrit pa viex daux Camlik, Yudax Isakariut ang tang: siyox tidtix, mai: kawncaw tang: kaux heue. Phan: kawncaw tang: kaux tawng ka ceu pa keud Yudax Isakariut kienie Yudax Isakariut ang doh pon yuh pa keud nawh heue. Son pau ka ju Simiang kix, ceu pa awn: ang ah, ceu pa caox ang ah, tag yuh daux pa ang cien taix, pa ang cien caong heue. Kheu mawh Yudax Isakariut cao: priex mau cubcaw: kawncaw, ang doh koe: grawng pa lud, ceu pa yumrhawm: kawncaw kix ka nawh heue. Mai: daux lai Yohan (12:6), viang Yohan kok cao: briex ka Yudax Isakariut kawx, kheu Yohan tiem: ka lai nawh, khaix hoik hoik grawhgrawng: an (70) num heue.

Daux grawhgrawng: in, ex pon tix yaow grawng: tix ceu, pa mawh ceu pa ang Yudax Isakariut kaux sijax piang Simiang Yesux heue. Mai: kawncaw kix ang tawng ka grawng: pa keud Yudax Isakariut daux rhawm: pa yuh ka mawx heue. Mawh ngie khrit pa tawng heue. Mai: pa kaux

Dblu Ief Motan ah nin: “Jah tom: yam hoik eei: ka khaomun phwan: lon mai: kax ra: mu:, Yesux yaox ka simie pa ang kaux sijax, daux rhawm: Yudax Isakariut heue(Yohan 6:70-71). Simiang Yesux paoh ka pa mawh Yudax Isakariut lawx lawx. Mai: yam Yudax Isakariut tawng ka Yesux tawng ka ceu pa keud nawh, mai: nawh tat tix plaux ka Yesux, kheu ang nawh lai pon kham: pa paoh Yesux heue.

Awm: pa hoik krai phaoxka: nux, pon tawng ceeix ka jhawm: pa koe: Yudax Isakariut, daux ceukaux nawh heue. Mai: phan: toe: dee bleeh Isakariut mawh pui Kariut kienie Yudax Isakariut ang mawh pui Galilie:, mai: ang awm: mai: kawncau tang: kaux kix, mai: tag tang: tix yaox heue. Torn: yam jah, daux cubcaw: kawncau, nawh tag awm: nyo sinie tix kaux heue. Mai: nawh tag yaox krax lauxrhawm: kheu hoik grai:, pa simie tix ao: min: mai: pa simie nawh khankix heue. Daux kawncau kao: kaux ra:, sonsang tawng ka krax ot krax koe: Yudax Isakariut ang doh yie heue. Daux kawncau, nawh ot dee pa ting ceu, mai: nawh mawh cao: priex mau kawncau khankix heue. Daux Camlik Greg, Yudax Isakariut mawh cao: kaing:, daux kawncau kao: kaux ra: heue. Ceu an viang ex ang pon rieb kawx koe: grawng: pa pon mawh heue. Daux priex bo: pa ghoik, dee cao: pa yaox tix kham: krax pa yaog min:, plak taix gwiex Yesux, ang koe: krax pa ang yumrhawm:, Yudax Isakariut mawh cao: bung: kaing pa ting tix kaux heue. Viang mawh nan: nawh ang viex daux carang loe: kaux, pa mawh Petru, mai: Yakop, mai: Yohan pa ot dex mai: Yesux heue. Mai: kheu Yudax Isakariut ang mawh pui Galilie:, daux rhawm: nawh tag sang lih tix koe: yuh nin:, “Daux kawncau, aux mawh nyo sinie tix kaux heue”. Viang nawh mawh cao: bung: kaing: pa ting, daux cubcaw: nawh kawx, chix lih tix koe: rhawm: boh, kheu koe: pui pa ting khaing: nawh heue. Ceu pa bohrhawm: mai: ceu pa ghoing: khankix, yam lih tix koe: tix kwang daux rhawm: nawh, rhawm: moh pa koe: piang Yesux, lih tix tieh loh tix mawh, ceu pa koeng mai: ceu pa pawk bix, mai: dee ghoik, lih tix mawh pui pa ang kaux sijax, piang Simiang Yesux heue.

Grawhgrawng: tang: ceu, pa mawh pa sitioe: mar: ceu pa ang kaux sijax Yudax Isakariut piang Nawh Cao: pa tee: mawh kienie pa sitioe: mai: Yesux, pa mawh ceu pa simie nawh, kheu ang lih tix mawh heue. Pa sitioe: mai: ceu in pon ce: ra: ceu heue. (i) Yam ang Simiang Yesux lih tix mawh cao: bung: kaing: pui ceu Yudax, pa tieh pa seen pa mawh pa simie Yudax

Isakariut kienie Yudax Isakariut lih tix ang kaux sijax piang Yesux. mai: lih tix mawh cao: kham: mhai: sakse: plak simiang haktiex, daux pa brai: rhawm: sonsang klawd ju tix heue. (ii) Pa kaux Mak Rutapox (Mark Rutherford) jhak plak pa mhawm:, mai: krai ka pa keud nawh, grawng: pa sitioe: mai: ceu pa ang Yudax Isakariut kaux sijax yuh nin: “Daux rhawm: Yudax Isakariut, sidawng: tix yaox, koe: rhawm: pa mhawm:, daux pa simie nawh heue. Grawhgrawng: nawh, phan: nawh ang koe: ceu pa simie yuh nin:, nawh ang tau tix rieb ka pa kok Yesux ka nawh mawh kawncau heue. Mai: ceu pa yumrhawm: Yesux mai: kawncau khankix ka Yudax Isakariut kienie ang koe: krax ceu pa ang yumrhawm: heue. Grawhgrawng: nawh phan: kix ang yumrhawm: ka nawh kienie kix ang doh kieh nawh priex mau heue. Yudax Isakariut mawh pui Yudax, mai: nawh ang awm: pui Galilie: pa phai: rhawm:, mai: pa vaorhawm: viang mawh nan: nawh mawh pui pa koe: riangrao pa nhim:, mai: pa chix jhak plak mhawm:, mai: pa chix pon keud sivoe ngai: heue. Mawh kheu nan:, nawh tawng ka pa tag sang yaox Yesux tix kham: krax pa tuktiak tukte, phan: sipup mai: pui Romax pa mawh pui pa kwang haktiex heue. Jao an, mawh ngie kieh Yesux dux tix ka ceu an, ang mawh sonsang plaux Nawh Cao:” plak jhi: yuh nan: heue.

Grawhgrawng: pa tang: siyox mai: pa krai pa awm: plak piang kawx baox koe: heue. Phan: Yudax Isakariut sitioe: tix mai: Si-krio(Siarios) kienie nawh mawh pui pa kied moh ka pui ceu tix, mai: nawh mawh pa hoik yuh tix deuh sijax mukheu, sonsang grheu: tix tik ka pui Romax pa mawh pui pa kwang haktiex, khaing: meung Palatinax, grawng: ceu mawx ang ah, krax ceu mawx ang ah heue. Mai: daux rhawm: pui Yudax khankix, kix mawh pui pa laug Siyiex heue. Ka lox “Pui pa laug Siyiex” kienie pui Yudax kix toe: dee bleeh mai: ceu pa pon yaox tix kwang haktiex mai: ceu pa pon tix yaox tix kwang ka pui tang: ceu tang: cat heue. Daux pui pa keud pot jun pot yuh nan: cubcaw: Si-kri (Sicarii) kienie mawh pa kied lheu: khaing: paox tix heue. Kheu yaox nawh pa sidiex pa yuh Yesux, Yudax Isakariut tom: yaox, grawng: pa keud pot jun pot kix, tag lih tix mawh mu:, tag lih tix mawh to:, kheu Nawh Cao: heue. Kheu keud pot jun pot yuh nan: Yudax Isakariut deuh rhawm: tete telai, mai: sitioe: ka Yesux heue. Yam yaox Yudax Isakariut ka krax pa lauxrhawm: ka ang Yesux hu: sivoe, sonsang pon siawp sibrawm haktiex, viang mawh nan:, hu: sivoe ka krax khaoxlhak kienie ceu pa keud pot jun pot kix lih tix laux heue. Daux ju Yudax Isakariut,

sawn: tix yaox ka pa tat ceu pa ting ceu ra: bawg ha: Tix bawg, awm: pa plak jhi: daux lai Yohan 6:15, mawh bawgyam pa coca pui meung kix: tix yaog ka Yesux mawh Simiang heue. Yam an, Yesux yaox pakpeung pa sang tik sang tawx Yudax Isakariut ka Tix heue (Yohan 6:70-71). Yam an, daux rhawm: Yudax Isakariut lih tix mawh rhawm: seeing rhawm: brai: piang Simiang Yesux pa mawh paoxgrawm pa mhawm: mai: mawh bawgyam, pa keud tix sang tik sang tawx ka Nawh Cao: heue. Yam tawng nawh ka som: pa keud pot jun pot tix, nawh lih tix koeng ka Simiang Yesux pa kieh pa keud pot jun pot tix, laux heue.

Bawgyam pa viex daux lai Mathiex 26: 14-16, mai: lai Makux 14: 10-11, mai: lai Lukax 22:3-6, mawh bawgyam pa yaox Yudax Isakariut tix tat pa ting ceu ra: bawg tix bawg heue. Yam an, mawh bawgyam brug Simiang Yesux tix, kawm la laig ka daux veng Yerusalim heue. Mai: Yudax Isakariut keud pot jun pot yuh nin: "Simiang Yesux tag laig ka daux veng Yerusalim awm: Simiang lien pa ting pa giex ka man: silhak pa tieh pa feen heue". Viang mawh nan: ang awm: ka ceu an, yam yaox nawh hu: Simiang Yesux ka krax khaoxlhak, pa keud pot jun pot nawh lih tix laux heue. Krax moh pa koe: piang Yesux lih tix tieh loh, plak krax ceu pa koeng heue. Pa keud pot jun pot nawh, kheu ang lai lih tix mawh mu: mawh to: nawh tom: lih tix koeng ka Yesux, mai: lih tix keud tix tik tix tawx ka Yesux daux tawm: taix cao: pa giex kaing: li pa ting khankix heue. Kheu ang Yesux lih tix mawh pa simie Yudax Isakariut, krax moh nawh, pa koe: piang Yesux, lih tix tieh loh, plak krax pa koeng, mai: Yudax Isakariut lih tix yuh kaing pa tik pa tawx heue.

Mai: sonsang yuh kaing pa tik pa tawx awm: in, num: riah pa kieh Yudax Isakariut yuh kienie ang doh pon prah ka ceu pa ce:, pa mawh rhawm: pa ghoing ka mau heue. Phan: awm: in kienie Yudax Isakariut yuh kaing pa seeing pa brai: tix ceu, daux lai, mai: daux been jungpui pa mawh pa yuh ceu pa tix pa tawx ka Yesux ka mau tingoe: plah, pa koe: ngie ngawh jum, siliex tix kaux heue (Lai Lih Hu: 21:32). Yam an, tee: lih tix koe:, satang pui pa appong ka Yesux, tawx mau miex ding miex glang: heue. Sonsang pon ka mau an, Yudax Isakariut tee: yuh ka kaing ceu pa tik pa tawx heue (Yohan 11:57).

Daux ceu pa krai ka pa siote: mai: ceu pa tik pa tawx Yudax Isakariut khankix, daux pa plak jhi: ka grawhgrawng: pa keud pot jun pot nawh, ang

nyang grum naog heue. Yudax Isakariut mawh pui tix kaux pa viexrhawm: tix moh ka pui ceu tix heue. Daux nawh koe: pa keud pot jun pot. Mai: nawh yumrhawm: ka Simiang Yesux, tag sang kieh pa keud pot jun pot nawh grum naog heue. Pa kaux Di Kaingse (De Quince) ce: mai: ah nin: "Yam yaox yuh Simiang Yesux tix kaing koi koi, daux pa ang dak chix uik krai kienie Yudax Isakariut khin: tix kieh ka Nawh yuh sonsang lih tix mawh, awm: pa lo pa simie nawh heue. Phan: awm: in, daux rhawm: Yudax Isakariut, ang mawh krax pa keud, sonsang plaux ka Yesux piang khaoxlhak, viang mawh nan: mawh ngie krax pa yuh Yudax Isakariut, sonsang plak jhi: Yesux siawp sibrawm Tix heue. Phan: yuh nan: grawng: pa mawh daux sipeem: Kesasemanix, tag mawh daux pa laighawm: heue. Yam Yudax Isakariut ah nin: ka Yesux "Rabi eue, kieh nyawm ot", mai: ngheut ka Nawh Cao: kienie piang pak ngai: nawh, pakpeung pa kied sigraung nawh tag lih tix koe: mai: awm: ah daux pa keud pot jun pot tix yuh nin: "Simiang eue, Simiang eue, plih siawp sibrawm Maix lih, mai: taoh pui ceu Maix liak" heue.

Aux ce: yuh nan: plak nie, awm: pa keud pot jun pot Yudax Isakariut plak piang heue. Khaix hoik hoik grawng: pa mawh daux sipeem: Kesasemanix, jao pa tix, Yudax Isakariut grai: khaing: tan: lie? Mai: daux nyiex prawng see:, yam chawx cheng ka Simiang Yesux, kheu pa tix, nawh ang viex daux pa kham: mhai: sakse:, plak tang: plak Simiang Yesux lie? Mai: lheu: khaing: pa kham: kawncaw tix kaux, pa hawt khaix Yesux mhai: sakse: pa kaux cong: mhai: sakse: koe: dee mawx? Mai: Yudax Isakariut plaux Cao: tix, jao pa tix lie? Tete kienie daux bawgyam an, pa keud pa coca nawh, lih tix nai: nawk heue. Mai: nawh tag deeh doh keud doh sawn:, kheu plaux ka Simiang pa moh nawh heue. Ceu pa kieh ex lauxrhawm: grawng Yudax Isakariut kienie nawh ang rieb awm: pa koe: Simiang Yesux, viang mawh nan: nawh keud tix yuh awm: pa simie nawh tix yuh heue.

Pui khankix sawn: tix yaox ka pa keud nawh daux leng lang: ju kawm: khrit yuh nin: "Yuh ka mawx, Yudax Isakariut phex yuh ka krax pa seeing pa brai: awm: in?" Mai: sonsang tik sang tawx ka Tix mawh Yesux pa laug ka Yudax Isakariut lie? Yesux laug ka Yudax Isakariut khawm: tawng ka pa tag sang tik sang tawx nawh ka Tix, mai: ang lo tix ah nan: Ah kawx lhat ah heue. Ceu pa keud awm: in, tag mawh phit ka Siyiex, Phan: tee: awm: in, tag mawh, Simiang Yesux cot pui tix kaux hoek, son yuh phimap

dau pa ang pon via heue. Dau phuk lai pa toe: dee bleeh Khrit mai: lai Khrit (The Dictionary of Christ And the Gospels), grawhgrawng: pa siteo: mai: Yudax Isakariut, pa mawh phuk lai pa tiem: pa kied mhawm:, pa mawh pa tiem: pa kau Je Ji Tiet deeh tiem: ka ceu pa ah: pui ra: kau heue. Tix ceu, mawh pa ah, pa kau Lavata(Lavater) heue. Lavata ah nin: "Yudax Isakariut kienie awm: Satan pa koe: riangrao pa chix pon mawh kawncau heue." Ra: ceu tix ceu, mawh pa ah, pa kau Prietsinsi (Pressense) heue. Prietsinsi ah nin:, "Pui pa kied sidu mai: phicao kienie mawh kawncau pa lud loe: krax keud krax sawn: heue". Ceu pa ah nin: kix, plak jhi: yaox ka riangrao pa chix pon mawh Yudax Isakariut pa ting pa lhaong:, mai: grawng: rau nawh dau phimap heue.

Lai Kawncau (1:25),plak jhi: ka grawng: Yudax Isakariut ra ghoik heue.Dau grawng: an,viex nin:, "Sonsang kieh nawh tee kaing cao: sidiex cao: gau in, mai: sonsang yuh kawncau pa ting, ka dee hoik rau hoik gwieh Yudax yuh ka mawx, sonsang pon hu: nawh tix, ot dee ot cie tix heue. Mai: kix nieb tix yaox, mai: caw ka Mathi heue". "Dee ot nawh" kienie mawh dee mawx, ang ex lo tix ah. Mai: pa siteo: tix mai: grawng: Yudax Isakariut, dau khaing: ceu pa tiem: sara cao: sidiex (a) sara, pa toe: dee bleeh khankix, dau pa tiem: pa kau Origin (Orege) kienie yam tawng Yudax Isakariut tix ka pa lud pa loe: tix ding mawx ding an kienie nawh keud tix plaux pa tokau tix, laung laung, sonsang yaox nawh ka Yesux, dau dee Hedi (Hades), pa mawh dee pa koe: pui pa hoik yum khankix heue. Dee an, yam yaox Yudax Isakariut ka Yesux, nawh tag khyox khaw: ka Yesux, sonsang pluat ploi: ka phimap nawh heue. Mai: grawhgrawng: Yudax Isakariut, ceu pa tiem: pa kau Mat Rutapho (Mark Rutheford), dau lai nawh, ah lox ghoik yuh nin:, "Yudax Isakariut ang kraik ka pa mawh nawh ka pui tix kau kawx, mai: ang sawg ka pui pa kham: mhai: sakse: plak tix heue."

Paograwm: nawh khaing: Kerok (Kerioth), tag ah yuh ka mawx, son nawh lie? Mai: phan: Simiang Yesux yaox ka maox, dau taix Yudax Isakariut, sonsang plaux ka pa tokau tix, yuh ka mawx, tag tieb ka Yudax Isakariut, sonsang ang plaux pa tokaxu tix ang mawh lie? Yam Nawh Cao: giex ka klip Yudax Isakariut, dau krax moh, mai: yam grux Yudax Isakariut ngawng tix piang tiex kheu hoik doh keud doh sawn: ka phimap tix, yuh ka mawx. Nawh Cao: tag yaog ka Yudax Isakariut, dau krax moh, mai: pluat ploi: ka phimap pa yuh nawh, pa ang nawh tawng, mai: tag ngheut ka nawh

ka jheeh tix, mai: pa kau Mat Rutapho keud tix yaox, mai: plak jhi: yuh nan: heue.

Phan: ex deuh phimap, dau pa ang caoxrhawm:, mai: dau pa nieb ah ka Yudax Isakariut, pa tik pa tawx nawh ka Simiang Yesux kienie caw tix doh keud ka lox pa sidiex Simiang Yesux didix, pa mawh dau lai Yohan 8:7, "Kaw pa ang koe: phimap ka dau pex, kieh nawh tee simaox dheem: ka nawh ka: ha:".

Yakop (Pux Simiang Yesux)

Pui pa lih tix mawh paoxgrawm, khaing: pa mawh pui koeng ka:

Yakop pux Simiang Yesux. ang viex ka daux carang kawncau kao: kaux ra: heue. Phaoxka.: nawh mawh pa tieb tie ka Yesux. Viang mawh nan.: dee ghoik. Yakop lih tix mawh cao: bung: kaing: ceucao: kawn: khrit pui Yudax. Mai: yum kheu yumrhawm: tix ka beenli khrit heue.

Pa sitioe: mai: grawng: Yakop. daux pa kraï Pawlux. ceu pa kok ka nawh mawh kawncau tix kaux kienie, yaox mawh tete heue. Khaix hoik tieh loh Pawlux tix, mai: yam hoek nawh ka veng Yerusalieim. kraï ka yaox mai: Petruux heue. Khaix an Pawlux baox tix kraï. daux lai Kalatix 1:19 yuh nin. "Phan: lheu: khaing: Yakop pux Simiang, ang aux yaox kawncau pa ting tang: kaux tix kaux kawx heue".

Grawhgrawng: lai in, pui pa chix pingnya plak lai Camlik khraox tibliah. thiang: ka ceu pa awm: mawh nawh. kawncau tix kaux heue. Mai: kix ce: dee bleeh lai in mawh nin. "Aux yaox ka Petruux." Ang yaox ka kawncau tang kaux. Viang mawh nan: yaox ka Yakop tix kaux khaing: heue. Yuh ka mawx kawx. ex yumrhawm: ka lai in. grawng: deuh Pawlux mai: ceucao: kawn: khrit pa koe: phaoxka: dix. ka Yakop mawh kawncau tix kaux heue. Ang joeng mawh an. Yakop mawh cao: bung: kaing: ceucao: tete daux Yerusalieim heue.

Mai: ceu pa ang ex tawng. grawhgrawng: pa sitioe: mai: Yakop. koe: tom: nie heue. Mai: ex tag yaox tix keud sawn: tom: nie ka grawhgrawng: nawh heue. Viang mawh nan.: rhawm: pa deeh tieh loh nawh tete, piang Simiang Yesux. ex yaox tix tawng kriem kriem kre kre heue. Yam jah Yesux tix yuh kaing satsana. yaox ka Simiang Yesux mai: nyiexma nawh. lai ling ing tiang tix yuh kaing tau. daux meung Galilie.: veng Kanax tix bawg (Lai Yohan 2:1). yam hu: ka daux veng Kapeniom tix bawg (lai Yohan 2:12) heue. Viang mawh nan.: plak khaix Simiang Yesux mai: paoxnyiex paoxma: Nawh. lih tix sidawng: tix yaox ka ceu pa ang lai ih rhawm: paox tix heue. Daux lai Makux 3:20. paoxnyiex paoxma: nawh ah. Yesux mawh pa yhot mai: daux lai Makux 3:31-33. paoxnyiex paoxma: Nawh Cao: hoek tix tieb ka Nawh. kheu ce: kix. yuh pa hai: pa meug heue. Pux Nawh

khankix. ang yumrhawm: piang Simiang Yesux. Mai: kix nieb ah ka Nawh sonsang yuh pa am.: kheu iak keud kix heue (Yohan 7:5). Daux lai Mathiex 10:30. ex yaox tix phat ka lox pa kied kin pa ah Yesux nin.: "Pui pa koeng khankix. tag mawh daux nyiex tokaux tix heue. Lox inkix. mawh lox pa plak jhi: pa yaox to: Yesux tix kham: heue.

Yam yaox tix phat ka Camlik khraox. ceu pa deeh tieh loh rhawm: nyiexma: cie Yesux. ex ce: ang plak jhi: sidawng: heue. Viang mawh nan.: daux lai kawncau 1:14. Lukax plak jhi: ka grawng viex pux Simiang Yesux. daux carang pa ih rhawm: tix rawgbwan: tau mai: kawncau. khaix hoik yum Yesux piang khaoxlhak. yam deeh kaoh im: Nawh. daux loe: singaix. khaix hoik haok meung raoma: heue. Khaix an. ang awt rheung.: ex yaox Yakop mawh cao: bung: kaing: pa ting daux. ceucao: Yerusalieim heue. Mai: yam hoik lih Petruux khaing: thawng. ceu pa yuh nawh phaoxka.: mawh ceu pa tawm: lox ka Yakop. mai: puxaik khankix heue (Kawncau 12:17). Yam yaox tix sipup mai: krax sugsak pa ting ceu. pa mawh son pon pui tang: ceu tang: cat tix laig daux ceucao.: yuh ka mawx. Yakop pa mawh cao: bung: kaing: ceucao: kienie keud mhawm: mhawm.: mai: kieh krax sugsak an sidawng.: kheu lox pa ah nawh. daux pa rah pa see heue (Kawncau 15:13-21). Mai: yam hoek Pawlux veng Yerusalieim mai: mau tan.: pa pon koh son pui sia khankix. Yakop mai: cao: bung: kaing: ceucao: khawm: uik. rieb ka nawh heue (Kawncau 21:18). Mai: yam jhak ka lai Pawlux khankix kawx. yaox awm: an heue. Daux lai Kalatix 1:19. plak jhi: ka yam hoek Pawlux ka veng Yerusalieim phaoxka.: khaix tieh loh tix. pa hoek yaox nawh. mawh Yakop. mai: Petruux heue. Mai: khaix hoik rheung: kao: pon:

num. yam baox Pawlux tix hoek ka veng Yerusalieim ra: bawg tix bawg. yaox ka Yakop. mai: Petruux. mai: Yohan kix. mawh cao: bung: kaing: pa ting daux ceucao: kawn: khrit mai: kix khawm: uik grum rhawm: tix rieb ka Pawlux. sonsang yuh nawh satsana ka pui tang: ceu tang: cat heue (Kalatix 2:9). Krax pa hu: Yakop. pa lih tix mawh cao: bung: kaing: ceucao: khaing: pa mawh pui pa koeng ka Yesux kienie mawh pa kied rheung: mai: mawh krax pa kied lang: heue.

Khaix hoik yaox tix tawng ka grawhgrawng: Yakop. khaing: Camlik khraox mai: phan: baox jhak ka grawhgrawng: ceucao: kawn: khrit phaoxka: dix kienie yaox Yakop yum son Simiang Yesux heue. Mai: pa sitioe: mai:

gawng: yum nawh, yaox ra: ceu heue. Tix ceu kienie mawh dauh lai pa tiem: pa kaux sara ting Josephat (Josephus), pa mawh cao: pa tiem: been Yudax heue. Sinax yam hoik yum simiang Romax pa kaux Fietstax (Festus) mai: yam ang simiang Ietbixnax (Albinus) bax nyang teei ka dee nawh, yuh ka mawx cao: giex kaing: li pa kaux Ietnanax (Ananus), teei akhwang pa mhawm: pa simie nawh tix yuh, awm: plak greem: heue.

Pa kaux Ietnanax kienie mawh pui pa chix shiao ka akhwang pa pon tix mhawm: mhawm: mai: sinax yam hoik yum Fietstax, mai: yam ang Ietbixnax bax nyang yuh simiang, mai: Ietnanax kok ka bang: kum: son prawng see:, kheu keud nawh, tix hoik pon akhwang bawgyam pa mhawm: heue. Mai: dauh lai (Antiquities of the Jesus 20,9,1) tiem: tix plak jhi: yuh nin: dauh bang: kum: an, tat tix dheem: tix plaux ka Yokop pux Simiang Yesux ka simaox heue.

Ka gawng: pa plak jhi: pa kaux Hijisipiet (Hegesippus), pa mawh sara ting pa tiem: lai gawng: kawn: khrit, pa mawh gawng: yaox Yakop tix yum kienie pa kaux Yusibiyax (Eusebius) plak jhi: tix tiem:, dauh lai nawh pa mawh (The Esslesiasitical History 2, 232) heue. Dauh pa plak jhi: nawh yaox yuh nin:, “Dauh pa im ju Yakop, kheu mawh nawh pa nabyam: ka beenli, mai: kheu im ju nawh singax singeh, mai: kheu ang nawh koe: phimap, pui khankix khawm: uik nabyam: ka nawh heue. Pui Yudax kix deuh nawh mawh pui pa singax singeh, kheu jawg nawh tix hawt ka pingnyap cie pui Yudax heue. Mai: nawh mawh pui pa singax singeh, yam jah nawh tix ot dauh vaig miex tix. Mai: nawh mawh pui pa ang nyaux plai:, mai: pa ang ih nex, mai: pa ang rhip ka hauk kaing: tix, tix bawg kawx, mai: pa ang kraix bee, mai: pa ang heem: tix heue. Mai: si-ngawng nawh kienie cong: awm: si-ngawng kala-uk, kheu khyox khaw: nawh tix rawgbwan: jheeng jheeng ka Simiang Siyix son pluat ploi: ka phimap kawn: pui khankix heue. Mai: pui een: rhawm: ka nawh, kheu koe: rhawm: nawh tix nabyam: ka beenli, mai: kheu rah see nawh heue.

Kheu grawhgrawng: awm: plak piang, cao: giex kaing: li pui Yudax kix, ang tawng grawhgrawng:, krax yumrhawm: nawh pie ceeix heue. Ka pingnyap kawx kheu hawt nawh tix yuh mhawm: mhawm:, kieh cao: giex kaing: li pui Yudax kix, sivix rhawm: kah heue. Mai: yam yaox kix ka tieh loh pui tom: nie ka beenli kawn: khrit, kheu kied lhat kix, kix tom: ah nin: ka Yakop, “Sonsang tieb tie maix ka pui pa hawt khaix Yesux, pa mawh krax

lud, mai: yix khyox ka maix heue. Grawhgrawng: nawh, yix yumrhawm: ka maix heue. Mai: nyaw glaw kix, sonsang ang kix hu: ka krax lud liak. Mawh kheu nan:, cung piang lawg pa dex mai: nyiex bwan: mai: sidiex sonsang mhong: kix khawm: uik liak”. Yam an mawh yam ngaix poi Pasakha heue. Dauh veng Yerusaliem kawx jungpui kied haoh kah heue. Mai: cao: giex kaing: li khankix, deuh ka Yakop piang lawg pa dex, mai: nyiex bwan: heue. Lox pa ah Yakop, ang mawh lox pa simie kix tix mhong:, mai: ang mawh lox pa keud pot jun pot kix heue. Viang mawh nan: lox pa ah Yakop kienie “Pa sitoe: mai: gawng: Yesux pa kok pa tokaux tix mawh Kawn: kawn: pui, pex phex chawk ka aux yuh ka mawx? Pui an ngawm plak khawn: dawm: Siyix pa ting siawp sibrawm, dauh meung raoma: heue. Ang awt rheung:, nawh tag brug pai-awm: mai: lih hoek heue”. Yam an pui pa giex kaing: li lih tix songrhawm:, mai: kix ah nin: “Ex hoik lud, kheu hoik tawx akhwang kham: mhai: sakse: son Yesux heue. Ex rau nawh khaing: piang nyiex bwan:, yuh ka mawx, son lhat graung pui hun:, mai: son ang kix lai nghiet lox, nawh, mai: deeh veeh plak pui hun:, mai: baox ah nin: “Jhak heue, pie pui pa rah pa see kawx hawt khaix krax lud heue”.

Mai: cao: giex kaing: li kix cot ka Yokop khaing: piang: dee choek nyiex bwan:, mai: dheem: tix plaux nawh ka simaox heue. Yam dheem: kix mai: simaox, Yakop rawgbwan: mai: ah nin:, “Siyix leeing ju leeing phan: eue, pluat ploi: ka phimap, pa yuh kix, kheu ang kix tawng heue”. Cao: giex kaing: li tix kaux, kawn tieb ka ceu pa plaux kix, pa kied nieb yuh kix heue. Mai: nawh ah nin: ‘Pui pa singax singeh in rawgbwan: son pex. Paw tix plaux nawh’. Viang mawh nan:, pui pa sidaux tix kaux, kheu siviet nawh ka kaing: Yakop mai: khaox pa sidaux. Yakop tom: yum heue. Pui pa sawn: Camlik pa mawh pui pa koe: pingnya khankix tag chawk ka ceu pa simie kix tix tawng hoek dee pa iak pa sitoe: mai: gawng: ceu pa yaox Yakop tix yum heue. Viang mawh nan:, ceu pa sidawng: dauh lai mhai: kienie mawh ceu pa tawx Yakop tix, ju tix, son puxke: tix, pa nieb keud nawh heue.

Yakop pa mawh pui koeng dix, yamin tawx ju tix son Nawh Cao: heue. Ka ceu pa lih tix mawh awm: in kienie pon tix plak jhi: sidawng: yuh ka mawx? Pie dauh Camlik khraox pon tawng sidawng: heue. Khaix hoik krai Pawlux ka gawng: pa jhi: Yesux ka pa tokaux pa deeh kaoh im: tix ka pui khankix tom: nie bawg sidawng:, dauh pa krai nawh ka gawng: pa deeh kaoh im: Yesux, mai: baox tix tiem: mai: ah nin: dauh lai Kawrinthux

78 *Yakop (Pux Simiang Yesux)*

sidah yum tix heue. Kawn: khrit khankix, jhak ka khaoxlhak, mai: lauxrhawm: jheeng jheeng, mai: kix mawh pui pa pon ka ju pa khraox, kheu ceu pa deeh im: Nawh Cao: heue.

Lawg (9)

Philipux

Pui pa jah tix mhong: lox pa kok Simiang Yesux

Ka daux lai Khrit loe: phuk, lheu: khaing: plak jhi: ka ceukaux nawh, ang yaox tix tawng ka grawng: nawh heue (Mathiex 10:3, Makux 3:18, Lox Kab 6:14, Kawncau 1:13). Mawh ngie lai khrit pon: phuk tix phuk, pa yaox ka riangrao pa chix yuh Philipux khawm: uik heue. Yam ang nyang bax krai grawng: Philipux, ceu pa caw ex tix yuh satix tix tawng mhawm: mhawm: kienie ka Philipux in. sonsang ang lud, mai: Philipux pa viex daux lai Kawncau 6:15, pa mawh daux aliah kaux tix kaux pa yaw pui kah, pa naog khwan: Cao:, mai: pingnya cuyi heue. Tete telai ex kix lheu: tawng ka Philipux pa viex daux aliah kaux tix kaux, khaing: philipux pa mawh kawncau heue. Mai: yaox tix phat daux lai Kawncau 8:5-14, grawng: Philipux, pa mawh pui pa viex ka daux aliah kaux tix kaux, grawhgrawng: sidiex nawh, daux pa viex rhawm: tix ka lox bwan: gauxrhawm: gauxrhi:, daux veng Samarix heue. Mai: kheu lox sidiex nawh awm: an, daux lai Kawncau 8:6-40 kawx, yaox ka baox tix plak jhi: ka tieh loh pui meung Ethiopia tix kaux, pa mawh pui pa kia piang sinngao meung Ethiopia khawm: uik heue. Mai: nyiex pa peung Pawlux, daux veng Kesarix kienie mawh nyiex Philipux pa viex daux aliah kaux tix kaux heue (Kawncau 221:8). Daux kawncau aliah kaux cie ceucao: kawn: khrit phaoxka: Philipux pa mawh daux kix tix kaux kienie mawh pa ao: min: pa yuh sara satsana, daux been satsana heue. Yam jah, ceucao: tix koe: dix, pie pui pa tiem: lai khankix kawx lud loe:, ceu pa sitioe: mai: kiex ra kaux an heue. Daux lai (Concerning Baptism 18), pa tiem: pa kaux Tatuliyen (Tertullian), plak jhi: ka mawh Khwan: Simiang Siyiex pa viex ka Philipux hu: ka pui meung Ethiopia pa kia: piang singao heue. Mai: pie pa kaux Yusibia (Eusebius), pa mawh pa koe: cuyi mai: pa ao: min: plak been kawx, krai Philipux pa viex daux lai Kawncau 21:8, mawh Philipux pa mawh kawncau, awm: pa tiem: daux beenli (Ecclestical History 3:31.5) heue. Mai: daux lai riang khix, ceucao: pui meung Ejiptux, mai: daux lai tiem: kawn: khrit ceucao: Aramanix, son doh keud ka Philipux, tiem: tix deuh ah Philipux mawh "Cao: bung: kaing: mai: kawncau" heue. Mai: pie yam jah ceucao: kawn: khrit tix koe: dix,

sonsang tawng mhawm: mhawm: ka mawh Philipux ra: kaux ang ah, mai: sonsang gwieh ka ceu an ang ah, mawh pa kied nu heue. Daux phuk lai “Kawncau khaing: Palatinax” pa tiem: pa kaux Eri Ief Ief Bishawp (Eric F.F. Bishop), ceu pa plak jhi: ka Philipux pa viex daux lai Kawncau simin ting 8 kienie mawh kawncau, mai: ceu pa ce: nawh ka pa ce: Tatuliyang tag mawh tete kienie mawh pa laigrhawm: tix ceu heue. Yam jah cie lai Kawncau simin ting 8 mu:, viex yuh nin: “Mai: ka singaix an, krax tuktiak tukte: pa ting lih tix mawh ka piang ceuca: pa koe: ka daux veng Yerusaliem, mai: lheu: khaing: kawncau pa ting khankix, kix khawm: uik prung prang hu: ku dah ku dee ka daux meung Yudax, mai: meung Samarix heue”. Mai: daux simin iak (5) mu:, baox tix ah nin:, “Mai: Philipux lih hu: ka veng Samarix, mai: sidiex gau grawhgrawng: Cao: khrit ka kix heue”. Daux pa ah nan: daux num: riah phuk lai, shiao tix deuh ka ngai: lai (Katerchesthai) kah heue. Dee bleeh kienie “Ce u pa lih krax” heue. Mawh kheu nan: Bishawp tom: ah nin:, “Koe: dee bleeh lih Philipux krax veng Samarix khaing: veng Yerusaliem heue. Ce u pa kieh ka grawng: in nai kienie mawh pa viex daux lai Kawncau 8:14 yuh nin: “Yam kawncau pa ting khankix, pa ot daux veng Yerusaliem, mhong: grawhgrawng: Samarix hoik rieb tix teei gumlox Siyix, kix ploi: Petrux mai: Yohan, hu: ka kix heue”. Phan: Philipux mawh kawncau kienie sonsang hu: kawncau tang kaux khankix ang doh lo. Mai: sonsang tawng grawng: Philipux grum naog, baox tix jhak ha:

Daux lai Yohan(1:44), plak jhi: mawh Philipux pui Biesedax, veng dee ot Andare mai: Petrux heue. Phan: Philipux mawh pui Biesedax, yuh ka mawx kawx, tag mawh cao: teei kax heue.

“Hawt Aux heue”, phan: awm: pa plak jhi: Yohan, daux lai Yohan (1:43) yuh nan:, pui pa jah tix mhong: ka pa kok Yesux kienie, tag mawh Philipux heue. Philipux mawh pui pa ang ao: min:, mai pie grawng: nawh kawx, ex tawng ngie ceeix khaing:. Viang mawh nan: koe: khawng phak pa ang pon laux ka nawh tix ceu heue. Ceu an kienie nawh mawh pui pa yaox tix mhong: ka lox pa kok Yesux phaoxka:, pa mawh “Hawt Aux heue”. Mai: daux lai Yohan, yaox tix phat ka grawng: Philipux pon: bawg heue. Tix bawg hoik tix bawg lheu: yaox tix tawng ka grawhgrawng: nawh heue.

(1) Khaix hoik kok Yesux ka Philipux sonsang hawt khaix Tix, ceu pa jah Philipux tix yuh kienie sawg ka Nasanilax mai: ah nin: ka nawh. “Ex

hoik yaox , Kaw pa hoik tiem: Mose, grawhgrawng: Nawh ka daux lai been li, mai: pa cao: jhai: khankix kawx, hoik tiem: grawhgrawng: nawh, pa mawh Yesux kawncau: Yosiep pui veng Nazarit heue. Mai: kheu mawh Nasanilax tix pui pa ang yumhawm: yie yie ka grawng: ceu mawx ang ah, mai: nawh tom: chawx mai: ah nin:, “Ce u pa mhawm: pa mhiem: chix lih ka daux veng Nazariet tix ceu ceu lie:? Mai: Philipux baox ah nin: ka nawh “Hoek tix jhak heue” (Yohan 1:43-46).

Grawng: in, plak jhi: ka grawng: pa ting ceu ra: ceu, pa sitioe: mai: Philipux heue. Daux Phipipux mawh ceu pa koe: rhawm: tix simie tix yuh satsana heue. Yam yaox nawh ka Simiang Yesux dom: mawx dom: an, nawh tat rhawm: tix kra: ka pui tang: kaux mhong: ka lox bwan: gauhrhawm: gauhrhi: an heue. Ceu pa yaox, mai: ceu pa kra: mawh tau heue. Ra: baox tix baox, Philipux pon tix dex dawd mai: pui pa ang yumhawm: kheu krax dex dawd pa rah pa see heue. Philipux ang thung thiang: mai: Nasanilax. Phan: thung thiang:, nawh tawng ka som tix. Mawh kheu nan: “Hoek tix jhak heue, mai: nawh ah ngie lox an heue. Ceu lox pa thung thiang: khankix, kieh ka ceu pa plak jhi: khankix grai: mu: heue.

(2) Baox yaox tix phat ka grawng: Philipux, ra: bawg tix bawg, yam eei: Simiang Yesux ka pui phwan: rheng (5000) heue. Yam Simiang Yesux chawx mai: ah nin: ka Philipux “Ex sang pon tix liag khaomun, sonsang yaox pui in kix tix ih dee mawx? Mai: Philipux pawk lox mai: ah nin: ka nawh “Tei mau denari ra: yieh, mai: liag khaomun kawx, ang tau tix kub ku kaux kix ku ceeix” (Yohan 6:5-7).

Pa sitioe: mai: grawng: in, plak jhi: tix deuh ka ceu pa laigrhawm: ra: ceu, pa tag pon mawh heue. Tix ceu kienie kheu yaox Philipux tix teei beeh glawm:, son ih kawncau priex preem: yuh ka mawx, phan: mawh grawng priex preem, Yesux tag chawx ka Philipux ngie heue. Mai: ceu pon pawk Philipux tix dom: mawx dom: an kienie daux rhawm: nawh, nawh hoik dha: tix sawn: ka uik mau miex ding, phan: eei: ka pui in kix heue. Daux pa plak jhi:, pa kaux Miligin (Milligan), daux phuk lai “Pa toe: dee bleeh cie Simiang Yesux mai: lai khrit kienie, tiem: mai: ah nin: ka pa sitioe: mai: grawng: Philipux “Yam an dix, daux meung Palatinax, phan: mawh denari tix piak, pon liag ka khaomun pa yuh mai: nghoxca kao: mu: ra:, mai: pon liag ka hawt au pa yuh mai: gaox mayaw (Barley) tingoe: liah (36) mu: heue. hawt au an kix kienie, koe: krax vieh tix diex, mai: krax pu koe: tix gien

mai: tix plak heue. Phan: pui tix kaux ih ka khaomun an tix sivit. caw miex ding. Philipux tee hoik sawn: tix deuh. mai: ah yuh nan: heue. Yam an dix denari tix piak. mawh ngawh riang pui tix kaux. tix singaix heue. Awm: pa ah Philipux kienie. ngawh riang pui tix kaux tix num. ang doh kub. sonsang eei: ka pui an kix. tix sivit. kaux mawx kaux an heue.

Pa tawng ex khaing: grawng: in, daux Philipux. koe: krax caoxrhawm: ka pui tang: kaux heue. Viang mawh nan: nawh mawh pui pa chix jhak plak pa caox ngie heue. Mai: nawh koe: rhawm: tix simie tix teem: coi ka pui tang: kaux heue. Viang mawh nan: nawh mawh pui tix kaux. pa ang tawng ka sang teem: pui yuh ka mawx heue. Pa kaux Keva. (Cavour) ah nin:., "Daux pui pa bung: kaing: khankix. cuyi pa kied lo kienie. mawh ceu pa chix jhak plak mhawm: mai: phan: kaing yuh koe: tix yuh kawx. pa koe: rhawm: pon lih tix mawh heue. Daux Philipux rhawm: pa ang pon mawh, lheu: koe: daux rhawm: nawh heue. Daux tawm: taix Simiang Yesux Khrit, ceu pa tux kienie lih tix nie haok hwan: ang ah. mai: Siyiex chix pon yuh ceu khawm: uik ang ah. caw Philipux tix yaox tix gau tom: nie ceu heue.

(3) Piang haktiex in. yam dex sang uik, bawgyam Simiang Yesux, yaox ka Philipux loe: bawg tix bawg heue. Ka daux pui khankix pa haok tix krub daux poi. koe: pui Helasax tiblax mawh kheu nan: in kix hoek ka Philipux. mai: ah nin:., "Simiang eue, ex simie tix yaox Yesux heue". Ceukaux Philipux kienie kheu mawh ceu kaux pa chix sum: pui Helasax kix. mawh kheu nan:., kix ce: yuh nin:., phan: hoek ka ceukaux pa koe: awm: in, tag pon akhwang pa kied mhawm:., sonsang yaox ka Yesux heue. Pa deeh pawk Philipux kienie. nawh hu: krai ka Andare, mai: Andare mai: Philipux hu: krai ka Simiang Yesux heue (Yohan 12:20-22).

Daux grawng: in, yaox ka Philipux mawh pui pa lhat tix teei beeh glawm: ang ah. mai: mawh pui pa lhat tix yuh ka ceu pa tat pa ting ceu ang ah heue. Pui pa koe: rhawm: awm in. chix hu: ka krax ra: nyaing heue. Tix nyaing kienie ang koe: rhawm: tix tat mai: yuh tix ang tawng ka ceu pa mawh khankix heue. Ra: nyaing tix nyaing kienie nawh hu: ka pui pa lheu: chix khaing: tix heue. Pui pa hawt khaix ra: nyaing tix nyaing kienie. mawh pui pa tawng ka grawhgrawng: tix. mai: mawh pui pa koe: pingnya cuyi heue. Philipux yuh awm: krax ra: nyaing tix nyaing heue. Mawh kheu nan:., yaox tix tawng. mawh Philipux pui pa koe: pingnya. mai: mawh pa tawng ka grawhgrawng: pa iak riang tix heue.

(4) Pa yaox ka Philipux pa ghoik kienie mawh daux lawg plak piang nyiex tix nyiex. pa koe: daux veng Yerusaliem heue. daux lawg an. Simiang Yesux krai ka grawng: Keeing: Cao:., mai: krai grawng: sang hu: tix ka Keeing: Cao:., ka kawncau khankix heue. Kheu mawh Philipux. pui pa ang chix yumrhawm: yie yie ka grawng: tix ceu ceu. mawh kheu nan: Philipux ah nin: ka Nawh. "Simiang eue, jhi: ex yaox Keeing: Cao: liak, sonsang vhahrhawm: ex kah". Yesux tom: ah nin: ka nawh "Pui pa yaox ka Aux. hoik yaox ka Keeing: Cao:" heue (Yohan 14:8-9). Daux pa pawk Simiang Yesux khankix, ceu pa pon Philipux kienie mawh ceu pa pawk pa kied ting ngawh heue. Philipux mawh pui. phan: nawh yaox khaing: ngai: tix. nawh tom: yumrhawm: kah heue. Viang mawh nan:., Philipux ang pon gun tix priex ka rhawm: pa simie nawh tix tawng heue. Sonsang pon ka ceu pa simie nawh tix tawng. nawh viex ka ceu pa simie nawh tix tawng an, hoek ka Simiang Yesux heue. Bo: an, Philipux pon ka pa pawk yuh nin:., "Pui pa hoik yaox ka Aux hoik yaox ka Keeing: Cao:" heue. Pa pawk pa sitioe: mai: krax yumrhawm: in, mawh num: riah pa ting ceu cie krax yumrhawm: kawm: khrit heue. Mai: pa kaux E.I: Bieka (A.I: Baker) ah nin: "Pui pa nih nai plak jhi: ka Siyiex sidawng:., son Wiliyin Tempie (Willian Temple) kienie mawh Yesux pa mawh pui veng Nazariet, mai: ceu an. mawh num: riah pa ting ceu cie can pui pa yumrhawm: ka been kawm: khrit heue". Pa kied ngawh ceu pa pon Philipux tix yaox akhwang tix tawng ka ceu an kienie mawh kheu ang kaig tix chawk ka Simiang Yesux heue.

Ka grawhgrawng: Philipux. ang joeng mawh yaox daux Camlik khraox. mai: baox kawm: yaox daux been khankix heue. Viang mawh nan:., been an kix mawh ngie krax keud heue. Yam ang nyang plak jhi: ka grawhgrawng: khaing: been kix an. yuh ka mawx simie tix nih nai grawng: tix ceu pa ang pon mawh pa sitioe:., mai: Philipux pa mawh pa tiem: daux lai (The Miscellanie 3,4) cie Klixmix khaing: Alezandre (Clement of Alexandria) heue. Daux lai Lukax 9:59, mai: Nawh Cao: ah nin:., ka pui tang: kaux tix kaux. "Hawt khaix Aux heue". viang mawh nan: kaw an ah nin:., "Simiang eue, kieh aux hu: sipaung keeing: aux ha:". pui pa ah nan: kienie tiem: tix deuh daux lai an. grawng: mawh Philipux ngie heue. Ceu pa tiem: yuh nan:., lih tix mawh yuh ka mawx. ang pon keud kah. Tete yam ang nyang lih tix mawh grawhgrawng: in. yaox ka hoik dawg mawh Philipux kawncau pa hawt khaix Simiang Yesux heue.

Awm: pa hoik plak jhi: plak piang, daux phuk lai, "Grawh:grawng: Philipux", pa ang viex daux Camlik, yaox ka plak jhi: ka ceu pa ang pon mawh khankix heue. Phan: ah lox phektiem: kienie phan: jhak ka lawg (2). daux phuk lai an, Philipux hu: ka veng Athen(Athens), son sidiex gau ka lox bwan: gauhrhawm: gauhrhi: heue. Pui veng Athen kix, kheu mawh kix, pa lai:grhawm: ka pa khraox, mai: pa am:, yuh ka mawx, yam mhong: kix ka ju Simiang Yesux mai: lox bwan: gauhrhawm: gauhrhi: khaing: Philipux, pui pa chix pingnya cuyi loe: yieh (300) , pa grum naog mai: krax keud krax sawn: khyox khaw: son keud been loe: ngaix heue. Dee ghoik sonsang yuh pa kied mhawm:,awm: pa keud kix, mai: kix ploi: ka pui kix ka cao: giex kaing: li cie Yudax, son khyox sonsang plak jhi: ka pa sitioe: mai: lox bwan: gauhrhawm: gauhrhi: pa sidiex Philipux heue. Cao: giex kaing: li pa kaux Ananix, hoek ka veng Athen, mai: pui phwan: yieh (500), sonsang yuh ka Philipux laux heue. Philipux kieh ngai: kix khawm: uik dug. Mai: Philipux tawx lox ka tiex, sonsang meeig ka Ananix tom: hoek ngawng nawh, mai: yam ah Ananix tix, ceu in kix, mawh ngie pa yuh phicaox, yuh ka mawx, Philipux baox tawx lox ka tiex, sonsang meeig ka Ananix hoek tom: nyoi nawh heue. Kheu kawm cong: rhawm: Ananix baox tawx lox ka tiex, sonsang meeig hoek tom: ngawg nawh heue. Mai: yam meeig tiex khawm: jung Ananix, sibex cao: giex kaing: li pa ceep Ananix, grai: daux bhaung: heue. Sibex an, hoek dee mawx, ang lai pon krai hoek tom: yam in heue. Pui Yudax pa hoek mai: Ananix, deeh loh jhawm: tix, mai: com rhawm: tau mai: pui Athen heue. Philipux ot daux veng Athen been ra: num, mai: sum: ceucao: tan:" mai: viex yuh nan: khawm: heue.

Daux been khankix, krai yuh nin:, Philipux hu: sidiex gau lox bwan: gauhrhawm: gauhrhi: ka meung Pathi (Parthia), mai: meung Lidiya (Lydia) pa koe: plak khaix Asix Maingna:, mai: teug Asix, mai: meung Gan pa koe: plak khaix teug Yurot heue. Mai: ka grawng: yum nawh son Simiang nawh, daux veng Herapawlix (Hierapolis) kawx pa kaux Yusibia tiem: tix deuh daux lai mhai: beenli (The Ecclesiastical History 3,21), awm: plak green: heue.

Yam hoek Philipux daux veng Herapawlix, mai: nawh yaox ka krub pui veng ka siuing pa kied ting tix mu: heue. Bathawlamie:(Barthdomeew). mai: Marix Yanni (Miriamne) kawx, viex mai: nawh heue. Lox bwan: gauhrhawm: gauhrhi: pa sidiex pa gau Philipux, kheu kied haok hwan:,

simiang veng tom: bohrhawm: ka nawh heue. Simiang veng an, peeik ka kraung ceep Philipux, mai: tawk ka ba nawh, mai: ngai: caong nawh ka jim: lawm, mai: dang dung tix pangpoe: nawh, mai: tuktiak tukte: nawh heue. Yam an Philipux ang lai pon kham: krax tuktiak tukte: awm: ceu an, Yohan mai: pui pa singax singeh kix lih bleeh, mai: tawx riangrao nawh, son ang pawk bix heue. Viang mawh nan:, kheu Philipux tawx lox ka tiex, tiex tom: meeig ka pui veng aliah rheng heue. Yam an Simiang Yesux lih bleeh, mai: sidiex ka ceu pa songrhawm: Philipux heue. Mai: Simiang Yesux deeh kieh pui pa yum pa meeig tiex kix, lih deeh kaoh im: heue. Philipux deeh doh keud ka phimap tix, mai: kham: hoek tom: yum tix ka ceu pa tuktiak tukte an heue. Mai: yam ang nawh nyang yum, nawh khyox ka akhwang tix ceu, pa tang: siyox heue. Pa khyox nawh kienie yam yum nawh, son ang pua ka to: yum nawh ka man, viang mawh nan:, mawh son pua ka to: yum nawh ka ce: pa yuh ka priem, mai: sipaung: kah heue. Ceu pa mhaing: nawh akhwang awm: an kienie nawh ah, nawh ang keung tix pua man ka to: yum nawh, awm: to: yum Simiang Yesux heue. Yam sipaung: ka nawh, awm: pa ah nawh kienie mhong: sinum lox khaing: raoma: "Hoik pon Philipux mhok Ju" heue.

Dee ghoik, Philipux mawh pui pa kaux sijax hoek tom: yum heue.

Simon Zelot

**Grawng: pui pa ang koe: krax moh yam jah, nawh dee ghoik mai:
krax moh krax rhawm:**

Grawnhgawng: Simon Zelot, ex tawng ngie ceex khaing: heue. Pie pa sitioe: mai: ceukaux nawh lih tix koe: krax suksag. Mai: daux Camlik khraox, lheu: khaing: plak jhi: ka ceukaux nawh, ang plak jhi: ka grawng: nawh heue.

Daux lai Camlik Simiang (K.J.V), yam plak jhi: ka ceukaux nawh, yaox tang: siyox tix dah mai: tix dah heue. Daux lai Mathiex (10:4), mai: lai Mathiex 3:18, kok ka nawh mawh "Simon pui Kananix", mai: daux lai Lukax 6:15, mai: lai Kawncau 1:13 kok ka nawh mawh "Simon pa kok mawh Zelot" heue. Mai: daux Camlik pa deeh tiem: Mawphat (Moffatt), daux khawm: pon: dah tiem: yuh nin:, "Simon pa kok mawh Zelot" heue. Pa hoik deeh cox, daux Camlik Inggalik mai: Amerikan (E.R.V and A.S.V), tiem: tix deuh yuh nin: daux lai Mathiex mai: lai Makux "Simon pui Kananix", mai: daux lai Lukax "Simon Zelot" heue. Daux ceu pa tiem: cie lai Lukax, ang koe: krax suksag heue. Grawnhgawng: nawh, daux Camlik an, kok ka Simon plak lox Greg mawh "Zilawti (Zelotes) heue. Dee bleeh nawh mawh Zilaw (Zealot), phan: ang mawh nan: plak lox Vax mawh Zelot heue. Ceu pa tiem: pa sitioe: mai: lai Mathiex mai: lai Makux, lih krax suksag tix koe: heue. Mai: Camlik pa tiem: plak lox Greg, koe: ra: ceu, pa mawh lai tiem: pa mhawm: mai: lai tiem: pa ang mhawm: heue.

Pa deeh tiem: Camlik Simiang Jem khaing Camlik plak lox Greg, pa mawh lai tiem: pa ang mhawm:, pa tiem: Kaninek (Kananites) an, daux Camlik Simiang Jem (K.J.V), deeh tiem: Kinnanek (Cannanite) heue. Ceu pa deeh tiem: yuh nan: lud heue. Kinna (Canaan) mawh plak lox Greg Chenanan (Chanaan), mai: pa kieh to: nawh sidawng: (Adjective) kienie mawh Chananeawn (Chananaios) heue. Phan: teei ka ngai: lai Kaninek (Kananites) mawh tete kienie, caw tix deeh tiem: Kinnanek (Cananite) heue. Ang khaw: tix deeh tiem: Kinnanek (Cananite), awm: daux Camlik Janiva (Geneva Bible) mai: Camlik Inggalik ka: dix heue. Daux lai tiem: pa kaux Jerom (Jerome), pa mawh: "Ceu pa keud pa sitioe: mai: lai Mathiex".

teei ka ngai: lai Kaninek mawh pa mawh tete, mai: ka ngai: lai an, plak jhi: tix sitioe: mai: veng Kanax meung Galilie: heue.

Mawh kheu nan:, tom: ce: ka Simon ang mawh pui tang: kaux, viang mawh nan:, mawh pui pa yuh kapaox khaing: poi kapaox daux veng Kanax, mai: khaix hoik yuh nawh poi kapaox an, nawh tom: lih tix mawh kawncau pa hawt khaix Simiang Yesux heue.

Ceu pa ce: in, ex tag yaox tix tik, daux pa lauxrhawm: heue. Grawnhgawng: nawh pa kieh ceukaux veng Kanax (Cana) sidawng: (Adjective) cie Kanax mawh Kanniawn (Kananios) mai: kheu ang mawh Kanninek (Kananites) heue. Daux Camlik Greg pa kied mhawm: pa tiem:, mai: pa hoik dawg koe: dix, mawh ngai: lai Kanniawn (Kananios), mai: daux Camlik Inggalik, mai: Camlik Amerikan (E.R.V and A.S.V), deeh cox ka ngai: lai an, mai: deeh tiem: pa mawh pa meh pa mawh Kannikikan (Cananacan) heue.

Lox in, pon khaing: lox Hebrie:, pa mawh Kanax (Kana), mai: dee bleeh nawh mawh "Pui pa viexrhawm: tix priex been:" heue. Mai: ngai: lai an mawh ngai: lai pa shiao, son pui pa viexrhawm: tix priex ka pingnyap heue. Ngai: lai in, sidu dee bleeh mai: lox Greg pa mawh Zelawti (Zelotes) heue. Dee bleeh lox Greg an kawx, mawh "Pui pa viexrhawm: tix priex been" khawm: heue. Pui an kix, mawh pui pa viexrhawm: tix priex been, son lheu: koe: min: plak ngai: mai: sonsang singax singeh pingnyap heue. Mawh ngie ngai: lai Kanania (Cananaean) pa mawh pa meh heue. Kanania mai: Zelot, sidu dee bleeh heue. Ngai: lai ka:, mawh lox Hebrie:, mai: ngai: lai ra: baux tix baux mawh lox Greg heue.

Ceu in, mawh jiax saw, sonsang tawng ka grawng: Simon heue. Viang ex ang tawng ka grawng: nawh mhawm: mhawm: kawx, phan: nawh mawh Zelot kienie, ex pon keud ka mawh nawh pui pa yuh ka mawx dix mai: ceu pa yumrhawm: nawh heue.

Daux pui Yudax khankix, Zelot kix mawh cubcaw: tix cub pa lih khaix heue. Daux riang susai pa pon kix, kix ce: tix ngie, mawh pa viexrhawm: tix moh ka pui ceu tix heue. Viang mawh nan:, mawh jao kix khaing:, meung Yudax tom: laux heue.

Pui Yudax kix ang pon rieb ka mawh meung Palatinax greem: meung simiang Romax heue. Pie yam makmi meung Palatinax, mai: yam yien yawg, yaox tix khirrhawm: lawx lawx, toh singaix mawx, awm:

gawng ngu ting pa yien yawg heue. Simiang Herut pon kwang ka meung Palatinax, yien yien yawg yawg heue. Ceu pa pon kwang nawh awm: in kienie, mawh kheu lhak liem: nawh mai: mawh kheu chix yuh nawh paoxpie heue. Mai: nawh yuh kaing simiang Romax. Mai: son pon pui Yudax khankix akhwang kawx. nawh pon teei khaing: simiang Romax heue. Mai: nawh yum, yam ang khrit nyang bax keh pon: num heue. Mai: yam ang nawh nyang yum, nawh gwieh tix tawx meung pa kwang tix ka kawm: simex tix khankix heue. Ka Philipux (Philip), nawh tawx meung Aiturea (Huraea), mai: meung Trakhonitix (Trachonitis). Mai: ka Herut Antipax, nawh tawx meung Galilie. Mai: ka Akhelax (Achelaus), nawh tawx meung Yudax, mai: meung Samarix (Judea and Samaria) heue.

Ceu pa gwieh awm: in, simiang Romax kix yaox tix rieb heue. Yam ang nyang bax rieb ka ceu an, daux meung Palatinax, lih tix koe: krax tieh krax feen ting heue. Meung Galilie: mawh meung pa lheu: kin heue. Pui pa kaux Yudax, pa mawh pui meung Galilie:, yuh cao: kaing:, mai: tieh feen heue. Nawh mai: paox pie nawh khankix, hu: lah(puing) ka nyiex haw Siexphawrix (Sephoris), mai: laig daux nyiex kraung naing, mai: gwieh tix tawx ka kraung naing an ka pui pa hawt khaix khankix, mai: tieh feen ka simiang pa kwang haktiex Romax heue. Simiang pa giex haktiex Romax kix pex ka ceu pa tieh feen pui Yudax an heue. Viang mawh nan:, khaing: pa tieh pa feen an, lih tix mawh cubcaw: Zelot heue.

Awm: meung pa gwieh simiang Herut, simiang Romax kix rieb kah heue. Viang mawh nan:, kheu Akhelax ang pon kwang ka meung nawh mhawm: mhawm: mai: nawh tom: ap ka meung Yudax ka daux tawm: taix simiang Romax sonsang kwang kah heue.

Ceukaux simiang Romax an, mawh Kuixrinia (Quirinius) heue. Daux lai Lukax 2:2, plak jhi: nawh mawh Kurine (Cyrenius) heue. Yam Kurine tawx lox, kieh pawd kieh ceu kaux pui pa ot ka daux haktiex, sonsang yie tix kwang meung, mai: son ang pon koh mau gha:, awm: ceu pa koe: been krax kwang simiang Romax kix, jhak heue, pui meung khankix, lih tix tieh feen dom: mawx dom: an heue. Pui Yudax pa kua tix viexrhawm: daux been khankix, mawh Siyiex ngie Simiang mai: mawh Siyiex ngie pa yaox ex tix tawx mau gha:, tawng yuh nan: heue. Ceu pa tieh feen in, ang lai mawh krax tieh krax feen plak meung, viang mawh nan: tom: lih tix mawh naing plak beenli heue. Yam in kawx Yudax mawh cao: kaing: naing pa tieh

pa feen heue. Ka krax pa tieh pa feen in, simiang Romax tuktiak tukte: tom: nie ceu heue. Yudax kawx yum daux naing in heue. Viang mawh nan:, khaing: naing pa lih nham: awm: rawm: klawng: in, cubcaw: Zelot lih tix koe: heue.

Num pa hoik luan tom: nie nhaox, yam ang krax tieh krax feen nyang bax koe: awm: in, hoik dawg koe: pa yaox pui Yudax tix kham: geu: ka ceu pa tuktiak tukte simiang Surix, pa kaux Intiokiet Ipiphen (Antiochus Epiphanes), sonsang tik ka been pa yumrhawm: pui Yudax khankix, mai: sonsang plaux ka pui Yudax khawm: uik heue. Yam an, puxaik Makabi (Maccabees)kix, tieh feen, sonsang taoh ka meung tix mai: pui Yudax heue.

Yam dex sang yum Mattitia (Matathias) pa mawh keeing: Makabi kix, kok ka kawm: simex tix, mai: tawm: lox mai: ah nin: "Kawn simex aux khankix eue, viexrhawm: tix hawt ka piangnyap Simiang Siyiex awx. Mai: tawx ju tix, mai: coca tix priex ka ceu pa yumrhawm: tax, yiex, miex, keeing: pex khawm: awx (I. Maec 2:50).

Mawh kheu nan:, Zelot kix mawh pui pa kua tix viexrhawm: tix moh ka pui ceu tix, phan: ang mawh nan:, mawh pui pa kua tix viexrhawm: tix hawt ka pingnyap, phan: ang mawh nan:, mawh pui pa koeng ka simiang pa hoek tix kwang khaing: meung tang: dah heue. Mai: pa kaux Josiphax (Josephus) plak jhi: tix tiem: ka grawng: kix, ang joeng mawh tix bawg khaing: heue.

"Yudax pui meung Galilie: mawh sara cao: tiem: lai cie lai pingnyap pon: phuk tix phuk, pa mawh krax keud krax sawn: cie pui Yudax heue. Daux rhawm: Zelot kix, mawh kix pui pa keud pot jun pot jheeng jheeng, sonsang pon ka meung heue. Mai: daux rhawm: kix, mawh ngie Siyiex pa mawh Simiang phan: ang mawh nan:, mawh ngie Siyiex pa kwang kix heue. Mai: kix ang doh kok simiang ka pui tang: ceu tang: cat, viang tuktiak tukte: ka kix miex ding mai: plaux tix tik ka kix miex ding kawx, kheu ang kix lhat heue. Ceu pa yuh kix, daux pa ang lhat graung, aux ang baux simic tix krai, jao lhat aux pex ang yumrhawm: ang mawh, kheu lhat aux tix ang pon krai grum grum naog naog pa pon kham: kix ka ceu pa tuktiak tukte: heue" mai: pa kaux Josiphax tiem: tix deuh daux lai nawh, pa mawh (The Antiquites of the Jews 18.16) yuh nan: heue.

Mawh kheu nan:, Zelot khankix, mawh pui pa viexrhawm: tix moh ka pui ceu tix heue. Mai: pon ah nin: ka kix "Phan: mawh son singax been

li krax yumrhawm: pa ih kix. kix ang lhat ka ceu pa yax tix kham: krax tuktiak tukte.: pie ceex kawx heue.

Cubcaw: awm: in kix. chix hoek daux pa vhaik heue. Mai: chix hoek daux krax pa hai: pa meug, kheu kied koe: rhawm: kix plak tix ngie heue. Daux cubcaw: in, pui pa cheu tix yuh, chix viex. mai: pui pa sawg akhwang to: tix, chix viex. mai: pui pa hai: pa meug kawx chix viex daux heue. Mai: Zelot khankix lih tix tieh tix mawh pui pa jiang tix plaux pui. pa kok mawh Sikari (Sicarii) heue. Mai: sonsang plaux ka pui pa hoek tix kwang kix khaing: meung tang: dah, kix mawh pui pa yuh tix deuh sijax mukheu heue.

Ceukaux Sikari kienie kok jao gawn Sika(Sica) pa giex kix heue. Mai: kix mox tix viex gawn an khankix greem: sibex ceep tix lawx lawx, mai: phan: akhwang pon, plaux tix tik pui koeng ka gawn an heue. Mawh kheu nan:, kix sidawng: tix yax, mawh pui pa hai: pa meug khaing: pui pa moh ka pui ceu tix heue.

Yam ang meung Palatinax nyang laux, yax tix sipup grawng: ra: ceu heue. Dee ghoik, Zelot khankix, jiang tix tud rhim: daux veng khankix, mai: daux yaong: khankix, mai: keeig tix tik heue. Ceu pa yuh awm: in kienie mawh ceu pa simie tix kieh laux. mai: mawh ceu pa simie tix mox tix lah heue. Mai: kix laklheit ka pui Romax ang joeng mawh, pie pui ceu kix kawx laklheit khawm: heue. Mai: jiang tix plaux ka pui ceu tix, pa sitoe: mai: pui Romax khawm: heue. Daux been pui Yudax kix, bawgyam pa kied lauxrhawm: kienie mawh num khrit- 70 (AD 70) heue. Mawh bawgyam pa rom lien Romax kix tix yuh naing ka veng Yerusalieim, daux pa ghoik heue. Kheu ang kix lai pon kham: krax laklheit Zelot khankix, dee sidah, mawh sonsang puing tix tik ka meung Palatinax khawm: uik heue.

Yam an, pui meung khankix, ang lai koe: pa ih pa un: mai: yam ang kix lai koe: krax keud pot jun pot kienie daux veng lih tix koe: krax tieh krax feen heue. Zelot mai: Sikari khankix sawg tix plaux ka pui pa tawx krax keud, sonsang hawt tix yuh ka been pa ot sinax. mai: ka pui pa tawx krax keud, sonsang hawt tix yuh ka ceu pa mhaing: pui koeng, yam ang meung nyang bax laux heue.

Zelot mai: Sikari khankix, kheu kied koeng kix, mai: kheu pa nie lheu: kied yuh kix ka pui Romax, mai: ka pui ceu tix pa sitoe: mai: pui Romax, dee sidah, meung kix lih tix laux jao an heue.

Phan: plak jhi: lox phektiem: ka grawng: pa koe: rhawm: Zelot kix plak tix kienie yax tix plak jhi: ka ceu pa tawx kix ju tix heue. Yam hoik hoek veng Yerusalieim daux tawm: taix lien Romax, tab Zelot kix tibleh, ang nyang tawx krax som, mai: ang nyang tik vud kraung naing tix heue.

Tab pa ghoik kienie mawh tab Masda (Masda) heue. Cao: kaing: kienie mawh pa kaux Eliaza (Eleazar) heue. Sonsang luad luan khaing: tawm: taix pui koeng, yam ang lai yax krax keud pot jun pot, Eliaza ah lox kua, mai: tawx lox ka pui pa hawt khaix tix, sonsang plaux ka simoeng tix mai: kawm: tix khankix, mai: khaix an, plaux ka pa tokaux cao: tix heue. Pui pa hawt khaix nawh kawx, awm: pa tawx nawh lox, mai: kix ngheut ka kawm: simoeng tix khankix, mai: plaux kix, mai: plaux ka pa tokaux tix khawm: heue. Daux tab an, pui pa yum koe: dim: yieh tiliah (960), mai: mawh ngie sibon: ra: kaux mai: kawm: iak phwan: (5) kaux pa klawd, kheu mox kix tix daux nyiey simaox heue (Wars of the Jews 7,8,9). Grawng: in kix mawh grawng: plak khaix pa sitoe: mai: Simon Zelot heue.

Simon mawh pui tix kaux pa viexrhawm: tix moh ka pui ceu tix heue. Mai: nawh mawh pui pa viexrhawm: tix nabyam: ka pingnyap khawm: heue. Mai: nawh koeng ka pui pa sitoe: mai: pui Romax khankix heue. Jao an, yax ka lih tix mawh grawng: ra: ceu heue.

(1) Tix ceu daux kawncau kao: kaux ra:, ceu pa yuh paox pie mai: ot tau mai: paox tix, tix kaux lai tix kaux kienie, mawh ceu pa daox pa am: heue. Daux cubcaw: kix, viex Mathiex pa mawh cao: koh mau khawm: heue. Mai: Zelot kawx viex heue, Mathiex riech ka been meung yamin, mai: daux pa kwang pui Romax, mai: nawh mawh pui pa pon bwanson:, kheu yuh kaing tau mai: kix heue. Simon mawh pa plaux pui Romax, mai: mawh pa plaux pui ceu tix, pa sitoe: mai: pui Romax pa yax nawh heue. Phan: yax ka Mathiex tang: dah, nawh tag suat tix plaux ka Mathiex ka gawn viex tix tete heue. Daux carang pa tag sang ah Zelot kix tix plaux, Mathiex mawh pa viex sivoe heue.

Dee in, ex yax ka lox phektiem: pa kied mhawm: tix yax heue. Lox phektiem: in kienie daux pui pa nabyam: mai: moh ka Simiang Yesux khankix, grai: ceu pa koeng tix kaux lai tix kaux heue. Daux cubcaw: kawncau, awm: pon ot Mathiex mai: Simon yien yien yawg yawg, ex kawx, phan: ex mawh pui pa nabyam: mai: moh Simiang Yesux kienie ang doh

koe: grawng: pa ang pon sitioe: ka ceu pa tang: siyox rhawm: ex tix kaux lai tix kaux heue.

(2)Ra: ceu tix ceu. yam hoik yum Simiang Yesux piang khaoxlhak, daux cubcaw: kawncaw kawm: yaox ka Simon daux lai Kawncaw 1:13 heue. Daux lai in, Simon tik ka gawn tix. mai: plak jhi: grawng: hoik tawng nawh tix tawx dee ot khaoxlhak khaing: dee ot gawn heue. Phan: ang mawh ngie akhwang siawp sibrawm plak haktiex, ang doh pon tieh loh ka krax ot krax koe:, pui pa yumrhawm: yuh nan:, mai: pui pa tawx ju tix, pa mawh pa kaux Simon kienie lih tix rieb ka krax moh krax rhawm: heue.

Been pa sitioe: mai: Simon kawx, baox jhak tix yaox ceex khawm: ha. Pie daux been an, ang yaox tix tawng pa sitioe: mai: grawng: nawh mhawm: mhawm: heue. Mai ah nin:, nawh hu: krai lox bwan: gauhrhawm: gauhrhi: daux meung Ejiptux (Egypt) mai: teug Afrika (Africa) mai: meung Briteng (Britain) heue. Grawng: Simon viex daux lai mhai: Satsana cie Abadia (Aposstolix History of Abdias 6,7.21) khawm: ceex heue.

Mai: Simon mai: Yudax (Judas), hoek daux meung Pasax (Persia) heue. Dee an, sara phi: (plak lox Man ah 'mhaw saya' heue) ra: kaux. pa kaux Zaro (Zaroes) mai: Afazax (Arfaxat), yuh cao: kaing:, mai: cha: kiex heue. Yam Zaro mai: Afazax silah siawp sibrawm, mai: Simon mai: Yudax kienie Zaro mai: Afazax som heue. Mai: yam silah kix sivoie simiang kawx, kheu som Zaro mai: Afaza, jhak heue, simiang kieh Simon mai: Yudax plaux ka kiex heue. Yam an kawncaw khankiex thiang: kah heue. Mai: ah nin: ka sara phi: ra: kaux an, "Simiang Siyiex yix ang khin: tix kieh pui yumrhawm: kah heue. Phan ang yumrhawm: pon: hu: pa koe: rhawm: pax heue".

Viang Zaro mai: Afzax luat luan khaing: krax yum kawx, ang joeng mawh ang tawng bwanson:, mai: baox ang tawng . ceu pa lud yuh tix , ceu pa yuh ka mawx heue. Mai: dee pa hu: Simon mai: Yudax ku dah ku dee, sara phi: ra: kaux an, dha: tix pao: satang, ceu pa ang mhawm: heue. Mai: dha: tix hu: ka dee pa sang ah Simon mai: Yudax tix hu:, mai: cheek ka pui meung, son cha: ka kiex heue.

Yam Simon mai: Yudax hoek ka veng Su-inna (Suanir), pa koe: tax vad tialiah (70) kaux, mai: pa koe: cawng rawgbwan: ting tix mu:, pui meung kix yo lox awm: pa gau sara phi: ra: kaux yuh nin:. "Plih tix tawx ka pui koeng, siyiex ex" heue. Mai: plaik kiex laig daux cawng rawgbwan:, mai: ah nin: "Sang khyox pax sonsang klawd tix lie? Phan: ang mawh nan:

kham: pax tix yum lie?"

Yam an, Yudax ah nin: ka Simon "Nawh Cao: kok ka ax". Mai: Simon kawx krai nin: "Aux kawx yaox ka Nawh Cao: ot tau mai: kawncaw raoma: khankix heue. Mai: kawncaw raoma: tix kaux ah nin: 'Lih khaing: tin:, nyiex cawng in tag ah tix khруп'. Viang mawh nan:, aux ang koe: rhawm: tix lih khaing: tin:, grawhgrawng: nawh, pui tiblax tag lih tix tieh loh khaing: daux pui in khankix heue."

Mai: kawncaw raoma: baox chawm nin: ka Simon mai: Yudax "Khex simie pax tix luat luan khaing: tin:, mai: khex simie pax tix kieh ka nyiex cawng in, mai: pui in laux lie? Phan: ang mawh nan:. kham: pax tix yum son Simiang lie? Ah pa koe: rhawm pax liak". Simon mai: Yudax ang koe: rhawm: ka ceu pa klawd ju pa tokaux tix khaing. ceu pa som ju pui tang: kaux heue. Awm: pa tat kiex tix yum tax vad mai: pui khankix plaux ka Simon mai: Yudax, mai: ah yuh nan: daux been an heue.

Been in viang mawh been pa keud tix tiem: sonsang nabyam: ka kiex kawx, tag yaox tix ah nin:, dee bleeh pa simie tix plak jhi: yaox mawh tete heue. Yam an nhaox, viang Simon simie tix kieh pui, kaux sijax, piang meung tix, mai: pui ceu tix, mai: plaux ka kix jao an kawx, yam in nawh lih tix tawng ka Simiang Siyiex ang khin: tix kieh pui yuh ka grawng: ceu pa yuh ka mawx ang ah heue. Mai: yam an nhaox, Simon pa mawh pui pa ang nieh ang ciien, sonsang plaux ka pui koeng, jhak heue. yam in meed mai: ju pui tom: nie, mai: yaox ang lai sawg ka ceu pa im: ju pa tokaux tix heue.

Yakop pa mawh Puxke: Yohan**Daux kawncau kao: kaux ra:, pa yaox tix yum phaoxka: son Simiang Yesux**

Yakop mawh puxke: Yohan, mai: mawh kawncau: Zebedie: heue. Daux kawncau kao: kaux ra:, nawh mawh kawncau pa ang caox sidawng: tix kaux, mai: mawh pa kiek ex sivix rhawm: heue. Daux kawncau khankix, Yakop mawh pa yum sivoe son Simiang heue(Kawncau 12:2). Mai: nawh viex daux pui loe: kaux pa mawh sivoe, daux carang kawncau khawm: uik heue. Mai: daux kawncau, ceu pa mawh Yakop cao: kaing: tix kaux kienie, ang lo tix thong thiang: kah. Daux Makux 3:17, mai: daux Kawncau 3:13, khaix ceukaux Petrux phaw ka ceukaux, nawh, dee ra: kaux tix kaux heue. Daux Mathiex 10:2, mai: Lukax 6:14, khaix ceukaux Petrux mai: Andare, phaw kaceukaux nawh, dee loe: kaux tix kaux heue. Ceu pa phaw ceukaux Yakop sivoe ceukaux Yohan kienie tee mawh kheu mawh Yakop tix puxke: Yohan heue. Yuh ka mawx kawx, daux carang kawncau, Yakop viex sivoe heue. Viang mawh nan:, ex ang yaox tix tawng grawng: nawh tom: nie ceu heue.

Daux pa phaw ka grawng: Yakop, krax nu krax ciien pa yaox kienie mawh ceu pa ang yaox gwieh tix ot mai: Yohan heue. Daux Camlik, yaox Yohan mai: Yakop tia tix tau heue. Jhak tix yaox grawng: Yakop mai: Yohan ha:

Kiex mawh kawncau: Zebedie:, mai: mawh cao: myiet kax (Phuk lai tibbleh ah "met" kah, dee bleeh mawh "teei kax" heue) heue. Kix koe: mau khri: pie khaw:, mai: daux kaing jhaw: kix, pon vai ka pui cang: pui caing heue(Makux 1:19-20). Yam kok Simiang Yesux ka kiex, sonsang teei ka pui, dom: mawx dom: an, kiex hawt khaix Nawh Cao: heue(Mathiex 4:19, Makux 1:20, Lukax 5:1-11). Daux cubcaw: kawncau, Yakop mai: Yohan mawh pui pa ot dex mai: Simiang Yesux, awm: Petrux, mai: daux yam pa kied ting ceu, kiex ot tau mai: Simiang Yesux heue. Mai: kiex mawh pui Galilie: pa phai: taix pa phai: caong heue. Mai: Nawh Cao:, sum: ceukaux khraox kiex Bawnaji, dee bleeh ceukaux an, mawh "kawncau: simex sinum

praix", yuh ka mawx, kheu mawh kiex pa kied chix songrhawm: heue (Makux 3:17).

Daux lai Lukax 9:51-56, plak jhi: yam pui yaong: ang rieb ka Nawh Cao: mai: kawncau khankix, yuh ka mawx, Yakop mai: Yohan lih tix koe: rhawm: pa simie ngu lih khaing: raoma:, mai: gleeing ka yaong: an heue. Mai: kiek ra: kaux simie tix ao: min:, mai: koe: rhawm: pa simie tix ting lhaong: heue. Mai: daux meung Khrit, simie tix pon dee pa mhawm: heue(Makux 10:35-45, Mathiex 20: 20-21).

Ka grawng: ceu pa plak jhi: ka Yakop tix kaux khaing:, yaox ngie tix bawg khaing: heue. Ceu pa plak jhi: yaox awm: an kienie mawh daux lai kawncau 12:1-2, mai: mawh grawng: pa yum nawh heue. Daux lai an plak jhi: yuh nin:, "Yam an simiang khunhawkhaw Herut, nyeu taix tix sonsang tuktiak pui ceucao: tibbleh. Mai: nawh teei Yakop puxke: Yohan yum ka vaid heue."

Ceu pa tawng ex khaing: Camlik pa sitoc: mai: Yakop, mawh ngie ding heue. Viang mawh nan:, pa sitoc: mai: nawh pa mawh been, koe: tom: nie heue. Ka grawng: Yakop, pa kaux Yusibia, plak jhi: daux lai aliah phuk tix phuk pa mawh Hipotaing posiet(Hypotypes) cie Klimix, khaing: Alezandre(Clement of Alexandria) heue.

Pui tix kaux pa mawh pui pa viex ka Yakop hu: daux lum prawng see:, yam mhong: nawh ka mhai: sakse: pa kham: Yakop, kheu kied krox daux rhawm: nawh, mawh kawx kham: mhai: sakse: pa mawh nawh, kawncau: khrit tix kaux heue. Mawh kheu nan: pui an khyox ka Yakop, sonsang pluat ploi ka phimap: nawh, daux krax, yam viex ka kiex khawm ra: hu:, sonsang plaux heue. Mai: Yakop keud tix vud mai: ah nin: "Ceu pa nhim: kiek koe: tau mai: maix", mai: ngheut ka kaw an heue. Kiex khawm: ra:, yaox tix kham: ka krax kid kaing: heue.

Daux pui pa yum son Simiang Yesux khankix, Yakop kawx viex daux kix heue. Pie pui pa cha: ka kix kawx lih tix tieh loh, kheu kaux cong: krax yumrhawm: kix tix yum son Simiang heue.

Daux lai mhai: pa yuh kawncau cie Abidia(The Apostolic History of Abdias), plak jhi: ka Yakop mai, sara phi: ra: kaux, pa kaux Hamogini (Hermogenes) mai: Philetta (Philetus) heue. Yam tieh loh Philetta ceu krax yumrhawm: tix, kheu sidie x Yakop, mai: nawh kra: grawng: pa sang

ah tix tik ka ceu kaing yuh tix ka Hamogini heue. Yam an Hamogini phyawk ka philiettax ka cuyi pa chix tix heue. Philiettax tawx satang ka Yakop grawng: pa yaox nawh tix kham: krax tuk kha: heue. Yam sipaox Yakop man: phaced tix ka Philiettax, kheu siawp sibrawm: man: phaced an. Philiettax tom: luat luan heue.

Mai: Hamogini ploi: ka phicaox khankix, sonsang giex Yakop mai: Philiettax hoek heue. Viang mawh nan: phicaox khan kix ang pon kieh pie meeik tix mu: pa koe: dauw lawg Yakop laux heue. Yam deeh tawx Yakop lox ka phicaox an khankix, sonsang phyawk ka Hamogini, phicaox an khankix kawx, phyawk ka Hamogini mai: viex hoek heue. Viang mawh nan: Yakop kieh Philiettax ploi: ka Hamogini khaing: ceu pa phyawk an heue. Mai: ah nin: ka Hamogini "Maix pon hu: pa koe: rhawm: maix. Aux ang mawh pui pa pawk bix heue". Yam mhong: Hamogini lox an kied daox deng kah heue.

Mai: nawh ing ka nyiex tix, mai: keeig ka phuk lai pa sitioe: mai: cuyi pa chix tix khawm: uik, mai: baiox hoek ka Yakop, mai: khyox sonsang pluat ploi: ka phimap nawh heue. Yakop deeh kieh Hamogini lih doh keud ka ceu pa pie pa ihen ka pui tang kaux phaoxka: nhaox heue. Mai: baiox sidiex sonsang tan lu ka mau pa pon tix, kheu cuyi pa chix nawh an heue. Mai: Hamogini kawx hawt tix yuh awm: pa tawm: Yakop, ang joeng mawh, kheu kied ting krax yumrhawm: nawh, pie pakpeung pa daox pa am: kawx pon yuh heue (The Apostolic History 4, 1-9).

Phex krai yuh nan: yuh ka mawx, ka grawng: plak piang kienie, pui an khankix, mawh jao viex dauw been pa keud pa kied am: pa sitioe: mai: grawng: Yakop heue. Hoek tom: yamin, mhai: ka Yakop mawh pui pa singax singeh pa pau ka meung Speng (Spain) heue. Ka grawng: pa sitioe: Yakop, mai: meung Speng, plak jhi: tix deuh awm: in heue. Yakop hu: ka meung Speng, mai: sidiex ka lox bwan: gauxrhawm: gauxrhi: tan:, mai: yam deeh bleeh nawh ka meung Palatinax, simiang Herut plaux ka nawh heue. Mai: pa kaux Hamogini mai: Philiettax pa mawh sara phi: ka: nhaox, teei tix viex ka lawng Yakop, mai: yam lih hu: kiex khaing: veng Jawpa (Joppax) ka reu, dauw pasax hoek ka praok meung Speng heue. Kiex hoek dee Airia Flara (Iria Flaira) pa deeh kok mawh dee le Piedru yamin, mai: deuh ka lawng Yakop rheung: rheung: dee an heue. Dee an, lih tix mawh pa daox pa am:, kheu jao lawng Yakop heue. Dauw num khrit daix (8) yieh, yam hoek

puing pui tiag kix ka meung Speng, lawng Yakop lih tix grai: heue. Dauw num khrit dim: (9) yieh, kheu deeh yaox ka lawng Yakop, simiang pa kaux Aphawngso (Alphonso), pa mawh pui pa singax singeh rhawm:, viex ka lawng an hu: dee Kompostela (Compostella) heue. Lawng Yakop kawm koe: tom: yamin dee an, ah yuh nan: heue. Lox Kompostela mawh plak lox Lietding (Ad Sanctum Jacobum Aposotolum), phan: ang mawh nan:, mawh lox pa laux khaing: lox Speng (Giacomo Postolo), mai: dee bleeh nawh kienie, mawh "Yakop pa mawh kawncau (James the Apostle) heue". Mai: hoek tom: yamin, dauw meung Speng veng Saragosa (Saragossa) koe: rieang tix mu:, pa mawh rieang Marix heue. Sivoe rieang an, tok ka kaww ngu jeeing jeeing heue. Mai: koe: lox pa ah yuh nin: "Yam sidiex gau Yakop dauw meung Speng, Marix hoek tix tawx riangrao ka nawh heue.

Been in kienie viex sivoe, dauw lai pa tiem: pa kaux Isido pa ot dee Sivi (Isidore of Seville), dauw num khrit aliah (7) yieh heue. Viang mawh nan:, ka Yakop puxke: Yohan, lud tiem: mai: Yakop pux Simiang Yesux heue. "Yakop pa viex dauw dee pon: kaux tix kaux, pa mawh dauw carang kawncau pa mawh kawm: Zebedie: mai: puxke: Yohan kienie tawx lox nawb hu: ka pui kao: ceu ra: pa hoik prung: prang: roi rhuat ku dah ku dee heue", plak jhi: yuhnan: heue (Yakop 1: 1). Mai: grawng: krai nawh lox bwan: gauxrhawm: gauxrhi: dauw meung Speng, mai: plak ka khaix teug Uyawpax (plak Man) kawx viex khawm: heue.

Yakop pa tiem: ka lai Yakop kienie ang mawh Yakop puxke: Yohan heue. Yakop puxke: Yohan, kheu mawh nawh pa yum ka:, yuh ka mawx, grawng: ceu pa sitioe: nawh mai: meung Speng kienie ang doh pon mawh heue. Grawng: pa viex dauw been an, viang simie tix kieh awm: pa viex dauw been an kawx, mhai: sakse: pa mawh tete telai ang yaox kah heue.

Dauw rieng tix mu:, yaox yuh nin: Yakop giex ka phuk lai Camlik tix khwan: taix tix, tix plak, mai: taix tang: plak giex khaox gix mai: phuk lai num: riah pa tiem: ka taix tix heue. Dee bleeh kienie mawh nin:, Yakop pa mawh kawncau hu: krax singai, sonsang sidiex gau ka lox bwan: gauxrhawm: gauxrhi: heue.

Pie dauw pa ang kriem kre pa mawh grawng: Yakop, yaox ka pakpeung riangrao nawh awm: plak greem: heue.

(1) Yakop ang koe: rhawm: lhat. Mai: chix pluat ploi: ka phimap

pui. Mai: dauw kawncaw. nawh yum ka: heue. Mai: dauw been pa sitioe: mai: nawh, rhawm: pa ang nawh chix lhat, mai: rhawm: pa chix pluat ploie: nawh ka phimap khankix an. pon nyaw glaw ka pui pa sawg ka phimap nawh, sonsang pon ka krax yumrhawm: kawm: khrit heue.

(2) Dauw Yakop, rhawm: pa bohrhawm: pa bohrhi: ang koe: heue. Awm: yaow Andare tix ot greem; veei Petruw, Yakop kawx, kheu yaow nawh tix ot greem: veei Yohan.nawh tom: ang ao: min: (ang sidawng: tix yaow) heue. Dauw cub puxaik pa ao: min: tix cub, ju pa yaow tix ot dauw ju pa ang ao: min kienie ang yie yie heue. Pie dauw krax ot krax koe: yuh nan:, jhak heue, Yakop pon ot tix im: ju tix haok hwan: heue.

(3) Puxaik ra: kaux pa mawh Yakop mai: Yohan kienie kiex mawh pui pa yumrhawm: mai: pa nabyam: yung yi: dauw beenli heue. Dauw lai Mathiex(2:20-28), mai: lai Makux (10:33-45) yaow yuh nin:, “Yakop mai: Yohan rawg mhaing: tix ngawm plak taix khawn: dawm: tix kaux, mai: plak taix khawn: gwiex tix kaux heue. Phan: keud ka ceu an, tag ce: kiex koe: rhawm: haktiex, mai: koe: rhawm: tix simie tix ting lhaong: heue. Viang mawh nan:, ceu pa rawg mhaing: an, plak jhi: yaow ka krax yumrhawm: pa kaux cong: kiex piang Simiang Yesux, mai: plak jhi: ka grawng: chix jhak kiex plak pa mhawm: ngie heue. Yam an kienie mawh bawgyam pa ang sax doh pon keud ka Simiang Yesux tag yaow tix ngawm dangngeung tix dah dah heue. Grawhgrawng: nawh, yam an, Simiang Yesux mawh ngie sara sidiex tix kaux, pa ang koe: nyiex, pa ang koe: ma:, pa mawh pui Galilie: heue. Mai: kaing yuh pa yuh simiang Yesux kawx, mawh kaing yuh pa tag yaow tix sipub mai: pui pa giex kaing haktiex, mai: mawh kaing yuh pa tag yaow tix sipub mai: krax lhat krax graung tete heue. Pie dauw bawgyam pa yuh nin:, Yakop mai: Yohan kienie, kiex mawh pui pa yumrhawm: ka Yesux mawh simiang khunhawham heue.

(4) Yam tiag tix yaow ka Yakop mai: Yohan kienie lih tix koe: krax pa laigrhawm: ceu pa kied mhawm: heue. Yam rawg mhaing: Yakop mai: Yohan dee lhaong:, dauw meung cie Simiang Yesux Khrit. Yesux ah nin: ka kiex “Pax ang tawng grawhgrawng: pa rawg mhaing: pax. Pax chix nyaux kaww pa nyaux Aux lie? Phan: ang mawh nan:, pax chix kham: krax baptis pa baptis Aux lie?” Mai: kiex deeh ah nin: ka Nawh Cao: “Chix tix heue”. Mai: Yesux baow ah nin: ka kiex “Kaww pa nyaux Aux, pax tag sang nyaux

heue. Mai: pax tag sang baptis ka dauw krax baptis pa baptis Aux heue” (Mathiex 20:22-23, mai: Makux 10:37-39).

Mawh kheu nan:, puxaik ra: kaux an, nyaux ka kaww pa nyaux Simiang Yesux heue. Kaww pa nyaux kiex, mawh ceu mawx, jhak tix yaow ha:. Yohan hu: ka veng Efesux, mai: sidiex gau ka lox bwam: gauxrhawm: gauxrhi: heue. Mai: yaow tix ot tan: mhawm: mhawm:, tom: hoek ju tix, been tix yiex(100) num, mai: yum mhawm: mhawm: awm: pa koe: been heue. Ju Yakop kienie kied ngoing, mai: yaow tix yum ka vaid heue. Kiex khawm: ra: yaow tix nyaux ka kaww pa nyaux Simiang Yesux heue.

Dauw mau Romax, viex rieang moi mhaing: tix mu: pa jhak plak khu: dee tan, mai: thai:, mai: ngai: lai pa tiem: tix deuh kienie mawh nin: “Son tix ceu ceu, kieh satix koe: liak”. Mai: koe: dee bleeh yuh nin:, moi mhaing: an, tag yaow tix koe: satix son khu: dee tan, phan: ang mawh nan:, tag yaow tix yuh kaing thai: leng lang: ju tix heue. Kawm: khrit pa yum son Simiang mai: kawm: khrit pa kaux sijax leng lang ju tix, pa khawm: ra: kaux an, mawh pui pa nyaux ka kaww Simiang Yesux heue. Pui mawx kawx ang lheu: ting piang paow tix, tix kaux lai tix kaux heue. Kawm: khrit khankix kawx, dauw ceu in ra: ceu tag yaow tix, koe: satix, son tix ceu ceu jheeng jheeng heue.

Bathawlamie:

Daux lawg pa hoik luan khankix, hoik tiem tix deuh kaing: lai grawng: pa sidawng: kawncau khankix heue. Viang mawh nan.: sonsang tiem: ka kaing: lai pa sitioe: mai: Bathawlamie: kienie ang koe: heue. Grawhgrawng: nawh, daux Camlik khraox, daux carang kawncau, plak jhi: ka ceukaux nawh ngie, mai: kheu ang plak jhi: ka grawng: nawh tom: nie ceu heue. Bathawlamie: mai: Nasanilax tee: mawh tix kaux khaing:., viang mawh nan.: ex paw nyang deuh awm: an, mai: jhak tix yaox tix kaux hoik tix kaux ha:.

Ceukaux, Bathawlamie: viex daux carang ceukaux kawncau kao: kaux ra: heue(Mathiex 10:3, Makux 3:16, Lukax 6:14, Kawncau 1:15). Yam kum: kawng: ex carang ceukaux kawncau nux, Bathawlamie: mai: Nasanilax mawh tix kaux khaing:., mai: hoik plak jhi: grawng: chix koe: ceukaux ra: ceu heue. Phan:deeh keud tix yaox ceex kienie..

(1)Bathawlamie: kienie ang mawh ceukaux phaoxka: cie pa pui tix kaux. Mai: mawh ceukaux ra: kaux tix kaux pa ao:., mai: ceukaux an:., sitioe: mai: ceukaux keeing: nawh heue. Dee bleeh Ba(Bar) kienie mawh "Kawn:." mai: Bathawlamie: (Bartholomew) kienie mawh "Kawn: Thawlamie: (Tolamai) heue. Mawh kheu nan:., ceukaux phaoxka: tag koe: ka Bathawlamie: heue. Jao an, viang ceukaux Bathawlamie: mai: ceukaux Nasanilax tang: kawx,mawh tix kaux khaing: heue.

(2)Daux lai Khrit loe: phuk, pa mawh phaoxka:., ang viex grawng: Nasanilax.Mai: daux lai khrit pon: phuk tix phuk kawx ang plak jhi: ka grawng: Nasanilax heue. Viang mawh nan:., pui tiblax ang hiex yumrhawm: ka ceu an heue. Daux lai Yohan (1:43-5, 21:2), Nasanilax viex daux cubcaw: kawncau heue.Mai: yaox plak jhi: ka nawh,mawh kawncau tix kaux heue.Phan: Bathawlamie: mai: Nasanilax viex daux carang kawncau kienie ceukaux ra: kaux an, tag yaox tix jhi: ka pui tix kaux khaing: heue.

(3)Daux lai khrit mai: daux lai kawncau, ceukaux Philipux mai: ceukaux Bathawlamie: tia: tix jheeng jheeng heue. Tag mawh kheu meed kiex tix ot tau mai: paox tix, jheeng jheeng heue. Daux lai Yohan, Philipux viex ka Nasanilax hoek ka Simiang Yesux heue(Yohan 1:45). Mai:

Bathawlamie: mai: Nasanilax kienie tee mawh tix kaux khaing:., kheu yaox ex kied meed Philipux ka Bathawlamie: ang ah, Nasanilax ang ah heue.Viang mawh nan:., sonsang jhi: mhai: sakse: grawng: mawh Bathawlamie: mai: Nasanilax tix kaux khaing: sidawng: kienie kied nu tete heue. Grawhgrawng: nawh,kheu koe: pa ah nin:., pui tiblax pa viex daux Camlik mai: Nasanilax mawh tix kaux khaing: heue. Yuh ka mawx kawx, koe: grawhgrawng: pa pon jhi: ka grawhgrawng: pon mawh Bathawlamie:., mai:Nasanilax mawh tix kaux khaing: heue. Viang mawh nan:., daux yamin keud tix yaox kaux mawx kawx an ha:.

Daux Camlik khraox, kheu ang plak jhi: ka grawhgrawng: Bathawlamie:., yuh ka mawx,ex tom: tag yaox tix jhak ka grawhgrawng: nawh an, daux been, mai: daux pa kraik kuad di:dix heue.

Ceu pa ce:., pa kaux Jerom ka grawng: pa sitioe: mai: Bathawlamie: kienie, mawh krax pa laigrhawm: heue. Pa kaux Jerom ah nin:., "Daux kawncau kao: kaux ra:.,mawh ngie Bathawlamie: tix kaux khaing: pa keh khaing: ceucat simiang heue". Mai: hoik plak jhi: grawng: mawh Bathawlamie: kawn: Thawlamie: (Tolmai), phan: ang mawh nan: kawn: Talamie (Talmi) heue.Daux lai Samoelax ra: phuk tix phuk (3:3), plak jhi: simiang Gesxurix mawh Talamie: heue. Yam an:., simiang an koe: kawn: sibon: tix kaux, pa kaux "Makha" heue. Kawn sibon: an mawh simoeng simiang Davit, mai: mawh miex Abashalon heue. Mawh kheu nan: ah nin:.,Bathawlamie: mawh ceucat simiang Talamie: an heue.

Phan: baox tix kraik: been tix mu: kienie Bathawlamie: mawh kawn: Tawlamix (Ptolemy), kheu ngai: lai plak khaix ceukaux Bathawlamie:., awm: ceukaux Tawlamix(Ptolemy) heue. Mai: ah nin:.,Tawlamix(Ptolemy) kix, kheu mawh kix simiang meung Ejiptux, Bathawlamie: tom: mawh ceucat simiang Ejiptux khankix heue. Ang ah ceu pa ce: in, chix pon mawh heue. Viang mawh nan:., phan: ah daux cubcaw: kawncau, pa mawh cao: teei kax, pa koe: krax ot krax koe: pa tiem:., mai: ceucat simiang khankix meed paox tix, mai: yuh paoxpie tau kienie, ceu an mawh ceu psidah yum tix heue.Kawn: khrit khankix, jhak ka khaoxlhak,mai: lauxrhawm: jheeng jheeng, mai: kix mawh pui pa pon ka ju pa khraox, kheu ceu pa deeh im: Nawh Cao: heue.a kied koe: krax laigrhawm: heue.

Been pa sitioe: mai: Bathawlamie: koe: tom: nie heue. Been in khankix num: ka dee loe: dee, pa mawh dee pa sidiex Bathawlamie: mai: lih tix mawh heue.

Mai: koe: lox pa ah nin:, “Daux meung India, Bathawlamie: krai loxbwan: gauhrhawm: gauhrhi: heue.” Mai: ka grawng: pa sitioe: Bathawlamie: mai: India, pa kaux Yusibia mai: Jerom, plak jhi: daux lai mhai: beenli pa tiem: kiex (Eusebius, The Ecclesiastical History 5,10,3, Jerome, Concerning Illustrious Men 36) heue.

Pa kaux Pantenax, pa chix cuyi plak Satawek (Stoic Philosopher) khaing: Alezandre(Alexandria) kienie lih tieh loh tix ih ka beenli ih kawn: khrit heue. Yam nawh hu: sidiex gau lox bwan: gauhrhawm: gauhrhi: daux meung India, tiblax hoik dawg mawh kawn: khrit, mai: yaox ka lai Mathiex pa tiem: plak lox Hebric: ka kix ang ah, mai: Bathawlamie: pa mawh kawncau, sidiex gau lox bwan: gauhrhawm: gauhrhi: ka pui India mai: grawng: yaox nawh ka pa deuh Bathawlamie: lai Mathiex pa tiem: plak lox Hebric: ka kix ang ah plak jhi: yuh nan: heue. Viang simie tix yumrhawm: ka ceu pa sidiex gau Bathawlamie: loxbwan: gauhrhawm: gauhrhi: daux meung India kawx, sonsang pon yumrhawm: tete telai, ang doh pon mawh heue.

Daux meung Parigia (Phrygia) kawx, Bathawlamie: sidiex gau ka lox bwan: gauhrhawm: gauhrhi:, koe: lox pa ah nan: khawm: heue. Daux grawng: Philipux (Acts of Philip) hoik plak jhi: ka grawng: yum Philipux ka jim: lawm:, son Simiang, yam kham: nawh mhai: sakse:, mai: Bathawlamie: dee Hirapoli, daux lawg pa hoik luan nux heue.

Mawh kheu nan:, pon ce: yuh nin:, viang Bathawlamie: hu:, mai: sidiex gau lox bwan: gauhrhawm: gauhrhi: tau, mai: Philipux kawx, kheu ang nawh yum son Simiang awm: Philipux, nawh tom: baox tix hu: sidiex gau lox bwan: gauhrhawm: gauhrhi: dee tang: dah heue.

Mai ah nin: Bathawlamie: hu: kham: mhai: sakse: daux meung Amenia (Armenia) khawm: heue. Mai: koe: lox pa ah nin: “Bathawlamie: jah tix sum: ceucao: Amenia heue. Mai: koe: lox pa ah nin: Bathawlamie: yum son Simiang daux Abana(Albania), pa kok mawh veng Dabin (Derbend) yam in heue. Daux lai mhai: grawng: kawncau, pa tiem: pa kaux Abdia (Abdias), plak jhi: tix deuh grawng: yum Bathawlamie: son Simiang heue. Ah nin: dee pa yum nawh kienie mawh meung India heue. Mai: ceu pa plak jhi:

tix tiem: tang: dah daux krax pa laigrhawm: kienie mawh awm: plak greem: heue.

Hauk kaing: Bathawlamie: lung mai: gawk, mai: tawb yhaok nawh heue. Mai: nex nawh paing, mai: sok ngai: nawh vieh, mai: kaing: nawh ting heue. Mai: hauk jheeh nawh lang:, mai: ang hiex lung heue. Mai: tokaux lang: nawh mawh pie khaw: heue. Sibex pa ceep nawh kienie mawh pa lung piang pa paing heue. Mai: sibex greem: nawh mawh pa paing heue. Viang ceep ka sibex an, hoek tom: tinga: liah(26) num kawx ang riah, ang chix rham:. Mai: kiep nawh kawx kaux cong: hoek tom: tinga: liah(26) num: heue. Mai: nawh rawgbwan: ponngawb tix yieh (100) bawg, mai: ponsawm: tix yieh (100) bawg heue. Mai: lox nawh awm: lox phlu: teet tawng, mai: kawncau raoma: kix pau nawh heue. Kheu mawh nawh pui pa chix gauhrhawm: jheeng jheeng: ,nawh chix ka lox ku ceu” mai: tiem: tix deuh yuh nan: heue.

Mai: Bathawlamie: jhi: siawp sibrawm tix dee an heue. Mai: cox ka jhawm: saux kawn: sibon: simiang moi, pa mawh jhawm: saux yhot heue. Mai: grheu: ka phicaox pa ot daux rieangrao pa krub simiang, lih heue. Pui khankix yaox ka phicaox pa lih an heue. Mai: phicaox an:, lung nex, mai: lang: pak ngai:, mai: lang: hauk jheeh, mai: hauk kaing: kix lang: hoek tom: loek caong kix heue. Lhat graung ka yaox tix kix, mai: khaing: meeh kix kawx lih ngu heue.

Simiang mai: pui khankix, lih tix tieh loh, mai: baptis heue. Viang mawh nan:, tax vad pa ot nyiex cawng khankix cha: ka Bathawlamie: heue. Tax vad an khankix, hoek dex pux simiang ,pa kaux Astiyagi (Astyages) heue. Mai: pux simiang giex ka Bathawlamie:, mai: tuktiag tukte: nawh heue. Mai: tak ka hak nawh, mai: kieh nawh kham: geu krax kharhawm: piang khaoxlhak hoek tom: yum nawh heue. Bathawlamie: kham: mhai: sakse: son Simiang Yesux, mai: yaox tix yum son Simiang Yesux, daux ceu pa kied tuktiag tukte: heue.

Pa ang viex daux Camlik, pa mawh pa plak jhi: pa kaux Jerom, ceu pa tiem: ka grawng: pa tik tix deuh, pa mawh grawng: Bathawlamie: kienie, mawh grawng: pa chawk Bathawlamie:, ceu pon: ceu ka Simiang Yesux, mai: Marix, yam deeh kaoh im: Simiang Yesux Khrit mai: yam ang Nawh Cao: nyang haok piang mcung raoma: heue.

Yam Bathawlamie: chawk nin: ka Simiang Yesux "Hu: Maix dee mawx, yam ot Maix piang khaoxlhak?" Mai: Yesux pawk mai: ah nin: "Aux hu: ka meung yum, mai: sidiex meung yum heue. Mai: phyawk ka nawh ka ceng: pa ang pon luat, mai: viex ka cao: kaing: khankix hoek heue. Khaix an, Aux deeh hoek tix ot piang khaoxlhak heue." Ceu in, mawh ceu pa kied laigrhawm:, mai: lox "Hu: ka meung yum" kienie mawh grawng: tix ceu, pa yumrhawm: kawm: khrit kix, yam jah kawm: khrit tix koe: didix heue.

Mai: Bathawlamie: chawk nin:, "Phan: mawh tix ngaix, yum pui miex kaux, mai: keh pui miex kaux lie?" Daux lai pa tiem: ka taix khankix, ceu pa pawk khankix kienie ang sidu tix ceu mai: tix ceu heue. Yuh ka mawx kawx ceu pa yaox tix tawng khaing: an kienie, phan: mawh tix singaix, yum pui loe: mheen:(30000), mai: yaox ngie loe: kaux khaing: pa mawh pui rah pui see:, mai: phan: mawh tix singaix, pui keh kienie koe: loe: mheen; mai: tix kaux", mai: deeh pawk yuh nan: heue.

Yam chawk Bathawlamie: ka Marix son kraik pa ah kawncaw raoma: pa kaux Gabrelax, ah yuh ka mawx ka grawng: pa tag sang nghie: daux vaig Marix, mai: pa tag sang ah Yesux tix keh, jhak heue, Marix kraik: khawm: uik ka Bathawlamie: heue. Daux lai pa tiem: "Grawng: Bathawlamie:" ceu pa kied kieh ex laigrhawm: kienie mawh lawg rawgbwan: pa kied mhawm: heue. Yam ang Marix nyang kraik pa mawh kiex, rawgbwan: awm: plak greem: heue.

"Simiang Siyiex pa ting pa lhaong: mai: pa grum tawng khawm: uik, mai: pa grum naog mai: siawp sibrawm, mai: pa phan: ka can ceu pa koe: khawm: uik eue, son jhi: ka Maix ang pon ah ka jheeh tix, mai: Maix tawx lox mai: phan: raoma:, mai: haktiex, mai: can ceu pa koe: khawm: uik ka jheeh tix, mai: Maix yuh ka ceu pa ang khaw: caw dee khankix, deeh tix khaw: caw dee, mai: gwieh pa vaik, mai: pa riang, mai: phan: rawm: tix dah, mai: haktiex tix dah mai: kieh can ceu pa phan: khawm: uik naog piang an. Can ceu pa phan: Maix khawm uik, lhat graung ka Maix heue. Maix kia: nyien tix eei: ka ceu an: khawm: uik, Maix mawh Cao: pa nawb bwan: piang kix heue" mai: rawgbwan: yuh nan: heue.

Mai: yam khyox Bathawlamie:, sonsang jhi: ka meung yum, mai: simiang yum, jhak heue, jhi: ka simiang yum, mai: tawx akhwang ka Bathawlamie:, sonsang dig ka ngawg simiang yum heue.

Daux pa ghoik cie pa plak jhi: an, pa mawh ceu pa plak jhi: dee bleeh phimap pa phit pa vao ka khwan: singax singeh kawx mawh ceu pa kied koe: krax laigrhawm: heue. Yam chawk Bathawlamie: nin: ka Simiang Yesux "Phimap an, phex mawh ceu pa yuh ka mawx lie?" Yesux deeh pawk mai: ah nin: "Pui pa prawng see:, son tawx ka phimap, piang pui pa yuh kaing jhaw: Simiang Siyiex pa kied singax singeh kienie mawh pui pa phit pa vao ka khwan: singax singeh heue. Mai: pa hoek dex mai: nabyam: ka Simiang Siyiex kienie mawh pui pa khaw: tix pon Khwan: Singax singeh, mai: pui pa ah ceu pa ang cee ang cak ka pui an kix, ang yaox tix pon ka ceu pa pluat ploi: phimap heue". Dee bleeh mawh nin:, pui pa yuh pa cha: ka pui pa kham: mhai: sakse: lox bwan: gauxrhawm: gauxrhi: kienie tag yaox tix kham: ka krax prawng krax ciyang pa kied ting heue.

Yam hoik chawk Bathawlamie: nan: nawh singeuh ka taix Simiang Yesux pa moh ka pui khawm: uik, mai: ah ka lox yaogyaw pa kied mhawm: awm: plak greem: heue.

"Simiang Yesux eue, kieh siawp sibrawm Maix ting ting lhaong: lhaong: liak. Caoxrhawm mai: tawx ka bwanson: pa yaox yix khankix ka pui khawm: uik liak. Haleluya yaogyaw ka siawp sibrawm Siyiex awx. Siyiex eue, kieh siawp sibrawm Maix ting ting lhaong: lhaong: liak. Mai: Maix mawh Cao: pa taoh ka pui pa koe: phimap heue. Siyiex eue, kieh siawp sibrawm Maix ting ting lhaong: lhaong: liak. Krax yum hoik yaox tix kham: krax kaig krax tua daux pa tik pa vud heue. Simiang Siyiex eue, kieh siawp sibrawm Maix ting ting lhaong: lhaong: liak. Mai: Maix mawh shiang pa mhawm: cie krax rah krax see: heue. Yix yaogyaw Maix ka lai rhax heue."

Phuk lai pa tiem: grawng: Bathawlamie: kienie mawh been pa koe: tix yaox krax nab krax yam: tix mu: ngie heue. Viang mawh nan:, pui pa tiem: ka been in mawh pui pa yaox ka siawp sibrawm Siyiex heue.

Daux Camlik khraox. lheu: khaing: ceukaux Bathawlamie:, ang plak jhi: ka grawng: nawh heue. Viang mawh nan: daux been pa lih khaix khankix, dee iak kieh yaox ka rhawm: cie nawh sidawng: heue. Pui in kienie kied tawng ka Simiang nawh, mai: kham: mhai: sakse: loxbwan: gauxrhawm: gauxrhi: cie Nawh Cao:, mai: mawh pui pa yaox tix yum son krax yumrhawm: tix heue.

Nasanilax

Daux lai Yohan, yaox tix phat ka grawng: Nasanilax, ra: dee ngie heue. Nasanilax mawh pui veng Kanax meung Galilie: heue (Yohan 21:2). Nawh mawh paoxgrawm: mai: Philipux heue. Yam yaox Philipux ka Simiang Yesuxx, mai: nawh hu: ka Nasanilax, mai: krai grawng: hoik yaox ka Simiang Yesux heue. Mai: Philipux yumrhawm: yuh nin:, "Kaw pa hoik tiem: Mose grawhgrawng: nawh, ka daux lai beenli, mai: pa cao: jhai: khankix kawx, hoik tiem: grawhgrawng: Nawh, pa mawh Yesux kawm: Yosiep, pui veng Nazariet kienie mawh Misiyax Cao: taoh heue". Viang mawh nan:, Nasanilax kienie mawh pui pa ang chix yumrhawm: yie yie heue. Mawh kheu nan: Nasanilax chawk mai: ah nin:, "Ce u pa mhawm: pa mhiem: chix lih ka daux veng Nazariet tix ceu ceu lie?"

Ka ceu pa ce: Nasanilax, pon teei dee bleeh awm: in heue. Veng Nazariet ang mawh veng pa hai: pa meug heue. Mai: pon ce: yuh nin:, veng Kanax mai: Nasariet, kheu mawh veng pa dex tau, chix nunai tix keud paox tix, tix kaux lai tix kaux, kheu tiex kie x paox tix, tix veng lai tix veng heue. Philipux ang thung thiang: tix uik bawgyam kah. Mai: ah ngie nin: "Hoek tix jhak heue". Yam yaox Simiang Yesux ka hoek Nasanilax ka Tix, mai: ah nin: "Jhak heue, pui Isarilax tete, pa ang chix pie chix lhen:" mai: Nasanilax chawk ah nin: ka Nawh Cao: "Maix tawng aux yuh ka mawx?" Yesux deeh pawk lox ka nawh mai: ah nin:, "Ka: ang Philipix nyang bax kok maix, yam ot maix greem: khaox ruh, Aux hoik dawg yaox maix heue".

Daux meung Palatinax, shiao ka veei khaox ruh awm: lawg heue. Khaox ruh an, koe: krax lhaong: kao: phwan: (15) sawg, mai: kak an vieh been tingoe: (20) sawg heue. Ka khaox ruh an chix sum: dee dex siviex nyiex heue. Daux meung Palatinax, daux pui pa sia khankix, koe: ngie lawg tix lawg khaing: heue. Phan: simie tix rawgbwan: kienie yuh krax rawgbwan: greem: veei kraox ruh an yien yien yawg yawg heue.

Dee bleeh ceu pa ah Simiang Yesux: ka Nasanilax kienie mawh nin:, "Nasanilax eue, Aux yaox ka rawg maix bwan: yien yien yawg yawg. Mai: Aux tawng ka rhawm: maix, mai: Aux tawng ka ceu pa rawg mhaing: maix, pa yuh ka mawx heue". Awm: Simiang Siyiex tawng ka daux rhawm: Nasanilax khaing: dee singai heue (Phat ka lai Yawgyaw 139:2 liak).

Pie dee singai, ceu pa tawng Simiang Yesux ka ceu pa koe: daux rhawm: Nasanilax, kheu siawp sibrawm Tix kienie kied mawh pa daox pa am: heue. Mai: Nasanilax kied lhat kied graung, mai: ah nin: "Rabi eue, Maix mawh kawm: Siyiex. Simiang khunhawkhawm pui Isarilax heue."

Yesux pawk lox mai: ah nin: ka nawh "Kheu hoik krai aux ka maix. Aux yaox maix ot greem: khaox ruh, maix tom: yumrhawm: ka lie? Maix tag sang pon tix yaox ceu pa nie lheu: ting khaing: in sax heue". Nawh Cao: baoh ah nin: ka nawh "Aux krai: lox tete telai ka maix, khaix in, maix tag sang yaox baoh raoma: , mai: kawncau Siyiex haok mai: lih ka piang Kawm: kawm: pui heue (Yohan 1:43-51).

Pui chix lai khankix, pa mawh pui pa sawn: tix yaox ka Camlik khraox, laigrhawm: ka grawng: Nasanilax heue. Nawh mawh pui mawx, yam sawn: kix tix yaox, kix plak jhi: ka pui nie nie heue.

(1) Awm: pa yaox ex, pui khankix ce: nawh mai: Bathawlamie: mawh tix kaux khaing: heue. Ceu pa ce: awm: in kienie mawh ceu pa tat laung laung ang mawh. Daux num khrit dim: (9) yieh, pa kaux "Elia" pa koe: cuyi pingnya, mai: pa riex ju daux veng Damase, mawh pa ah ka ceu an phaoxka: heue.

(2) Mai: ce: Nasanilax mawh Simon pui Kananix khawm: heue. Simon mawh pui Kananix pa tiem: tix deuh yuh nan: daux Camlik khraox pa mawh lai pa tiem: ka taix tix, mai: pa ang mhawm: lai tiem: khankix, pui tiblah teei dee bleeh lud yuh nin: Simon mawh pui Kanax heue. Daux lai Yohan (21:2) ah nin: , "Nasanilax mawh pui Kanax heue". Mawh kheu nan: ce: Nasanilax mawh Simon heue. Tete telai Simon ang mawh pui Kanax, viang mawh nan: mawh pui Kananix, phan: ang mawh nan:, Zelot (Zealot) heue.

(3) Pa kaux Epiphinnia (Epiphanius) ah nin: Nasanilax mawh kawncau pa ang plak jhi: (phaw) ceukaux khaing: daux kawncau Yesux ra: kaux tix kaux, pa hu: yaong Emawk heue (Lukax 24: 1-25). Daux lai Lukax, jhi: ngie tix kaux pa kaux Kalawphax, mai: ang jhi: ka pui pa kawm deug tix kaux heue.

(4) Mai: ah nin: Nasanilax mawh kawncau pa moh Simiang Yesux heue. Phan: mawh awm: an, Nasanilax mai: Yohan tag mawh tix kaux khaing: heue. Mai: lox pa jah Yesux tix ah ka Nasanilax kienie mawh lox

yuh nin: "Pui Isarilax tete, pa ang chix pie chix lhen:" heue (Yohan 1:47). Dee bleeh lox an, mawh nin:, "Son ceu pa simie Aux tix yuh, maix kienie mawh pa kied khaw: tix hawt khaix heue". Pui pa yumrhawm: awm: in, yam hoik lih tix ot tau mai: Simiang Yesux kienie tag lih tix mawh kawncau pa moh Yesux, ceu pa ang pon yumrhawm: ang koe: heue.

(5) Daux pa kraï pa keud daux rhawm: khankix, ceu pa kieh ex laïgrhawm: kienie mawh ceu pa kraï nin:, Nasanilax mawh Sathphan heue. Num riah ceu pa ce: in kienie mawh ceu pa ce:, jao ah Simiang Yesux nin: ka Nasanilax "Aux kraï lox tete telai ka Maix, khaix in, maix tag sang yaox baoh raoma:, mai: kawncau Siyiex haok mai: lih ka piang Kawn: kawn pui heue" (Yohan 1:51).

Yam dex yum Sathphan, kheu teei simaox dheem: ka nawh, lox ah nawh, viex nin: daux lai Kawncau (7:56), "Jhak heue, aux yaox raoma: uik baoh, mai: Kawn: kawn: pui cung plak taix khawn: dawm: Siyiex heue". Kheu teei Sathphan ka lox sijax pa tawx Simiang Yesux ka Nasanilax yuh nan:, tom: ah Nasanilax mawh Sathphan heue.

Nasanilax mawh pui in, mawh pui an, pa ah nan: kienie mawh krax pa laïgrhawm: heue. Mai: phan: ah Nasanilax mawh kawncau pa viex daux cub kawncau tix kaux kaux kienie pui an tag caw tix mawh Bathawlamie: ngie heue.

Ceu pa caw ex tix satix kienie sara lhong: didix khankix, ang kix sawn: ka Nasanilax mawh kawncau tix kaux, daux cub kawncau heue. Mai: kix sawn: ka Nasanilax mawh pui pa kied chix mai: pa grum tawng ka lai pingnyap, mai: lai cao: jhai: heue.

Hoek tom: yamin, pui pa chix lai krax plak beenli Bariji khankix, ah nin:, "Nasanilax mawh pui pa kied chix ka lai pingnyap heue. Phan: ah lox phektiem: kienie, pa kaux Awgostin (Augustine), yumrhawm: ka Nasanilax ang viex daux kawncau kao: kaux ra: heue. Grawhgrawng: nawh, Awgostin ce: yuh nin: "Simiang Yesux tag cox ka haktiex in, mai: pui pa ang chix lai khankix heue" (Homilie on John 7).

Grigri pa mawh pui pa ao: min: (Gregory the Great) kawx rieb ka ceu pa ce: an heue. Grigri tiem: tix phaw daux lai nawh yuh nin: "Lox pa ah Simiang Yesux ka Nasanilax mawh lox pa yaw. Mai: lox pa ah Simiang Yesux ka Nasanilax "Jhak heue, pui Isarilax tete pa ang chix pie lhen: kienie mawh lox yaw Simiang Yesux ka Nasanilax heue. Mawh kheu nan:

Nasanilax nie lheu: ting khaing: kawncau tang: kaux khankix heue. Yam laug ka kawncau khankix, ceu pa laug ka pui pa ang koe: krax yaw kienie Simiang Yesux simie tix jhi: yaox ka kheu riangrao kix ang mawh, viang mawh nan:, kheu riangrao pa pon khaing: Simiang Siyiex heue" (Gregory Great, mor 33).

Phan: kraï, yuh ka mawx, pui an kix ce: Nasanilax mawh pui pa kied chix kied tawng ka lai beenli kienie "Ex hoik yaox Yesux" ceu pa ah Philipux nan:, daux lai pa deeh tiem: khankix, Nasanilax pawk mai: chawk nin: "Ceu pa mhawm: pa mhiem: chix lih ka daux veng Nazariet tix ceu ceu lie:? (Yohan 1:46). Lox pa chawk Nasanilax an, daux lai pa tiem: ka taix tix plak Greg ka: dix, kheu ang viex pakpeung pa chawk (?), mawh kheu nan: ce: lox an, ang mawh lox pa chawk, viang mawh nan: ce: mawh ngie ceu pa ah pa jhi: yaox ngie heue.

Awgostin (Augustine) tawx pa ce: tix mai: ah nin: "Yam mhong. Nasanilax pa mawh pui pa kied chix tawng ka Camlik, ka ceukaux veng Nazariet, nawh tee ah nin:, kheu pa keud pot jun pot tix 'ceu pa mhawm: pa mhiem chix lih ka daux veng Nazariet tix ceu ceu heue'" Mai: yam mhong: Nasanilax ka satang pa viex Philipux Nasanilax keud mai: ah nin: "Lox pa kraï maix tag mawh tete heue. Ceu pa mhawm: pa mhiem: chix lih ka daux veng Nazariet", lox pa ah Nasanilax nan: kawx pui tiblax yumrhawm: kah heue.

Yuh ka mawx, phex ce: ka Nasanilax mawh pa kied chix kied tawng ka lai pingnyap khankix, phan: ah tix yaox kienie daux lai Mathiex 2:23 kheu jhi: yaox yuh nin: "Mai: Nawh hoek mai: ot ka daux veng pa kok mawh Nazariet, sonsang naog gumlox pa hoik kraï cao: jhai: khankix, 'Tag kok Nawh mawh pui Nazariet,' heue. Ceu pa deeh tiem: Mathiex an, mawh ceu pa raux pa mox tix mu: heue. Grawhgrawng: nawh, ceu pa deeh tiem: Mathiex an, pui mawx kawx ang pon kraï sidawng:, mawh daux lai mawx, phan: ang mawh nan:, mawh cao: jhai: mawx pa ah kah heue. Mawh kheu nan: awm: mawh nin:, mawh ngie Nasanilax tix kaux khaing: pa pon plak jhi: (phaw) ka lai pa ang pui mawx pon plak jhi:, kheu mawh Nasanilax pa kied chix, mai: pa kied tawng ka lai pingnyap mai: lai lox cao: jhai: khankix heue.

Ceu in, mawh ceu pa ah, daux pa keud kawx, mawh ceu pa laïgrhawm: heue.

Viang tawng ka grawng: Nasanilax ceeix kawx, yam sitoe: tix jhak khawm: uik kienie pakpeung nawh lih tix sidawng:, awm: in heue.

(1) Nasanilax mawh pui pa phat mai: gau sawn: ka Camlik, mai: mawh pui pa sawg ka pa rah pa see: heue. Ceu pa ah Philipux nin:, daux lai Yohan (1:45). “ Ex hoik yaox kaw pa hoik tiem: Mose, grawhgrawng: nawh, ka daux lai beenli, mai: pa cao: jhai: khankix kawx hoik tiem: grawhgrawng: nawh kienie mawh ceu pa sidawng:, grawng: sawn: Philipux mai: Nasanilax ka Camlik tau rheung: rheung: ka grawng: Misiyax mawh pui pa yuh ka mawx, mai: tag sang hoek yam mawx heue. Philipux mai: Nasanilax, kheu mawh kiex pa phat ka Camlik, mai: pa sawg ka pa rah pa see:, yam lih hoek Simiang Yesux piang haktiex in, kiex pon tix tawng ka Nawh Cao: mawh Kawn: Simiang Siyiex heue.

(2) Nasanilax mawh pui pa rah pa see: heue. Mawh kheu nan:, daux lai Yohan (1:47) kok ka nawh yuh nin: “Pui Isarilax tete, pa ang chix pie lhen:” heue. Phaoxka: Nasanilax ang yumrhawm: ka lih pa mhawm: pa mhiem: khaing: veng Nazariet heue. Viang mawh nan:, yam yaox nawh Simiang Yesux, ceu pa keud nawh mai: ceu pa ce: nawh khankix, lih tix tieh loh, mai: daux nawh lih tix koe: krax yumrhawm: heue. Mai: Nasanilax mawh pui mhawm: tix kaux heue. Viang tang: siyox mai: ceu pa keud nawh phaoxka: kawx, phan: mawh pa rah pa see kienie daux Nasanilax koe: rhawm: pa rah. sonsang rieb kah heue.

(3) Nasanilax rawgbwan: sitoe: mai: Siyiex jheeng jheeng heue. Simiang Yesux yaox ka nawh greem: khaox ruh, ceu pa plak jhi: yuh nan:, daux lai Yohan (1:48) kienie Nasanilax phat ka Camlik. nari tom: nie greem: khaox ruh an heue. Mai: koe: dee bleh rawgbwan: heue. Phan: viexrhawm: mai: phat ka gumlox Siyiex kienie tag yaox ka pa mawh pa meh, mai: pa rah pa see: heue.

(4) Kaing jhaw: ceu pa tix ang ah, Nasanilax viexrhawm: khawm: yuh tix heue. Daux lai Yohan (1:49), Nasanilax ah nin: ka Simiang Yesux “Rabi eue, Maix mawh Kawn: Siyiex, Simiang khunhawkhawm pui Isarilax heue”. Yam rieb Nasanilax mawh Yesux Cao: taoh, jhak heue, nawh mawh pui pa rieb khawm: rhawm: khawm: rhi: tix heue. Mai: Nawh Cao: mawh pui pa kied ting lhaong: son nawh, yam yaox ka Simiang Yesux heue.

(5) Nasanilax kawx cong: daux krax yumrhawm: heue. Pie khaix hoik plaux ka Simiang Yesux piang khaoxlhak kawx, nawh ot tau mai:

kawncau khankix heue (Yohan 21:2). “Simiang khunhawkhawm pui Isarilax” pa ah Nasanilax phaoxka:, pa mawh Yesux viang yaox tix yum piang khaoxlhak kawx, nawh mawh pui tix kaux pa kawn ca yumrhawm: piang Simiang Yesux heue.

Phan: ce: Nasanilax mai: Bathawlamie: mawh tix khaing: kienie pui pa hoik kleuk ka pakpeung kiex an, daux Camlik khraox, ex tag yaox ka mawh pui pa koe: pakpeung pa mhawm: mai: pa grum naog tix kaux heue. Pakpeung pa tag yaox khankix kienie

(i) Mawh pui pa phat ka Camlik.

(ii) Mawh pui pa viexrhawm: tix rawgbwan: ka Simiang Siyiex.

(iii) Mawh pui pa appong ka pa tokaux, mai jheeh, mai: rhawmrhi: tix ka daux tawm: taix Siyiex.

(iv) Mawh pui pa kham: mhai: sakse: krax yumrhawm: tix ka daux kaing jhaw:.

(v) Mawh pui tix kaux daux pa kied viexrhawm: tix yuh kaing satsana, daux lai grawng been ceucao: heue.

Lawg (14)

Yakop Kawn: Alaphie:

Daux kawncau khankix pa tawng ex ceeix ngie mawh Yakop kawn: Alaphie: heue. Daux Camlik khraox, lheu: khaing: plak jhi: ka ceukaux nawh, ang plak jhi: ka grawng: nawh tidtix heue (Mathiex 10:3, Makux 3:8, Lukax 6:15, Kawncau 1:13). Pie daux been khankix, mai: daux pa kraik kuad khankix plak jhi: ngie nawh yaox tix yum son Simiang piang khaoxlhak, mai: kraik lox bwan: gauxrhawm: gauxrhi: daux meung Parathi, phan: ang mawh nan:, meung Pasia (Parsia), mai: ang plak jhi: tang ceu heue. Daux Camlik khraox phan: ex sawn: tix yaox pa sitioe: mai: Yakop kienie yaox ka ceu pa ting ceu loe: ceu heue. Ceu phaoxka: kienie mawh ceu pa mawh tete heue. Ceu ra: ceu tix ceu kienie mawh ceu pa tag yaox tix tat khaing: khaix hoik keud daux rhawm: tix heue. Loe: ceu tix ceu kienie mawh ceu pa tag yaox tix sawn: heue.

(1) Plak jhi: grawng: mawh Yakop kawn: Alaphie: heue. Daux lai khrit loe: phuk phaoxka:, plak jhi: ka kok ka Mathiex son mawh kawncau cie Khrit, sonsang hawt khaix Nawh Cao: heue (Mathiex 9:9, Makux 2:14, Lukax 5:27,28). Daux lai Mathiex, mai: daux lai Makux, ceu pa plak jhi: khankix, koe: dee bleeh tom: nie ceu, awm: an heue. Daux lai Mathiex viex yuh nin:, “Yam hu: khaing: tan: Nawh yaox pui tix kaux, pa kaux Mathiex, ngawm dee koh mau, mai: ah nin: ka nawh “Hawt Aux heue”.

Daux lai Makux tiem: yuh nin: “Yam hu: krax, Nawh Cao: yaox Lewix kawn: simex Alaphie:, ngawm daux ngiex koh mau, mai: Nawh Cao: ah nin: ka nawh “Hawt aux heue”. Mawh kheu nan:, Mathiex mai: Lewix, ceu pa mawh tix kaux khaing: kienie ang koe: krax pa ang yumrhawm: heue. Phan: awm: nan:, keeing: Mathiex caw tix mawh Alaphie: heue. Phan: awm: nan: Mathiex mai: Yakop caw tix mawh puxaik lih heue.

(2) Ceukaux kawncau pon: kaux pa ghoik, daux carang kawncau pa plak jhi: Mathiex mai: Makux kienie Yakop kawn: Alaphie:, mai: Lebie: ceukaux ru nawh mawh Thatdie:, mai: Simon pui Kananix, mai Yudax Isakariut kaw pa tik pa tawx Nawh Cao: heue (Mathiex 10:3-4, Makux 3:18-19). Mai: ceukaux kawncau pon: kaux pa ghoik, daux carang kawncau cie Lukax kienie mawh Yakop kawn: Alaphie:, mai: Simon pa kok mawh

Zelot, mai: Yudax pux Yakop mai Yudax Isakariut pa mawh kaw pa tik pa tawx Nawh Cao: heue” (Lukax 6:15-16., Kawncau 1:13). Mawh kheu nan:, Yudax pux Yakop mai: Thatdie: khankiex kriem kre(rug) mawh tix kaux khaing: heue. Ka pui pon: kaux an, kheu plak jhi: tau jheeng jheeng, daux pui pon: kaux an, awm: koe: been pa sidu heue.

Awm: pa hoik tawng ex, Simon mawh Zelot mai: mawh pui pa viexrhawm: tix moh ka pui ceu tix, tix kaux heue. Yudax Isakariut kawx koe: grawng: krax pa pon mawh pui pa viexrhawm: mai: moh ka pui ceu tix, tix kaux heue. Daux phuk lai pa tiem: ka taix tix plak lox Latin pa viex aye, kok ka Yudax pux Yakop mawh Zelot heue. Mai: daux been krax pa bung: cie ceucao:, pa mawh been krax pa bung: pa sitioe: mai: kawncau, yaox tawx beeh glawm: ka Thatdie:, sonsang kia: ngien ka miex mai khankix heue. Ceu pa sitioe: mai: kaing jhaw: an, daux phuk lai ra: phuk pa tiem: ka taix tix dix, plak jhi: grawng: deeh kok ceu kaux khraox ka Thatdie pa kok mawh Lebie:(Lebbaeus) heue. Mawh kheu nan:, Thatdie: kienie mawh Zelot tix kaux tete heue.

Simon, mai: Thatdie: phan: ang mawh nan: Yudax, mai: Yudax Isakariut khankix, kheu rug mawh kix Zelot khankix, Yakop pa mawh pui pon: kaux tix kaux kawx, koe: grawng: pa pon mawh Zelot, awm: been pui an kix koe: kaux heue. Rhawm: pa moh ka pui ceu tix, kheu phyawk tix deuh ka Yakop kawn: Alaphie:, mai: Simon Zelot, mai: Thatdie: phan: ang mawh nan:, Yudax mai Yudax Isakariut kix, sonsang mawh tix mu: khaing:, yuh ka mawx, pui an pon: kaux kienie ka: nhaox, koe: grawng: tom: nie ceu, pa viex daux cubcaw: Zelot heue.

(3) Ceu tix ceu pa rug mawh mai: tang: ceu ra: ceu pa yaox tix tat tix teei khaing: pa hoik keud sawm: kienie Mathiex mai: Yakop kawn Alaphie: khankiex, mawh puxaik heue. Yakop mawh pui Yudax, pa viexrhawm: mai: moh ka pui ceu tix heue. Mai: Mathiex mai Yakop pa mawh puxaik, viex daux cubcaw: kawncau heue. Dee in, yaox deeh khaw: puxaik ra: kaux pa tang: siyox been ka paox tix heue. Puxaik ra: kaux an, tang: mawh kaux mawx kaux an heue. Mathiex yuh kaing koh mau greem: simiang Romax pa kaux Herut Antopax (Herod Antipas) heue.

Yakop lih tix mawh Zelot pa moh ka pui ceu tix, mai: nawh mawh pui pa seeing: (koeng) ka pui pa yuh paox mai: meung Romax heue. Mathiex mai Yakop puxaik ra: kaux, pa lih tix ting lhaong: daux nyiex tix lhang:, lih

tix koe: krax ot krax koe: pa koeng ka paox tix. tix kaux lai tix kaux heue.

Yakop hoek dee pa tag sang swat tix plaux ka Mathiex ka gawn. kheu ce: ang kaux sijax piang pui ceu tix. mai: piang me:ng tix heue. Yam an. Yesux lih hoek piang haktiex. mai: kok ka puxaik ra: kaux an. mawh kawncau pa hawt khaix tix heue. Plak sivoe Simiang Yesux pa mawh sara ting cie kiex khawm: ra: jhak heue. pa mawh puxaik ra: kaux pa koeng ka paox tix. tix kaux lai tix kaux. mai: pa tang: siyox been phaoxka: nhaox. lih tix deeh khaw: mai: ih rhawm: paox tix heue.

Daux carang kawncau kao: kaux ra: ceu pa viex puxaik ra: kaux, pa mawh Mathiex mai: Yakop kienie mawh sakse: pa plak jhi: ka pa lih hoek Simiang Yesux piang haktiex in, mawh sonsang kieh kawm: pui mai: Siyiex yuh paox pie tau ang joeng mawh. mawh sonsang koe: pa nhim: daux kawm: pui, tix kaux lai tix kaux heue.

Lawg (15)

Thatdie:

Pa kaux Jerom (Jerome) kok nin: ka Thatdie: "Thatdie: Trinomia (Taddaeu Trinomius)" heue. Dee bleeh kienie mawh pui pa koe: ceukaux loe: ceu heue. Daux lai Makux (3:18). Makux kok ka ceukaux nawh. mawh Thatdie: heue. Daux lai Mathiex (10:3), Mathiex tiem: tix deuh nin: ka nawh "Lebie: ceukaux ru nawh Thatdie" heue. Mai: daux lai Lukax (6:16). mai: daux lai kawncau (1:13). Lukax kok nin: ka Thatdie: "Yudax pux Yakop heue".

Daux lawg (1), hoik plak jhi: ka grawng: mawh Thatdie: mai: Yudax kawm: Yakop tix kaux khaing: heue.

Daux lai khrit loe: phuk. ang plak jhi: ka grawng: nawh. Daux lai khrit pon: phuk tix phuk yaox ceukaux Yudax (Pa ang mawh Yudax Isakariut)" tix bawg heue. Daux lai an. tiem: yuh nin: "Yudax. (Pa ang mawh Yudax Isakariut) chawk mai: ah nin: ka Nawh Cao: "Simiang eue. Maix tag sang plak jhi: ex yaox tokaux Maix. mai: ang jhi: haktiex yaox yuh ka mawx?" Yesux pawk lox mai: ah nin: ka nawh "Phan: pui moh ka aux. nawh tag sang priex tix hawt gumlox Aux. mai: Keeing: Aux tag moh ka kaw an, mai: Yiex tag hoek ka nawh. mai: ot tau mai: nawh heue".

Lox pa ah Yudax mai Simiang Yesux tau. phan: keud tix yaox. mawh grawng: pa yuh ka mawx kienie daux lawg pa hoik luan nux. hoik plak jhi: grawng: tiem: tix deuh Yudax mawh Yudax Zelot. daux lai tix phuk. pa tiem: ka tai tix plak lox Lietding (Latin) heue. Pa kaux Yudax. phan: ang mawh nan: Thatdie: kienie mawh pui pa viex rhawm: tix moh ka pui ceu tix heue. Mai: nawh kawx keud pot jun pot ka pui Yudax khankix pa hoik laug Siyiex tix deuh. tag yaox tix kwang ka haktiex heue. Mawh kheu nan: nawh ang doh rhawm: ka Yesux. kheu hoik dex uik bawgyam pa ot Yesux piang haktiex in. sinyek sinyek heue. Dee bleeh pa simie nawh kienie "Simiang eue. ceu pa krai Maix ka yix. Maix mawh kawm: Simiang Siyiex pa laug Simiang Siyiex. mai: Maix mawh Misiyax Cao: taoh kienie kied khaw: tete telai heue.

Viang mawh nan: ceu in hoik hoek bawgyam sonsang sidawng: ka daux kawm: pui haktiex in heue. Hu: ka daux kawm: pui. kheu hoik hoek

bawgyam, sonsang plak jhi: siawp sibrawm grawng: mawh Maix, pui pa yuh ka mawx heue”. Mai: dee bleeh pa pawk mai: pa ah Simiang Yesux kienie mawh nin: “Ka grawng: Misiyax Cao: taoh, lheu: khaing: pui pa koe: rhawm: krax caoxrhawm: caoxrhi:, mai: pui pa hawt gumlox Nawh Cao:, ang pon plak jhi: ka pui tang kaux heue. Mai: phan: mawh pui pa hawt mai: nghiet ka gumlox Simiang Yesux, mai: pa nabyam: tix moh ka Nawh Cao: kienie Kawn: Cao: pa mawh Simiang Yesux, mai: Keeing Cao: pa mawh Siyiex leeing ju leeing phan:, tag ot ka daux rhawmrhi: nawh heue”.

Daux been ceucao: ka: didix, yaox ka been tix mu:, pa koe: krax nyaw glaw, mai: pa kied koe: krax pa daox pa am:, pa sitioe: mai: ceukaux Thatdie: heue. Daux lai pa tiem: pa kaux Yusibia mai: Jerom(Eusebius The Ecclesiastical History? 1,13.Jerome, Homili on Mathew 10,4), plak jhi: ka grawng: simiang Abgrax (Algarus) cie veng Edisax (Edessa), pa koe: dee plak caong ma: sex cie meung Mesopotemia (Mesoptamia) pa dex mai: rawm: klawng: Yuphritis (Euphrates) mai: Simiang Yesux sipaox lai ka paox tix, tix kaux lai tix kaux heue. Ka lai an, Yusibia yaox khaing: lum pa priex lai mhai: pa kwang haktiex pa koe: daux veng Edisax, mai: tiem: tix deuh plak lox “Surix”, phan: ang mawh nan: Siria (Syriax) heue. Mai: plak jhi: pa tokaux, pa deeh toe: tix tiem: ka lai an: heue. Simiang Abgrax jah tix tiem: ka Simiang Yesux heue. Kaing: lai an mawh nin:, “Pakpeung lai pa hoik sipaox simiang Abgrax ka Yesux” heue. “Ka lai in, kieh Anania (Ananias) sipaox ka Yesux pa koe: daux veng Yerusalieim” viex yuh nan: khawm: heue. Ngai: lai pa viex daux lai an: kienie mawh awm: plak greem: heue.

“Aux pa mawh Abgrax pa kwang ka veng Edisax, nawb lox ka Maix, pa mawh Yesux Cao: taoh pa hoek daux veng Yerusalieim heue. Aux mhong: satang Maix, Maix cox pui pa koe: jhawm: saux kix grai: pa ang viex sidah sidim: heue. Mai: aux mhong: Maix cox pui dug ngai: kix deeh chix yaox ang ah, mai: cox pui pa laux maung kix, deeh chix hu: ang ah, mai: cox pui sipawg kix deeh singax singeh ang ah, mai: grheu: ka phicaox, khaing: daux pui pa laig phicaox ang ah, mai: pie pui pa yum kawx kieh deeh kaoh im: ang ah heue.

Yam mhong: aux ka grawhgrawng: in khankix, aux hoik sawn: mawh Maix Siyiex pa hoek khaing: meung raoma:, mei: Maix mawh Kawn: Siyiex heue. Mawh kheu nan:, sonsang pon cox ka jhawm: saux pa yaox aux tix kham:, mai: aux khyox mai: tiem: lai in, sonsang hoek Maix ka aux daux pa

kha: heue. Mai: aux mhong: pui Yudax kix, keud tix tuktiak tukte: ka Maix heue. Ka aux, viang iak kawx koe: veng tix veng pa kied mhawm: heue. Daux veng in. Maix mai: aux pon ot mhawm: mhawm: heue.”

Mai: Yesux deeh sipaox lai ka simiang Ediasax, mai: deeh nhie: Anania tawx kah heue. Daux lai an, awm: plak greem: heue.

“Viang maix ang yaox Aux kawx. kheu yumrhawm: maix ka Aux, maix naog mai: bwanson: heue. Daux Camlik tiem tix deuh nin:, “Pui khankix viang yaox Aux kawx ang yumrhawm: viang mawh nan:, pui pa ang yaox ka Aux tag pon ka krax taoh kheu yumrhawm: kix heue”. Mai: ceu pa sitioe: mai: sonsang hoek tix cox ka jhawm: saux maix kienie yam hoik hoik beeh glawm: Aux piang haktiex in. Aux tag yaox tix deeh ing: ka Nawh Cao: pa ploi: aux hoek heue. Yam hoik hoek Aux ka Simiang Siyiex pa ploi: Aux hoek kienie Aux ka ploi: ka kawncau Aux tix kax, mai: nawh tag cox jhawm: saux maix moi, mai: tag tawx ju (krax taoh) ka maix, mai: pui pa ot tau mai: maix khawm: uik heue”.

Daux been an, baox tix plak jhi: yuh nin:, khaix hoik hoik haok Simiang Yesux meung raoma, mai: Nawh ploi: ka Thatdie: hu: ka veng Edisax heue. Thatdie: mawh kawncau tix kaux, mai: mawh kawncau daux pui pa yumrhawm: tialiah (70) kaux tix kaux heue. Thatdie: ot tau mai: pa kaux Tobia (Tobia), daux veng Edisax. Mai: cox jhawm: saux pui tom: nie moi heue. Yam mhong: simiang ka satang an, nawh tawng kawncau pa ploi: Yesux tag mawh Thatdie: , mai: nhie: kawncau tix hu: kok ka Thatdie: hoek heue. Yam hoik hoek Thatdie:, Thatdie: ah nin: ka simiang “ Kheu yumrhawm: een: maix rhawm: tix ka Simiang pa nhie: aux hoek. Simiang aux tom: ploi: aux hoek ka maix heue. Mai: maix tag pon khawngphak pa rawg maix, awm: yumrhawm: een: maix rhawm: tix ka Simiang aux heue”. Mai: Abgrax deeh pawk mai: ah nin: ka Thatdie: “Phan: aux ah krax yumrhawm: tix ka Sara maix kienie aux keud tix hu: puing tix tik ka pui Yudax pa plaux ka Sara maix, ka kru naing tix heue. viang mawh nan:, kheu hoik tawng aux kwang simiang Romax ka pui ceu an, aux tom: ang hu: puing kah heue.

Otkhaix Abgrax chawg grawng: Yesux ka Thatdie: heue. Daux ngaix pasax, sonsang kieh pui khankix khrawm: paox tix, mai: sonsang pon kraik ka grawng: Simiang Yesux ka pui an kix, Thatdie: mhaing: akhwang ka Abgrax heue. Ceu pa sidiex gau mai: ceu pa kham: Thatdie: mhai: sakse:

kienie mawh ceu pa kied koe: krax laigrhawm: heue. Grawng: in khankix viang mawh been kawx, daux ceuca: kawn: khrit phaoxka: kheu ceu pa sidiex awm: in, yaox tix tawng ka lox bwan: gauxrhawm: gauxrhi: pa mawh num: riah, kaing jhaw: satsana cie pui pa sidiex heue.

“Daux rhawm rhi: kawn: pui, aux tag ruat simie lox bwan: gauxrhawm: gauxrhi: cie Siyiex” nawh ah nan:, mai: ka grawng: pa hoek Simiang Yesux ka piang haktiex in, pa sito: mai: pa keh Nawh Cao: pa yuh ka mawx ang ah, mai: kaing jhaw: satsana Nawh Cao: ang ah, mai: ka pa Simiang Siyiex ploi: ka Nawh Cao: piang haktiex in pa yuh ka mawx ang ah, krai mai: sidiex heue. Mai: kaing jhaw: pa yuh Nawh Cao: piang haktiex in, pa sito: mai: grawng: pa raux pa mox pa lox pao: Nawh Cao: ang ah, mai: ka gumlox pa khraox cie Nawh Cao: khankix, mai: pa tik ka pa mawh Siyiex, pa yuh ka mawx, mai: grawng: pa yaox tix yum piang khaoxhak pa seeing: pa brai: ang ah, khaix an, hu: ka daux meung yum, mai: tee tix tik ka ceu pa laklheet khankix pa koe: jheeng jheeng, mai: grawng: kieh pui pa yum deeh kaoh im: baox tix bawg ang ah, mai: viang Nawh Cao: hu: tix kaux khaing: ka meung yum kawx, khaix hoik deeh kaoh im: khaing: meung yum, mai: pui tom: nie, grawng: hu: Nawh ka Simiang Siyiex leeing ju leeing phan: pa koe: daux meung raoma: ang ah, jawg tix krai mai: sidiex heue.

Viang simiang Abgrax tawx mau tom: nie ka Thatdie: kawx, Thatdie: ang rieb heue. Mai: Thatdie: pawk mai: ah nin: “Aux hoik tik can ceu pa koe: aux khawm: uik, mai: hawt khaix Nawh Cao:, yuh ka mawx aux chix pon rieb ka kraung khrai: cie pui tang: kaux lie?”

Ka been in khankix, ceu pa pon plak jhi: hoek dee iak kienie mawh ceu pa laigrhawm: heue. Pa yaox daux been plak khaix khankix kienie kheu ang Simiang Yesux pa tokaux nawh pon hu: ka veng Edisax, mai: Nawh Cao: tom: nhie: Anania pawd rieng Nawh Cao: piang ce, son simiang Edisax heue. Kheu jhiet jhan: rieng plak ngai: Simiang Yesux, Anania tom: ang pon pawd rieng Simiang Yesux kah heue. Mawh kheu nan:, Simiang Yesux lhop ka man: tix pheem: piang plak ngai: Tix, mai: kieh rieng plak ngai: Nawh deuk piang man: an heue. Mai: sipaox ka man: an ka simiang Edisax heue. Daux lai (John of Damascus the Exposition of the orthodox Faith. 4. 16) plak jhi: yuh nin:, man: an, yuh siawp sibrawm pa daox pa an: tom: nie ceu heue.

Thatdie: baox tix lailing ing tiang hu: sidiex dee tang: dah heue. Dee ghoik, Thatdie: yaox tix yum ka te, dee Ararat (Ararat) heue.

Been simiang Edisax mai: Thatdie: pa mawh kawneau kienie mawh grawhgrawng: pa kied koe: krax laigrhawm: tix ceu heue. Mai: ceu pa yuh Thatdie: kienie mawh ceu pa caw pui pa yuh kaing jhaw: Nawh Cao: tix yuh ku kaux heue. Phaoxka: yaox tix ot tau mai: Simiang Yesux, Khaix an yaox tix tawx pa rieng pa viex Simiang Yesux hoek ka piang haktiex in, mai: yaox tix gwieh tix tawx pa nhim: ka pui khankix, ka ceu an, ghoik ka lai in kah heue.

Singaix hoik toe: lai ka lai in mawh 5-12-2004, ponsawm 9:05 heue.
